

**SEVENTH LEGISLATIVE ASSEMBLY OF MIZORAM  
(TWELFTH SESSION)**

**LIST OF BUSINESS**

FOR ELEVENTH SITTING ON TUESDAY, THE 28<sup>th</sup> MARCH, 2017  
(Time 10:30 A.M. to 1:00 P.M. and 2:00 P.M. to 4:00 P.M.)

**QUESTIONS**

1. **Questions** entered in separate list to be asked and oral answers given.

**LAYING OF PAPERS**

2. **Pu LALSAWTA**, Minister to lay on the Table of the House the following :
  - i) Report of the Comptroller and Auditor General of India on State Finances for the year ended 31 March, 2016.
  - ii) Finance Accounts 2015-16 Volume-I
  - iii) Finance Accounts 2015-16 Volume-II
  - iv) Appropriation Accounts 2015-16

**PRESENTATION OF REPORTS**

3. **Pu R. VANLALVENA**, to present to the House the following Reports of Subject Committee-III :
  - i) Eleventh Report Relating to Rashtriya Swasthya Bima Yojana (RSBY) under Health & Family Welfare Department.
  - ii) Twelfth Report Relating to Horticulture Mission for North East & Himalayan States (HMNEH)/Mission for Integrated development of Horticulture (MIDH) under Horticulture Department.
  - iii) Thirteenth Report Relating to Rashtriya Krishi Vikas Yojana (RKVY) Stream-I and National Vegetable Initiative for Urban Clusters (NVIUC) under Horticulture Department.

**FINANCIAL BUSINESS**

***DISCUSSION AND VOTING ON DEMANDS***

4. **Pu R. ROMAWIA**, Minister to submit to the vote of the House various Demands under his charge.
5. **Pu LAL THANZARA**, Minister to submit to the vote of the House various Demands under his charge.

NGURTHANZUALA  
Secretary

.....

**S P E A K E R** : ‘Rilru hmunkhata awmin, hmangaihna hmunkhat neiin, inthuruala rilru hmunkhata awmin, ka lawmna tifamkim rawh u’ –

Philipi 2:2.

Zawhna No.142 na kan la ang a, zawhna neitu MLA zahawmtak Dr. Ngurdingliana zawt turin ilo sawm ang.

**Dr.NGURDINGLIANA** : Pu Speaker, ka lawm e. Ka Starred Question 142-na, Health & Family Welfare Department changtu Minister zahawm tak chhan atan–  
Khawruhlian PHC leh Phuaibuang PHC ten X-Ray room an neih sa diam tawh ah hian a khawl leh Technician engtikahnge dah theih a nih ang tih ka zawt e.

**S P E A K E R** : Awle, Department changtu Minister zahawm tak Pu Lal Thanzara, chhang turin ilo sawm ang.

**Pu LAL THANZARA, MINISTER** : Pu Speaker, member zahawm tak Dr. Ngurdingliana Starred Question No.142-na chhanna chu fund kan neih chuan heng PHC-ah te hian X-Ray khawl dah tum a ni. Technician hi sorkar in post fill up min phalsak veleh dah tum a ni a,heng atan hian budget-ah pawh reflect a ni a. Tin, chu bakah post pawh hi la retain zel a ni.

**S P E A K E R** : Zawh belhna a awm em? Aw, zawhbelhna a neitu Pu Ngurdingliana’n zawt hmasa se, chuan Pu John Siamkunga’n a zawt nghal ang.

**Dr.NGURDINGLIANA** : Zawh belhna ka neilo ka ti na in, ka nei tho a, a chhan chu MLA fund atangin thahnemngaihna vang leh mamawhna a nasat em avangin Indian Medical Board duh ang thlapin tunah hian heng Khawruhlian leh Phuaibuang PHC ah hian building X-Ray room, a khawl dahna liau liau tur kan peihsa diam tawh a,Minister chungah khan lawmthu ka sawi e.

**S P E A K E** : Pu John Siamkunga, zawh belhna.

**Pu JOHN SIAMKUNGA** : Cherhlun PHC-ah hian X-Ray khawl dahna tur room kan nei tawh a, tin X-Ray khawl hi kan lei tawh bawk a, a technician hi kan la neilo a. A khawl te kan nei tawh a, engkim kan dah vek tawh a, chu chu min pe thei ang em tih ka zawt e.

**S P E A K E R** : Pu T.Sangkunga’n zawt nghal mai se.

**Pu T.SANGKUNGA** : Tuna ka hma amite sawi ang bawk khan Bungzung PHC leh Farkawn PHC-ah hian X-Ray khawl dah ve ve tawh a ni a, a technician hi an

awm lo a, a dang rual khan min ngaihtuhsak thei ang em aw tih kan Minister chak tak hi ka zawt e.

**S P E A K E R** : Pu Ruatkima'n zawt law law se, a tawpna atan.

**Pu LALRUATKIMA** : Pu Speaker, wawiin hi kan Assembly Assurance Committee te HPCD ten an lambunna cham kha a ni a, khami an kal tuma Health Clinic sak tura ruahhmanna kha sak zawh a ni ta hlawm em? A khua kha Zokhawthiang, North Khawdungsei tih vel ni ta in ka hria a, kha kha kan zawhbelh zawk a ni e.

**SPEAKER** : A vai khan Minister zahawm takin chhang se, chhang turin Pu Lal Thanzara.

**Pu LAL THANZARA, MINISTER** : Pu Speaker, zawhna neitu Dr. Ngurdingliana thahnemngaihna, MLA fund atang te a khilaia department tana a hmalakna te kan hria a, department angin a chungah lawmthu kan sawi duh a. Tin, member zahawm tak Pu John Siamkunga leh Pu T.Sangkunga te pahnih in an rawn sawi ang khan, technician dah tur hian process mek a ni a, post fill-up phalna dil mek a ni a, heng hi sorkar atanga phalna kan neih veleh anni bialah pawh hian dah tum a ni dawn a ni.

Tin, Pu Lalruatkima member zahawm tak in a zawhna kha chu chiang zawkin nakin ah kan la inhriattir dawn nia.

**SPEAKER** : Zawhna No.143-na ah kan kal thei ta a, zawhna neitu Pu Ruatkima zawt turin i sawm ang.

**Pu LALRUATKIMA** : Pu Speaker, ka lawm e. Ka Starred Question No.143-na, Home Department changtu Minister zahawm tak chhan atan –

- a) Tripura Refugee Camp atanga Tuikuk Mizoram mi leh sa dik tak lak kir tumin Road map tum engzatnge siam a nih tawh? Road map hrang hrang ah te hian central sorkar atangin engzatnge sum dawn a nih tawh a, engzatnge sen a nih tawh?
- b) Mizoram a lo kir tur hian an thil phut enge? Sorkar-in an thil phut hi tih hlawhtlinsak a tum em?
- c) Refugee camp hrang hrang ah te hian chhungkua engzat nge awm a, Mizoram Electoral Roll-ah engzatnge hming chuang mek?

d) Ni 30.1.2015-a Ministry of Home Affairs hova Mizoram leh Tripura sorkar aiawhte thutlukna ang khan engvanga kalpui lo nge a nih?

**SPEAKER** : Department changtu Minsiter zahawm tak Pu R.Lalzirliana chhang turin ilo sawm ang.

**Pu R.LALZIRLIANA, MINISTER** : Pu Speaker, member zahawm tak Pu Lalruatkima zawhna chhanna chu –

a) Tuikuk – Reang( Bru) Mizoram mi leh sa diktak lak kir na tur hian Road map pali ( I, II, III & IV) siam a ni tawh.

Road map hrang hrang ah te hian Central sawrkar atangin engzatnge sum dawn a nih tawh a, engzatnge sen anih tawh tih chhanna chu –

b) Hetiang hi central sorkar atanga kan sum hmuh dan chu a ni:

Road Map – I : ` 243.80 lakhs.

Road Map – II : ` 243.00 lakhs.

Road Map – III : ` 9.97 crores + ` 7.87 crores = ` 17.84 crores

Road Map – IV : ` 4.7 crores + ` 5 crores + ` 7.5 crores = ` 17.2 crores.

Road Map I,II,III a kan sum hmuh te hi hman a ni tawh a, Road Map IV atang hian ` 4.7 crores leh ` 5 crores hi inpuahchah nan hman a ni nual tawh.

Tuikuk – Reang ( Bru) te hian Supreme Court-a Writ Petition No.867 of 2016 a an thehluk a an thil phut te chu hengte hi a ni:

- 1) Chhugtin hnenah thlai chinna tur ram acre 5 theuh pek.
- 2) Bru lak let te khaw khata a khawma dah.
- 3) An khaw awmna ah electric, tui, school, damdawi, ek in, kawng tha etc, siam/ pek ni se.
- 4) Ram a thing leh thlai te zalen taka lak/hman phal.
- 5) Compensation sum ` 80,000/- atanga ` 10,00,000-a tihpun.
- 6) Reang (Bru) te lak letna tur motor anmahni lungawina ang thlapa felfai taka ruahmanna siam.
- 7) Bru chhungkua zawng zawng hnenah ration card thar pek.

- 8) E-roll revision neiha Bru raltlan zawng zawng thun luh leh e-roll revision hi kum tina neih.
- 9) Rehabilitation Scheme hi Reang (Bru) ho lungawina thlapa tih fel a nih hma chu tihluihna-a Mizorama lak kir rih loh.
- 10) Dampa Sanctuary-a a tira an chhuahsanna hmuna awm let leh.
- 11) Reang (Bru) zirlai naupangte hnenah an zirna an chhonzawm theihna tura transfer certificate pek vek.
- 12) India Constitution Article 244 (2) leh VI Schedule zulzuia Bru ho tan Autonomous District Council pek.
- 13) Mizorama Reang (Bru) lak let tumna hi a hlawhtling lo a nih chuan Tripura-ah an tanpuina dawn tur zawng zawng bakah chenna in, tui, electric, zirna, damdawi, etc. te nen Tripura-a an khawsak phalsak. An thil phutte hi danin a phal a, sorkarin tul a tih chuan tihlawhtlinsak theih an ni.

c) November 2016-a neih tak Reang (Bru) identification process report ang chuan district hrang hrang ami Tripura-a Reang (Bru) chhungkaw awm zat chu hetiang hi a ni :

Mamit District	-	4199
Lunglei District	-	384
Kolasib District	-	824
A vaiin	-	5407

Mizoram E-roll-a Reang (Bru) hming chuang zat chu hetiang hi a ni.

Mamit District	-	8384
Lunglei District	-	746
Kolasib District	-	1633
A vaiin	-	10763

- d) Reang (Bru)-te hian Mizorama lo kir turin an thil phut hi an tih belh zel avangin tun thleng hian lak kir theih an la ni lova. Ni 30.1.2015-a Ministry of Home Affairs hova Mizoram leh Tripura sawrkar ten thutlukna an lo siam tawh ang hian kalpui loh a nih chhan chu 2015 kuma lak let tum an niha tumah an lo let tak loh hnu khan Supreme Court-in lak let hna hi chhonzawm leh tur a tih vang a ni.

**SPEAKER** : Zawh belhna, Pu Ruatkima.

**Pu LALRUATKIMA** : Pu Speaker, ka lawm e. Ka zawh belhna 1-na chu : April ni 8, 2014-a sorkarin NGO Coordination Committee neihte hemiah hian sorkar thutlukna ang kha tihhlawhtlin a tum em tih a ni a. Tin, an thil phut hi kan Minister zahawm tak khan “Danin a phal a, sorkarin tul a tih chuan tihhlawhtlin theih beisei a ni” tia chhan a ni a. Chutah chuan an thil phut zing ami VI Schedule hnuaiia Autonomous District Council kha danin a phal em? Pek tum a ni em tih ka zawh belhna a ni a.

A tawp berah chuan engvanga Tripura-a inbengbel mai lo nge an nih tih kha ka zawh belhna a ni e.

**SPEAKER** : A dang a awm loh chuan chhang turin Minister sawm ila, a tawpna a ni ang.

**Pu R. LALZIRLIANA, MINISTER** : Helaia Pu Speaker, NGO te nena meeting-a kan rel kha tun hunah hi chuanin a la hlawhtling thei chiah lo a ni. Helaia kan chhan theih mai chu nichina ‘danin a phal a, sorkarin rem a tih chuan hman theih a ni’ tih kha kan chhanna a ni a. Amaherawhchu heng hi chipchiar zawka han ngaihtuah chuan ‘tul a tih chuan’ tih kha a nia sorkarin. Tul a tih loh chuan lak let leh mai tur kha a nia, heng hi phal loh mai tur a nia. Lak let lohva kha chu kan thu chiah a ni lova. An demand ang erawh hi chu sorkar-in a ngaihdan zawk chu hei hi a ni, kan sawi leh ang a. A rei deuh pawhin ngaithla vak mai ang aw.

Tuikuk (Bru)-te thil phut chu hei hi a ni a. A lehlamah hian sorkar ngaihdan chu ka rawn sawi zel ang a.

Pakhatna ah chuan “Chhung tin hnenah thlai chinna tur ram 5 acre theuh pek.” An rawn letna tur ram pek chungchang hi Village Council-te thuneiha a ni a. Hemi zat hnam bil tana pek hi chu rem pawh a rem lo.

(2) “Reang (Bru) lak lette khaw khatah awm khawma dah, dah khawm” an demand a ni a. A chhanna chu khaw khatah a khawma dah turin ramin a daih lova, tin, khaw khatah heti zat dah khawm an nih chuan thingtlang eizawna lo neih pawhin a dawl lovang.

(3) “An khaw awmnaah electric, tui, school, damdawi, ek in, kawng tha siam/pek ni se. Sorkar-in kan comment-ah chuan an awmna tura ruat khuaah te hian hetiang hi chu an sawi ngai lovin a awm tlangpui a, a awm lo a nih pawhin sorkarin a ngaihtuah zel ang.

(4) “Rama thing leh thlaite zalen taka lak/hman phalsak” Danin a phal ang zela ngaihtuhsak an ni ang. Hei hi dan hian a phal tehchiam lo tih erawh chu kan hriat a ngai ang a.

(5) “Compensation sum ` 80,000/- atanga ` 10,00,000-a tihpun.” Hei hi Mizoram sorkar thu a ni lova, central sorkar thu a ni.

(6) “Reang (Bru) te lak letna tur motor anmahni lungawina ang thlapa felfai taka ruahmanna siam. An awmna tur District-a Deputy Commissioner-ten ruahmanna fel tak an siam a, a tha tawk hle a ni.

(7) “Bru chhungkua zawng zawng hnenah ration card thar pek.” Endik an nih hnua Mizoram mi leh sa ni ngeia finfiahte chu pek mai tur an ni.

(8) “E-roll revision neiha Bru raltlan zawng zawng thun luh leh e-roll revision hi kum tina neih.” Electoral Roll ennawn-a mi thun leh paih hi Election Commission of India thuneihna a ni.

(9) “Rehabilitation Scheme hi Reang (Bru) ho lungawina thlap-a tih fel a nih hma chu tihluhna-a Mizorama lak kir rih loh.” Reang (Bru)-te la let turin Mizoram sorkarin tihluhna hman a tum lo.

(10) “Dampa Sanctuary-a a tira an chhuahsanna hmuna awm let leh.” Tripura-a an tlanhhiat hmaa Dampa Sanctuary-a Reang (Bru) lo khawsa ho kha bawk (Unauthorised Settlement)-a awm an ni a. Khaw pangngai awm sa pawh sorkar laipui puihnain he Sactuary tihchangtlun zel nan hian sawn chhuah zawk an ni. Entirnan, Andermanik angte.

(11) “Reang (Bru) zirlai naupangte hnenah an zirna an chhunzawm theihna tura transfer certificate pek vek.” Hei hi Mizoram sorkar mawhphurhna a ni lo, Tripura sorkar mawhphurhna a ni.

(12) “India Constitution Article 244 (2) leh VI Schedule zulzuia Bru ho tan Autonomous District Council pek.” Mizoram sorkarin rem a ti lo.

(13) “Mizorama Reang (Bru) lak let tumna hi a hlawhtling lo a nih chuan Tripura-ah an tanpuina dawn tur zawng zawng bakah chenna in, tui, electric, zirna, damdawi, etc. te nen Tripura-a an khawsak phal. Hei hi sorkar comment ah chuan central sorkar leh Tripura sorkar ngaihtuah tur a ni tih kha ka chhanna chu a ni mai e.

**SPEAKER** : A fiah tawk viau e.

**Pu LAL THANHAWLA, CHIEF MINISTER** : Pu Speaker, khawngaih takin reilote.

Tuikuk tih hi an duh tawh lo a, Zoram mi chuan Bru tih an duh a. Tripura ramah chuan Reang an ti a. Entirnan kan Lai unaute, kan Mara unaute pawhin an duhzawk hming kha an thlak a. Hei chu pawmsak ila a tha in ka ring a, an duhtawh loh hminga zuk lam zuk lam kha.

Tin, anniho hi an duhthala chhuak an ni a. Chuti chungin 1997 a an chhuah hlim te khan kan zuk umzui a lo kir leh turin, Zoram khua leh tui diktak te chu, mahse an lo kir duh lo a. Central lamah a chhe thei ang berin min hek a. Lal Krishna Advani-in na takin min rawn bei a. 'Hindu an nih avangin tiang hian in tiduhdah a ni Mizo kristiante leh missionary te leh YMA ten, chuvangin a lak let leh leh a thawidam hna hi in thawk tur a ni,' min rawn ti a.

Tin, keini pawhin an tan a hlauhawm tawh lo tiin nasa takin kan ngen a chhuak lo turin. Entirnan, tam tak an chhuak lo a ni reng a. Tin, an tan khan a hlauhawm zui lo, misual 8-9 vel thil tih mai a ni a, kan man vek lehngal a.

Tin, khatihlaia MLA Pu Zoduha te pawh an chhuak duh lo a, an vau a, sum an chawitir a. Chutiang chuan an inkarchhuak a ni. Tin, Lal Krishna Advani, khatihlaia Home Minister kha Delhi ah kalin ka hrilh a. Bru unaute hi a tirah chuan atheist an ni tlangpui a. Tunah hian Mizo way of life an adopt ve a. Tin, ringtu pawh tam tak an awm tawh a ni. Tihluhna pakhatmah a awmlo, pastor te pawh an nei.

Tin, englaimahin Hindu an nih kan hre ngailo a. Tin, Hindu temple 28 tihchhiat tur pawh a awm bawh hek lo. Hetianga dawta inpuh hi kan duhlo a ni kan ti a. Tin, national press atanga journalist te, print leh electronic media te zin turin 10 rual vel kan sawm a. Dawta min puhna hmunah khan kan tir vek a, national press ah pawh an ziaak tha viau a ni Pu Speaker.

Tin, RSS ho in vauna lehkha min rawn thawn bawh a. Chungte pawh chu na tawh takin a phu tawh in ka chhang ve a. Chutiang khawp chuan anniho hi Mizote chungah hleilen an tum a, an invilik a ni. Mahse chuti chungin kan hotute leh NGO te



pawhin tha te a an lo kir duh chuan lo kir se mawle an ti a, open arms in kan welcome reng a ni.

An camp-ah te pawh vawi engemawzat kan senior officer te bakah Minister te pawh an kal a ni, 1997-1998 velah pawh khan. Chutiang chu a ni a. Chuvangin vawiinah hian heng duhsakna an dil zawng zawng hi central sorkarin a pe dawn a nih chuan Zoram a awmsa te pawh hi min pe ve tur a ni, ram 5 acre neilo kan tam lutuk.

Tin, khatiing duhsakna, vohbikna kha dawnglo kan la tam lutuk NLUP te leh thil dang danga theihpatawp kan chhuah chung pawh hian. Chutiang chu a ni a. Tin, Autonomous District Council pheih chu keini hi chuan tute mah kan pe lo ang.

**SPEAKER** : Awle, zawhna no.144-na neitu Dr. K.Beichhua zawt turin i sawm ang.

**Dr. K.BEICHHUA** : Pu Speaker, ka lawm e.

Health & Family Welfare Dept. changtu Minister zahawm tak hnena ka Starred Question no.144-na chu-

- a) Medical College vawiin thlenga la din theihloh hi engnge a chhan?
- b) College din nan central atangin state in pawisa cheng engzatnge a dawn tawh tih a ni e.

**SPEAKER** : Awle, chhang turin Minister zahawm tak Pu Lal Thanzara i sawm ang.

**Pu LAL THANZARA, MINISTER** : Pu Speaker, ka chhan hmian, hei vawiinah zawhna hunah hian zawhna 7 lai mai Health Dept. atangin kan nei a. Pakhat kan chhang tawh a, a dawt ami pawh hi Falkawn chungchang bawh hi a ni a.

Kan hriat angin vawiin hi ka demand sawiho ni a ni a. Chuvangin, tukin zinga kan hun hman zawhna leh chhanna vel te pawh hi demand sawi hunah, hun kan neih tlem phah theih ka beisei a. Chutiang chuan kan member te pawhin min pawmsak theih ka ring a.

Tin, helai huna in zawhnate kan han chhan fiah mai theihloh kha nakinah demand sawi hunah te pawh la chhang fiah thei turah inngai ila a tha awm e.

Pu Speaker, Dr. K.Beichhua zawhna Starred Question no.144-na chhanna-

- a) Medical College la din theihloh nachhan te chu hengte hi a ni -
  - 1) Building hrang hrang sak ngai tur te leh cheithat ngaite zawh a la nih loh avangin.

- 2) Hnathawktu tur lak a, dah fel kim a la nih loh avangin.
- 3) Hmanrua leh bungrua chi hrang hrang awm tur la dah kim loh avangin.
- 4) Medical Council of India-in damlo OPD – State Referral Hospital, Falkawn ah nitin 400 tal en tura bithliah a siam kan la tlin loh avangin.

b) Central atangin state-in pawisa a hnuai ami ang hian a dawng tawh a ni –

Sl. No.	No. & Date	Released of Amount
1	No.G.20017/1/2015-ME-II/Pt dt.29.1.16	` 20,00,00,000.00
2	No.G.20017/1/2015-ME-II/ dt.30.1.16	` 10,00,00,000.00
3	No.U.14017/22/2015-ME-II/ dt.24.6.2016	` 1,17,00,000.00
4	No.U.14017/22/2015-ME-II/ dt.24.6.2016	` 6,65,00,000.00
5	No.U.14017/22/2015-ME-II/ dt.24.6.2016	` 2,18,00,000.00
	<b>TOTAL</b>	` 40,00,00,000.00

**SPEAKER** : Zawhbelhna kha nichina a sawi kha member zahawm takte khan hria ila. Demand sawihonaah khan in sawi teuh theih dawn a maw. Chuvangin supplement kha ti tam lo hram ila.

**Dr. K.BEICHHUA** : Pu Speaker, chhan har lo tur te te ka rawn zawt ang a. Har tur awm ang chi chu ka rawn ti lem lo vang.

Mizoram mipuiin Medical College nei thei mai tur ah kan han inngai a, kan lawm a. Tunah pawh beiseina sang tak kan nei a. Chuvang chuan a pawimawhin ka hria a. Ka zawhbelhna chu ho te te ni ta se.

MCI in inspection hi an lo nei tawh em ? Tin, building hi physical achievement leh financial achievement engzat nge?

Tunah hian Doctor engzatnge awm? Department engzatnge kan neih? Nurse engzatnge kan neih tih ka zawhbelh e.

**SPEAKER** : Awle.

(Pu T.T.Zothansanga : Pu Speaker sang deuhin ka phar a min hmulo palh a ni ang e.)

**SPEAKER** : Sorry, zawt nghal rawh le.

**Pu T.T.ZOTHANSANGA** : Ka zawhna-

- 1) Referral Hospital hi sorkar hmasa lamah khan kohhran enkawl tura pekchhuah tumna a awm em?
- 2) Medical College-a zirtirtu ni thei tur Mizo zingah kan awm em?
- 3) Sorkar hmasa, MNF hunah khan Referral Hospital hi mumal taka kalpui tawh ni-a sawi a ni a. Central lam atanga endiktute an lo kal lai khan damlo 17 zet damdawiina awm mek, enkawl mek an awm tih kha a dik em?

**SPEAKER** : Aw, Pu Ruatkima. Tikhan a tawpna ni rawh se aw.

**Pu LALRUATKIMA** : Pu Speaker, ka lawm e. MIMAR kan din dawn a, ni e, a pian hmain a hming kan phuah a, a dik vek tho a. Director appointment pek tawh ni khan ka hria a. Hauh lawk emawni kan nei a nih chuan a hming min hrilh thei em? Engzahnge a thla hlawh tur te pawh kha sawilan thuak thuak kha a ni tawh a, engzahnge kan lo sen tawh? Hetianga kan din harsatna kan neih leh si hian amah kha terminate emaw, tih tawp a ni dawn ta em tih kha kan zawh belh a ni.

**S P E A K E R** : A vai khan Minister zahawm takin chhang kawp sela, a tawpna a ni tawh ang. A dang a awm tawh lo ang.

**Pu LAL THANZARA, MINISTER** : Pu Speaker, zawhna neitu Dr Beichhua zawh belhna MCI-in an rawn tlawh tawh em tih chu nikum kum tawp lam pang khan MCI team in an rawn tlawh tawh a. Engmah min hrilh lawk lovin an rawn kal a, a hmun hma ah te an va kal a, a tul ang ang an tlawh a, a building infrastructure vel ah chuan an lawm khawp a. Amaherawhchu, thil dang tam tak staff lak chungchangah te leh, kan sawi tak ang khan damlo admit ngai zat te leh OPD neih zat ngai ang zawng zawngte kha kan la tlin rih loh avangin, chumi tum chuan phalna min pe rih lo a. Mahse phalna min pek rih loh rualin kan department hotute hnenah kan hma lak zel dan turah kawng kawhmmuhna tha tak te an nei a. Rin aiin an fel a, khang team member ho kha, tun hmaa kan lo hriat danah chuan anni ho hi strict tak thin a kan ngaih kha, rin aiin an strict lova, chuvangin kan hotute pawh an lawm hle a ni.

Tin, MCI ho rawn inspect vawi khatna kha ni 15, 1986-ah an rawn tlawh tawh a, January 2017-ah an lo kal leh zawk a nih chu, nikum ni lovin. Tichuan tunah hian a building physical achievement chu 80 to 90% zawh tawh a ni. Tin, staff hi 245 an

awm tawh a, nurse hi 89 an awm mek a ni, chu chu a zawhna neitu zawh belh kha niin ka hria a. Doctor hi 33 an awm a, contract 9, an vaiin 42.

Tin, member zahawm tak Pu T.T.Zothansanga zawhna kha kum hmasa lamah khan he Referral Hospital hi vaibelchhe tel teh meuha bul tana hma lak chhoh a ni a. An han kal chhoh pui kha khatih hun laia sorkar khan, an kalpui fuh tha hleithei lova, Roman Catholic nge ni Seventhday Kohhran nge ni, khang kohhranah te khan hralh tumna a awm nia hriat a ni. Tin, chumi piah lamah chuan an pawisa sen tawh endik turin Pu Speaker, phai lam atanga an lo kal tum khan sawlaiah damlo lem te siamin, ward hming lem te temporary-a tarin an lo dawngsawng a, mahse an lawm vaklo aniang, pawisa an rawn pek belh ta lo a nih kha. Tin, Mizo zirtirtu hi department hrang hrangah engemaw zat chu zirtirtu-a han tang ve mai thei MCI in an pawm ang kha kan nei a ni. A zat chiah ka sawi mai thei lova. Tin, Director tur kha Dr. Lallukhuma Fimate hi kan han hual deuh a ni a, amah pawh kan be tawh a. Amaherawhchu sorkar lam atangin thil dang kan la peih loh lain ani hi ` 1,80,000/- vel lai a thla khat hlawh tura ngaih a nih avangin khatiang zat zat hlawh a lo rawih reng mai kha remchanga an hriat loh avangin kan la ti rih lo a ni, Pu Speaker.

**Pu VANLALZAWMA** : Minister zahawm takin tuna a chhannaah khan engmah min hrilh lawk lovin an lo kal thut a ti deuhin ka hria a, MCI kha. Kha kha an tihphung nge ni, thil tihphung pangngai a va ni lo deuh em tih ka'n zawt chiang lawk duh a ni.

**Pu LAL THANZARA** : Pu Speaker, kha kha an tih dan phung tlangpui a ni. Helai an rawn thlen hnu ah chauh kan hria a, chu chu MCI ho-in inspection an neih a an tih dan phung a ni awm e.

**S P E A K E R** : Awle zawhna No. 145-na ah kan kal thei e. Awle, House Leader.

**Pu LAL THANHAWLA, CHIEF MINISTER** : Pu Speaker, han sawi belh lawk tur a awm a, Director lo lak hmasa ber kha pre conditionah an rawn nei a a tirah chuan, mahse kan tlin dawn loh avangin a tul tul kal chhoh zel kha min rem tih sak a. A tirah chuan nuai hnih chuang a phut a, mahse negotiation rei tak tih hnuah ` 1,50,000/- velah khan tlawmngaih chhuah turin kan bel thei a ni.

Tin, MCI te hian engatinge surprise visit an rawn tih tih hi, an ti thin em tih chu kan hre lova, amaherawhchu hmana a team lo kal ten sawlai an rawn tlawh khan damlo hire tih vel te kha a awm avangin min rawn surprise an duh a ni ang a tih te chu a ngaihtuah theih a. An surprise visit tak tak a ni a, an driver pawh kha an kalna tur an hrilh lova, tikhan an chuang a, a kalna tur kha an hrilh a, tiangkhan an hrilh chawp a. Referral Hospital an kal dawn tih pawh kha an driver khan a hrelo.

**S P E A K E R** : Zawhna No. 145-naah kan kal thei a, a zawhna neitu Pu Lalthanliana sawm ila.

**Pu LALTHANLIANA** : Pu Speaker, traffic jam avangin ka rawn tlai hret a, pawl ka ti khawp mai. Health and Family Welfare changtu Minister zahawm tak chhan atana ka zawhna chu - Falkawn-a Referral Hospital behchhana Medical College din tum kha tuna a dinhmun min hrilh thei em tih a ni e.

**S P E A K E R** : Tuna a chhan tawh kha a ni leh mai a, engpawhnise Minister zahawm tak sawm ila, a tawi zawngin a chhang thiam ang chu mawle. Pu Lal Thanzara.

**Pu LAL THANZARA** : Pu Speaker, member zahawm tak Pu Lalthanliana Starred Question 145 na - Falkawn-a Referral Hospital beh chhana Medical College din tum kha tuna a dinhmun min hrilh thei em tih kha kan sawi ang khan Pu Speaker, a hmaa kan chhanna te bakah khan hetiang hian han chhang ila a tha awm e -

**1. Financial Status :**

Government of India-in a phut angin state matching share 5.56 crore Government of Mizoram-in 2015-2016 chhungin a release a, hman zawh tawh a ni.

Ministry of Health & Family Welfare, Government of India atangin 2015-2016, 2016-2017 chhungin ` 40.00 crore dawn a ni a, hei hi hman mek a ni

**2. Infrastructure :**

Renovation works atan hetiang hian hma lak a ni.

1. Administrative Building chu – Anatomy, Physiology, Bio-Chemistry Department, Library Department atan chei that mek a ni a, zawh fel tep a ni.
2. Main Hospital Building – Vertical Extension in zawm a ni a, 90% works zawh tawh a ni.

3. OPD Building – Vertical leh basement te Ward leh Laboratory, Radiology Department atan siam a ni a, peih tep a ni.

**Equipments (Library, Vehicle telin)** Mamawh hmasa zualpui lei tura hma lak mek a ni.

**Man Power** : Post chi hrang hrang 190 chu DP & AR, Government of Mizoram chuan min phalsak tawh a, Medical Council of India duhdan a phak loh avangin dil belh leh mek a ni.

Pu Speaker, Ministry of Health & Family Welfare, Government of India chuan India ram pumah Medical College 58 District Hospital ding lai te ti lian a, upgrade a, din turin ruahmanna a siam a. Mizoram pawh he scheme dawng thei tur pakhat kan ni hlauh a. An estimate cost hi cheng vaibelchhe 189 a ni a. Chutiang chuan nichina kan sawi tak ang khan a then kan hmu tawh a, cheng vaiblechhe 189 atang hian Medical College building sak nan cheng vaibelchhe 69 phal sak a ni a. Hostel zirlai te tan leh faculty zirtirtu te tan cheng vaibelchhe 40 man sak tur a ni a. Tin, equipment cheng vaibelchhe 50 man lei phalna pek a ni a; tin, upgradation of Hospital atan cheng vaibelchhe 30, a vaiin cheng vaibelchhe 189 a ni, hei hi Govt. of India norms a ni. Mizoram sorkar chuan State Referral Hospital, Falkawn chu he scheme atan hian a thlang a. MIMER (Mizoram Institute of Medical Education and Research) tiin din turin ruahmanna chak tak kalpui mek a ni. Ministry of Health & Family Welfare, Govt. of India atanga sum lo kal tur bakah state plan fund atanga Falkawn-Hospital complex ramri buai encroach thin lai te chu vaibelchhe nuai 50 hmangin hung zawh tawh a ni. Tin, kum 2016-2017 chhungin New Economic Programme atangin cheng vaibelchhe 28 he Hospital tih changtlun nan hian min pe bawk a. He scheme hnuai hian Hospital hmanrua leh bungrua tha lei turin hma lak mek a ni. Tin, electric transformer bun tharna tur te, Hospital complex chhung inkalpawhna tur te a huam a ni. Chungte chu Pu Thanliana zawhna chhannate a ni e. Pu Speaker.

**SPEAKER** : Dr. Beichhua i lo sawm ang.

**Dr. K. BEICHHUA** : Pu Speaker, nichin khan ka zawhna pakhat min chhan loh a awm a, chumi piah lam pakhat lek zawh belh ka duh bawk a. Tunah sawn department engzatnge kan neih tih kha pakhat ni se. Tin, MCA norms-ah khan OPD case nitin 400 tur a ni ta a, tun dinhmunah hian OPD case mi

engzatnge kan neih tih leh Civil Hospital atanga khum lak phei a awm em? Nurse-te Civil Hospital Aizawl lam atanga saw lama dah phei an awm em? Awm ta se doctor leh nurse kha engzatnge ni tih ka zawh belh e.

**S P E A K E R :** Minister zahawm tak chhang turin i lo sawm ang. A tawpna a ni tawh ang chu.

**Pu LAL THANZARA, MINISTER :** Pu Speaker, member zahawm tak Dr. Beichhua zawh belhna chhanna chu tunah hian Medicine te, ENT-te, Ortho-te, Gynae-te, Dental-te, Skin-te, Eye, Surgery, Paediatrics, Ayush, PMR, NCD deparment-te a awm mek. Tin, kum 2016 chhungin in admit kher lo a inentir hi mi 35102 an ni a, tichuan chawh rualin thla khatah mi 2925 inentir ang an niin, nitin mi 110 vel inentir ang an ni.

**Pu R. VANLALVENA :** Doctor leh Nurse sawn phei kan zawh kha (Dr. K. Beichhua...leh khum te nen a awm em? Awm ta se engzatnge tih kha a la chhang lo, Pu Speaker).

**S P E A K E R :** Chhang law law se.

**Pu LAL THANZARA, MINISTER :** Pu Speaker, helai ka record hi dik turah ka ngai a. Doctor hi 33 an awm a, contract mi 9 te nen chuan a vaiin 42 an awm a ni. Nurse hi Nursing Superintendent 2 an awm a, Wards Superintendent 9, Staff Nurse 62 an awm bawk a. Tin, saw lai saw awmlo ata awma din a nihna angin Aizawl Civil Hospital atang khan a tir kha chuan khum engemaw zat lak phei a ni a. Aizawl Civil Hospital-in khatianga kan lakphei avang khan harsatna engmah an tawh chuan loh mai bakah, vawiin-ah hian kan lak phei aia tam department hrang hrangah khum kan dah belh tawh bawk a ni.

**S P E A K E R :** Zawhna No.146-na neitu Pu John Siamkunga, MLA zahawm tak zawhna zawt turin i lo sawm ang.

**Pu JOHN SIAMKUNGA :** Pu Speaker, ka lawm e. Hon'ble Minister Fisheries Department changtu chhan atan heng zawhna te hi ka zawt e -

- 1) Fisheries Department hnuai NLUP hmanga eizawngtu (beneficiaries) awm zat min hrilh thei em?
- 2) Fisheries Department hnuai NLUP hmanga beneficiaries-te hnena sum pek chhuah tawh total amount min hrilh thei em? (2012 to 2017)

3) Sangha dil kan siamna area cover zat min hrilh thei em?

4) Sangha kan tharchhuah a pung em?

**S P E A K E R** : Minister zahawm tak chhang turin i lo sawm ang, Pu B.D. Chakma.

**Pu B.D. CHAKMA, MINISTER:** Pu Speaker, member zahawm tak Pu John Siamkunga Starred Question No.146-na chhan chu -

- a) Fisheries Department hnuai NLUP hmanga eizawngtu (beneficiaries) awm zat chu mi 3409 an ni.
- b) Fisheries Department hnuai NLUP hmanga beneficiaries-te hnena kum 2012 – 2017 chhunga sum pek chhuah tawh zat chu ` 3435.12 lakhs a ni.
- c) NLUP hnuai Sangha dil kan siamna area cover zat chu 1704 Ha. a ni.
- d) Sangha kan tharchhuah zat chu a pung e.

**S P E A K E R** : Zawh belhna a awm em? A neitu Pu John Siamkunga i lo sawm ang.

**Pu JOHN SIAMKUNGA** : Pu Speaker, ka lawm e. Tun dinhmun hnukung berah Mizoram pumah hian fish farmers engzatnge awm tih ka zawt a. 2) Sangha khawi fish culture tih nan hian engtia zau nge tunah kan hman mek? 3) Lui dung atanga len leh lenkhang hmang tea sangha kan lak hi kumkhat chhungin engtianga tam nge? Tin, sangha khawi atangin kum khat chhungin engzatnge kan tharchhuah? A tawp berah chuan Mizoram hi sangha kan intodelh dawn tawh em? Kan sangha tharchhuah hian engzat percentage nge kan mamawhna hi a puhruk tawh tih ka han zawt e.

**S P E A K E R** : Pu Rinawma i lo sawm ang.

**Er. LALRINAWMA** : Pu Speaker, ka lawm e. Ka zawh belhna chu a punna rate min hrilh thei em tih a ni e.

**S P E A K E R** : Minister zahawm tak a pahnih khan chhang turin sawm ila.

**Pu B.D. CHAKMA, MINISTER** : Pu Speaker, supplementary question 1-na hi record angin kan chhiar chhuak ang e. Tharchhuah zat kum 2016 - 2017 chhungin culture leh capture tak tak chu hetiang record kan nei tawh lova, mahse avai belhkhawmin ka chhiar chhuak ang e. Including ponds and tanks production zat



chu metric ton 6980 a ni a, rivers and canals atangin metric ton 180 a ni a, reservoir fisheries lam atangin metric ton 250 a ni a, tin paddy-cum-fish culture atangin metric ton 200. Tin, lakes atangin metric ton 20 avai belhkhawmin metric ton 7630 a ni a. Tin, tunah Mizoram-ah kan thar chhuah zat chu kan sawi tawh a. Tin, Fisheries culture leh capture atangin avai belh khawm in fish farmers te chu 21,219 a ni a. Tin, Mizoram-ah hian kan fish mamawh zat chu kg. in hisap ni lovin central sorkar siam dan ah hian kum 2020 chhung in per capita consumption chu kg.11 zel a ni tur a ni a, tun 2016-2017 chhung in kan consumption chu kg 6.69 per capita a ni a, tunah a deficit na chu kg 4.31 per capita a ni a, hei hi a quintal ang ni lovin central sorkar-in per capita consumption angin a earmarked an set ta a.

Tin, member zahawm tak Er. Lalrinawma zawhna hi nikum kha chuan a percentage in kan chhut hran lo va, mahse tunah hian kan thar chhuah zat chu 7630 metric ton a ni a, mahse, Pu Speaker, a percentage ang tak chu ka chhut lova, ka chhang thei mai lo a ni. Ka lawm e.

**S P E A K E R** : Tunah chuan Starred Question No. 147-naah kan kal thei tawh e. A zawt turin MLA zahawm tak Er. Lalrinawma ilo sawm ang.

**Er. LALRINAWMA** : Pu Speaker, ka lawm e. Social Welfare changtu zahawm tak hnena ka Starred Question No. 147-na chu :-

- a) Mizoram chhungah ST (Scheduled Tribe) Girls Hostel engzatnge sak a nih? A District wise in engzatnge?
- b) Scheduled Tribe Girls Hostel sak te hi a pumpui thu ah cheng engzat man nge?
- c) He hnathawk tur hian contractor engzatnge rawih an nih?

**S P E A K E R** : Department changtu Minister zahawm tak Pu P.C. Lalthanliana chhang turin ilo sawm ang.

**Pu P.C. LALTHANLIANA, MINISTER** : Pu Speaker, member zahawm tak Er. Lalrinawma zawhna chhanna chu hetiang hian a ni.

- a) Mizoram chhungah hian Girls Hostel 13 nos. sak a ni tawh.  
District wise in-
  - a) Aizawl District - 7
  - b) Lunglei District - 2
  - c) Mamit District - 1

- d) Kolasib District - 1
- e) Sialha District - 1
- f) Serchhip District- 1

b) A pumpuini ` 41,47,19,000/- (Rupees forty one crore forty seven lakh nineteen thousand) only.

c) Contractor 1 (pakhat) North East Consultancy Services (NECS) rawih a ni tih kha ka chhanna a ni e.

**S P E A K E R** : Zawhbelhna Er. Lalrinawma.

**Er. LALRINAWMA** : Pu Speaker, ka lawm e. Ka zawhbelh duh chu (a) Engzat rate-in nge an thawh? (b) Bill payment hi eng ang in nge an kalpui tih a ni e.

**S P E A K E R** : Zawhbelhna dang a awm em? A awm loh chuan chhang turin Minister zahawm tak ilo sawm ang.

**Pu P.C. LALTHANLIANA, MINISTER** : Pu Speaker, zawhna neitu member zahawm tak in a zawhna chhanna chu hetiang Consultancy kan han rawih ang chi te anmahniin DPR an siam a, anmahniin an thawk leh mai thin tih te kha General Discussion-ah khan a sawi tawh a, ka ngai pawimawh a. Hemi chungchang ah a hriat ve hrim hrim atan Panel Board Chief Secretary hovin dt.19.7.2016 leh dt. 18.9.2016-a an meeting khan a Terms & Conditions an siam No. 4-ah khan DPR siam tu chuan a hna a thawk thei lovang tih kha a awm tawh a. Kha kha helaia General Discussion-ah khan kan sawi nual a, dt. 8.9.2016-ah khan Finance Department-in notification a chhuah a ni tih kha alo hriat hrim hrim ah tha ka ti a.

Tin, kan hnathawh atan hian kan Department chuan Technical Committee kan din a, tah chuan Engineer thiam te an awm a, kan Director kaihruaina hnuaiah khang ho khan Plan & Estimate te an en ve leh thin a ni. An thawhna rate hi chu a sanction lo kal ang ang kha a ni mai a, a sanction hi a inang lo nual a. Govt. K.M Higher Secondary School-a kan sak hi ` 366.30 lakhs in an thawk a. A rate kha chu SORPWD rate hman a ni. (Er. Lalrinawma : Engtik kum nge hman a nih?) A thar ber 2013 an neih hi a ni ang chu. Bill payment hi chu an sa a, an thawk a, khati khan Consultancy neiin bill kha an thehluat a, an draw mai a ni. Tunah hi chuan a lawmawm khawp a, kawng leh lamah financial achievement 50% a neih lai ten complete te a ni a. Tin, 50% te kan financial

achievement a nih mai loh a za a sawmnga sanction chauh a ni a, second instalment kan hmuh mai loh pawh hi an thawk zo tawh a, kan lo hawng lawk tawh a, chutiang chu Girls Hostel kan sak dan a kan dinhmun tlangpui chu a ni e. Ka lawm e.

**Er. LALRINAWMA** : Pu Speaker, zawhbelhna pakhat chauh ka'n nei leh lawk. Entirnan Department dang ah chuan measurement book te siam a ni a, kha kha accounting system fel taka kal in mi hrang hrang ten an lo check leh thin a, chutiang chu a awm ve lem lo nge anmahniin an DPR atang khan an thawk mai tih kha min han hrilhfiiah thei se a lawmawm ngawt ang.

**S P E A K E R** : Miniister khan han chhang leh se.

**Pu P.C. LALTHANLIANA, MINISTER** : Pu Speaker, Technical Committee kan din tih kha nichin khan ka sawi in ka hria a. Tunah chuan Technical Committee hi kan nei a, hei hian engkim a DPR an check a, MB bu ah bill hi tih thlap tur a ni a. Chutiang chuan Bill kha a kal a ni.

**S P E A K E R** : Awle, zawhna No. 148-naah kan kal thei ta a. Zawhna neitu Pu Lalthanliana MLA zahawm tak ilo sawm ang.

**Pu LALTHANLIANA** : Pu Speaker, ka lawm e. Fisheries Department changtu Minister zahawm tak chhan atan ka zawhna te chu :

- a) Tun kum thar turah hian sangha chi sem leh tum a ni em?
- b) Engtianga sem thin nge a nih, a criteria min hrilh thei em?
- c) District thlan bik an awm nge an awm chuang lo?
- d) Eng ang sangha chi te nge sem thin an nih?

**SPEAKER** : Department neitu Minister zahawm tak Pu B.D.Chakma ilo sawm ang.

**Pu B.D.CHAKMA, MINISTER:** Pu Speaker, member zahawm tak Pu Lalthanliana zawhna Starred Question No. 148-na chhanna chu :-

- a) Pawisa awm dan a zira sem tum a ni.
- b) District tina sangha dil zau dan a zirin sangha chi sem thin a ni @ 8000nos. of fingerlings per ha.
- c) District thlan bik an awm chuang lo.
- d) Indian Major Carp (Catla, Rohu, Mirgal) leh Common Carp, Grass Carp leh Silver Carp te sem thin a ni.

**S P E A K E R** : Zawh belhna a awm em? A awm loh chuan zawhna no. 149-naah kan kal thei e. Zawhna neitu Pu Lalruatkima, MLA zahawm tak ilo sawm ang.

**Pu LALRUATKIMA** : Pu Speaker ka lawm e. Ka Starred Question No. 149-na Health & Family Welfare Minister zahawm tak chhan atan ka zawt e.

**S P E A K E R** : Awle, zawhna neitu Pu Lal Thanzara, department changtu Minister zahawm tak chhang turin sawm ila.

**Pu LAL THANZARA, MINISTER** : Pu Speaker, member zahawm tak Pu Lalruatkima Starred Question No. 149-na chhanna chu – a) Upgradation of Tertiary Cancer Care Centre, Zemabawk, Aizawl atan sum 1<sup>st</sup> instalment ` 14.64 crore, Govt. of India atangin dt. 2.12.2015 khan hmuh a ni. Tin, state matching share- ` 162.62 lakh hmuh a ni tawh bawk.

b) Hnathawktu tur hian restricted tender dt.19.9.2016 ah chhuah a ni.

c) Contractor atan Pu R. Sangkhuma, Khatla, Aizawl thlan a ni a, a hna hming chu Construction Linear Accelerator Block, estimated cost chu `371,08,400/- a ni.

d) Tunah hian 5% physical progress neih mek a ni a, financial achievement a la awm lo a ni.

Pu Speaker, hemi chungchangah hian han sawi belh duh kan neih chu cancer tamna state kan ni tih hriain pawl hran hrante hian Mizoram-ah hian Cancer Hospital rawn din a hma rawn lak duhin kan Chief Minister zahawm tak hi an rawn approach thin a. Amaherawhchu, central atanga hetiangah hmalakna kan lo neih mek avang hian a-tu-a-mah hi kan la entertain chiah lova. Tin, tun hnaiah khan Nilya Chaya, NGO, Delhi lam ami ten, ‘ram min pek theih chuan Cancer Hospital kan rawn sak sak ang che u,’ tiin offer lehkha te kan hmu bawk a.

Tin, chumi piah lamah chuan Assam-ah hian TATA Trust hovin Assam sorkar nen tawngkawpa Cancer Care an kalpui dan anga Mizorama hmalak ve an duh thu an rawn sawi a. An tum ber chu phai pan ngai lova Mizoram chungng ngeia cancer vei ten treatment tha ber an lak ve theih nana hmalak a ni a. Chumi atan chuan district levela cancer hmuhchhuah hma a nih theih nan te,

thawktu leh hmanrua tihchangtlun tumte a ni a. Hei hi remchang a nih chuan anni hote nen pawh kan hotutute thutlukna azirin thawhho kan beisei bawk a ni.

Pu Speaker, nimin khan Delhi atangin...

**Pu LALRUATKIMA** : Pu Speaker, ka zawhna kha min chhang tho va, supplement question kan nei a, kha kha ei talh an tum thin a, kan Minister zahawm tak te hian

**S P E A K E R** : I rawn tibuai a, zawhna hun a tawp e. I tawp a ni ber mai.

Awle, hei vawiin chu kan kim tha thawkhat a. Pu Ngunlianchnunga, Minister zahawm tak leh Pu J.H. Rothuama te chu damlohna thil avangin an tel theilo a ni.

Nichina member zahawm tak Pu Lalruatkima han sawi ang khan vawiin hi 2015-a Zokhawthiang daia helho ten kan MLA pathum Pi Awmpuii te, Pu Pianmawia te, Pu Lalthanliana te leh kan officers leh staff te an lambun ni kha a ni a. Tah khan kan mihuaisen sipai pathumin nunna an chan a ni. Khamite kha kan hre reng a ni tih hria ila. Tin, kan MLA 3 te leh an thuihruaite thlabar taka awmte kha tun atang chuan thlamuang taka muanna tluantling leh hriselna tha an neih kan duh sak hle a ni.

Tunah chuan Laying of Papers –ah kan kal ang a. Pu Lalsawta, Minister zahawm takin paper lay tur pali a nei a, lay turin ilo sawm ang.

**Pu LALSAWTA, MINISTER** : Mr. Speaker Sir, with the recommendation of His Excellency, The Governor of Mizoram and with your permission I lay the following reports in respect of Govt. of Mizoram on the table of this august House –

- i) Report of the Comptroller and Auditor General of India on State Finances for the year ended 31<sup>st</sup> March, 2016
- ii) Finance Accounts 2015-16 Volume –I
- iii) Finance Accounts 2015-16 Volume –II
- iv) Appropriation Accounts 2015-16

Thank you Sir.

**S P E A K E R** : Awle, a copy kha sem ni se. Tunah chuan report present tur Pu R. Vanlalvena, Chairman, Subject Committee-III-in pathum a nei a, chungte chu present turin amah ilo sawm ang.

**Pu R. VANLALVENA** : Pu Speaker, ka lawm e. Subject Committee-III Chairman ka nihna angin kan member te chungah lawmthu ka sawi duh a. Tun hi kan term tawp a ni tawh a, (kum khat chhung kan term) kan member MLA zahawm tak tak Pu R.L. Pianmawia, Dr. Ngurdingliana, Pu Lalthanliana, Dr. K. Beichhua leh Pu Chalrosanga Ralte te an ni a. An taima em em a, anni nena tha taka kan thawhho thin avangin kan term chhungin main paper 7 lai kan present thei a, an chungah lawmthu ka sawi hmasa a ni.

Pu Speaker, paper pathum present nghal ila – Pakhatnaah chuan Eleventh Report Relating to RSBY under Health & Family Welfare Department hnuai leh Twelfth Report Horticulture hnuai mi (HMNEH)/Mission for Integrated development of Horticulture leh Thirteenth Report Horticulture Department hnuai ami tho RKVY Stream - 1 and National Vegetable Initiative for Urban Clusters”, chungchang chu he House ah hian ka rawn present e, ka lawm e.

**S P E A K E R** : A copy kha sem leh ni se. Tunah chuan Financial Business-ah kan kal thei tawh a. Vawiin-ah kan Ministers Pu R.Romawia leh Pu Lal Thanzara te Demand kan la dawn a ni. Tunah hian Pu R.Romawia, Minister-in a Demand no.6,12,21,23, te House-ah rawn submit sela, i lo sawm ang.

**Pu R.ROMAWIA,MINISTER** : Pu Speaker, ka lawm e. On the recommendation of the Governor of Mizoram and with your permission sir, I move the Demand nos.6,12,21,23 for rupees 2,32,16,53,000/- only for meeting expenses during 2017-2018 in respect of the following Departments.

No.6 Land Revenue & Settlement	31,85,18,000
No.12 Parliamentary Affairs	58,75,000
No.21 Higher & Tech. Edn.	1,90,44,88,000
No.23 Art & Culture Deptt.	9,27,72,000
Total:	2,23,16,53,000

Ka lawm e.

**S P E A K E R** : Awle, tunah chuan Pu Lal Thanzara, Minister-in a Demand Nos.24,26,48 te House-ah hian han submit sela.

**Pu LAL THANZARA, MINISTER** : Mr Speaker sir, on the recommendation of the Governor of Mizoram and with your permission sir, I move the demand nos.24,26,48 for rupees 4,94,90,42,000 only for meeting expenses during 2017-2018 in respect of the following Departments.

No.24 Medical & Public Health 4,62,22,01,000

No.26 Information & Public Relation 14,36,25,000

No.48 Information & Communication Tech. 18,32,16,000

Total : 4,94,90,42,000

Thank you sir.

**S P E A K E R** : Awle, kan Minister te pahnih in an Department hrang hrang te he House-a ngaihtuah atan an thelut ta a. A sawiho kan tan leh ang a, minutes 10 bawk kha kan hun inpek dan ni se. Tin, hun hi chuh tum ila a hnuhnung nih tum lo ila, hun hi pawisa a ni tih hre reng ila. Pu K.Sangthuama ilo sawm ang.

**Pu K.SANGTHUAMA** : Pu Speaker, ka lawm e. Mibo chungchangah chhuah lawk ka duh a, min ken avangin ka lawm e.

Demand no.6-na Land Revenue & Settlement kha sawi hmasak ka duh a. Luangmual khu restricted area tiin Complex leh a bawr vel leh khu lam khu sorkar hian restricted area a ti a, hei hi an restrict na awm kha office lamah kan han zawng a, kan hmu zo si lova, hei hi enge a chhan aw? Minister-in a la rawn sawifiah turah ngai ila. Gazette-ah kan hmu zo lova; tin, a lehkha hrim hrim pawh kha kan hmu zo lova, hei hi lo chhinchhiah se a thain ka ring a ni.

Tin, khulai hmunah khuan Government Employee Federation Quarter hi company lam sak tir tum niin kan lo hria a. Hei hi enganga sak tur nge? Eng company in nge sa dawn? Lo sa zo ta se Mizoram sorkar ta tur nge ni ang a, tu ta tur nge tih te kha kan Minister-in min hrilhiah se ka duh a.

Tin, Government Complex-ah khuan Property Tax chhungkaw 378 in an pe a. Tin, Ration card-ah 500 vel an awm tawh a. Amarawhchu, inhmun pass pangngai nei an awm bar lova, sawmhnih khat te chu an awm mai thei a. Helai

hi kan Chiang Chiah thei lova, khuti lai khu session apiangin ka sawi a, ngaihsak se a tha khawpin ka hria a. Tunah khuan Property Tax an khawn ah chuan in 378 an ni a. In hmun pass pawh nei lo in sa si hetia an awm ringawt hi sorkarin ngaihsaka tihngheh sak an tha khawpin ka hria. Tam tak te phei chu kum 20 hmalam ami te an ni a, restricted area a ni an lo tih pawhin heng hi phelh sak mai a, sorkar hian an nihna ang hian kalpui mai sela kan hlawk zawkin ka ring a ni. Inhnawt chhuak dawn pawh ni ila in hnawhchhuah theih pawh a rinawm lova. Chuvangin hei hi min ngaihpawimawh sak turin ka ngen nawn leh duh a ni. Ka bial a nih avanga han sawi hluai pawh ka ni lo, mihring hian in leh lo kan neihna ah chuan kan lo nghet a, nuam pawh kan ti zel a ni. Chuvangin kum hnih khat mai an awmna a ni lova, a tlangpuiin PC Ministry hun laia Sihpui min-in a tichhiat atangin tam tak sawn an ni a. Inhmun pass pawh nei mumal lovin vawiin thleng hian an la awm mai hi a dik chiah in ka hre lova.

Chuvangin kan Revenue Minister leh kan House Leader hian ngaihtuahna tak tak lo seng sela tih hi ka han ngen duh a. Chubakah a then an patta thei si a, a then patta theih lo kha a dik chiahin ka hre lova. Ka hriat dan chuan, dik turah ka ngai a, hmanni lawk khan patta a awm an ti a, a hming kha chu ka han ziak ta lo a. Chutiang te a nih phei chuan awm zawng zawng khu patta zel mai ula, keini opposition pawhin a tha kan tih kha chuan, nangni tan chuan sawisel tu an awm nang! Pe mai ula kei chuan thain ka hria, mi 400/500 dawn lai in sa ve si, pass pawh nei si lo, chu chu ka sawi atang chuan ngaihtuahna in hman theih mai ka ring a. Nakum session leh March thla ah chuan, 'patta kan pe ta,' tih kha lo ngaithla ila a thain ka ring. Chu chu vawiin hian ka han ngen duh a ni. Kha kha Land Revenue-ah chuan sawi ta mai ila, a dangah chuan kai ta lo mai ila, member dang ten an rawn sawi tho turah ngai ta ila.

Demand no.21-na, Higher & Technical Education department-ah hian tlem han sawi leh ila. Pu Dy. Speaker, zirna hi a pawimawh em em a, kan College te hi College tha zawka kan din theih nan, tunlai chu mithiam tam tak an lo chhuak a, naupang leh a zir peih peih, thiam tak tak te an lo chhuak zel a. Tun hma in kan mi rawih te an thiamlo tihna ni lovin, Higher Secondary hi College luhna tlak lehzuol, tun aia tha lehzuola kan tih theih nan, kan mithiam lo chhuak thar ten hna an neih theih nan leh, heng Assistant Professor te hi tun aia lak tam theihna sum pawh hi dah tam ta ila. Zirna



hi college a that a ngai a, a hnuailam a that a ngai ang tho vin College hi a that a lo ngai a, chuvangin zirtirtu tur te hi tun aia tam zawk, indaih zawk, changtlung kan neih zawk theih nan kan Minister hian ngaihtuahna rawn seng ta se tih hi ka'n sawi tel duh bawk a ni.

Demand no.24-na, Medical & Public Health Minister zahawm tak Pu Lal Thanzara chan ah hian tlem han sawi leh ta ila. Heti lai ah hian a ziahna hran a awm a, ka'n hmu ta mai lova, eng zawk hi nge pawm tur? Engpawhnise, kan damdawi in ah hian X-ray film hi duh anga hman tur a awm lo deuh in an sawi a, ka han kal chiah lo nangin, mahse min hrilhtu ten X-ray film hi mi rethei zual tam tak hian an chang lova, tlema awm thei deuh chuan hmun dangah pawh an ti thei deuh vek a. Chuvangin X-ray film hi duh anga hman tur a awmlah avangin rawn sawi teh an ti a. A hmunah ka han fiah lo na in, thudik ah ka ngai a. Kan Minister zahawm tak hian lo enpui se, mirethei tam tak kan awm a, X-ray nana pawisa 200,300 han chawi mai pawh harsa tam tak kan awm a, chuvang chuan X-ray film hi tam zawk neih dan emaw, demand dan emaw ngaihtuah turin ka han ngen duh bawk a ni.

Tin, hmanni ah an sawi tawh bawk a, dialysis, kal thuahfaina te hi a pawimawh em em a, hei hi rilru berah lo neih bawk se tha in ka hria a, Pu Dy. Speaker, minute khat emaw lek. Kal thalo hi Mizoramah hian kan tam em em a, kan tam tulh tulh mai a, hmun hla pan theilo tam tak kan awm a. Tin, hmun hla pan kher lova, he laia a awm that phawt chuan, phai hla zawk pan ngai lova tih theihna a nih ve avangin, he lai ah hian dialysis tih theihna turin tun aia changtlung zawka buatsaih dan hi ngaihtuah ni ta se a that ka ring a, ka han sawi ve leh a ni.

Tin, Health Care hi chu kan sawi zing tawh a, Health Care nena in kaihnhawih RSBY-a Sairang ka biala rul chuk, a enkawlina pawisa an pek ve theihloh kha engnge kal ta zel aw ka ti a. Nikum lamah khan he laiah hian member zahawm tak Er. Lalrinawma khan a rawn sawi tawh a, zu rim a nam avangin pek theih a ni lo ve an ti a, an test-naa a lan avangin, amah kha zu in mi a ni lova, damdawi atan a tha e an ti a, an in tir mai kha a ni a, mahse bill theih in an ruahman sak ta lova. Mirethei tak mai an ni a, kha kha kan Minister zahawm tak hian vawiinah min chhang thei lo a nih pawhin lo zawt chiang sela, khatiang kawngah khan a chhan leh avang dik tak kha nakin ah pawh kan la inhrilh thei turah ngai ta ila, kha kha ka han sawi ve leh duh a.

Falkawn lam hi tlem han sawi leh ta ila. Medical College hi kan mamawh em em a, doctor leh nurse te pawh an tam tawh loh chuan kha lamah khan kan sum neih te pawh hmang tam ta deuh ila, saw laiah sawn doctor tha kan dah a nih phawt chuan nitina inentir 400 tling lo pawh hi an tlin thuai ka ring a. Kan indaihlo a nih pawhin helamah hian Pu Dy. Speaker, kan hotute hian pawisa ren lo sela. Medical College hi kan neih thuai a ngai a, phai lama sum tam tak kan zu senna tur ang chi te, mi rethei zawk in phai lam kan pan theih lohna kawngah te, he laia doctor thiam zawk, indaih zawk kan nei a nih phawt chuan, chu chu hre reengin Falkawn Medical College din kan tum pawh hi kan tih thuai thuai theih nan doctor leh nurse te a tul ang anga tam zawk la tur hian inthlahrung lo se tih hi vawiih hian ka han sawi duh a ni e. Pu Dy. Speaker, chu chu ka sawi thei tawh ni mai sela, ka lawm e.

**DY. SPEAKER**

: Awle, Pu Chalrosanga.

**Pu CHALROSANGA RALTE**

: Pu Dy. Speaker, ka lawm e. Demand no

6-na Land & Revenue Minister Pu R. Romawia demand ah hian. Ani hi a office-ah ka kal zing a, Revenue chungchanga bial mipui te ka han hmuh pui te hian kawm hi a nuam a, kan va luh hi chuan a history thleng min hrilh thin a, a chungah hian kan lawm tak meuh a ni. Duh aia rei rei hi kan thu thin a, Land & Revenue Department hi enkawl hautak ber a nih ka ring a, mipui in kan mamawh kan in hmun, kan ram leh kan lo neihna min enkawl saktu department te an ni a, a buaithlak khawpin ka ring a. Amaherawhchu a hnuaia thawktute hi an taima a, District hrang hrang ah, Lunglei District a ni emaw, Kolasib district a ni emaw, an settlement officer te han biak a, kan harsatna kan han sawipui te hian hma tha takin min lakpui thin a, an fakawm tak zet a ni. Pu Dy. Speaker, chuta ka sawi duh leh pakhat chu, ram buai leh LSC inthuah tih te hi a tam em em mai a, hetiang ngaihtuah tur ringawt pawh hian officer engzat chiah nge an dah tih ka hre chiah lova. Chuvangin hetiang ngaihtuah tur hian Revenue hian Tribunal te hi han nei thei se a tha lawm ni tih na rilru ka nei a. Hei hi a din thuai chuan mipuite pawhin kan harsatna, rama kan harsatna thubuai chi hrang hrang kha awlsam te in min lo rem sak mai turah kan ngai a.

Rambuai sawi takah chuan sawi tawh ang khan LSC inthuah tih hi a tam em em mai a. Heng avang hian ka lo ngaih ve danah chuan ram pum hi survey that a, session hmasa zawka ka lo sawi tawh ang khan state dang ten an tih ang deuha Records

of Right kan tih, kan hotuten an lo zirchian tawh te hi hman theih dan a awm lawm maw ni le tih hi ka sawi duh a. Tunah chuan kan hriat ang in ram pass hi chi hrang hrang 8 lai a awm a ni. Chuvang chuan khatiang kha a awm tawh lo vang a, awlsam te in ram in leisak emaw, in pek a tul a nih pawhin awlsam te in hma kan la chho tawh mai turah ka ngai a. Chutiang te chu kan hotute hian a rang lamin min ngaihtuah sak theih chuan a lawmawm viau in ka ring a.

Revenue chungchangah a tawp ber atan chuan Surveyor kan indaihlo lutuk hi a hrehawm khawp mai. In hmun teh alo ngai a, kan va kal a. Thil dangah chuan, a procedure-ah chuan kan kal zung zung a. Amaherawhchu a tehtu tur kan indaihlo lutuk hi a manganthlak thin a. Chuvang chuan helai pawh hi kan Minister te hian hma min lak sak thei ang em tih ka rawn ngen a ni.

Demand no.21 Higher & Technical-ah hian han lut zawk ila. Pu Dy.Speaker, Lunglei District-ah sawn zirlai thahnem tak kan nei a, kan buaina pakhat chu Commerce stream a ni a. Lunglei Govt. College-ah sawn Commerce a awm a, a dangah a awm lo va, JB College-ah te. Lungleia MZP hruaitute pawh hian kan Minister hnenah pawh hian an rawn thlen tawh thinin ka hria a. Sawlai JB College-ah sawn Commerce Department hi a rang lamin min hawn belh sak thei ang em le tiin kan Minister zahawm tak hi ka rawn ngen duh a ni.

Tin, Lunglei Govt. College-ah sawn Hostel tha tak tak min sak sak tawh a. Amaherawhchu hei hi la luah loh a niin ka hria a. Hei pawh hi engtingge hma min lo lak sak thei ang em tih hi ka sawi duh a. Tin, kan Minister zahawm tak chungah leh kan House Leader chungah lawmthu kan sawi leh duh chu, Lunglei Govt. College-ah sawn tunah hian auditorium leh annexe building changtlung tak an sa mek a, vaibelchhe 4 man lai a ni a. Hei hi an sak zawh hunah chuan thil tha, ro tling zirlai ten an nei dawn a. Chuvangin an chungah hian lawmthu ka sawi tak meuh a ni.

Pu Dy.Speaker, tunah chuan Medical & Public Health, Demand no.24-na ah hian lut ila. Sawi tur a tam a, kan Minister hmalakna hi sawi dawn chuan minute 10 lekah hi chuan kan sawi zo hman dawn lo tih a chiang a. Chuvangin tawi te te-a han sawi kan duh chu Lunglei Bazaar Veng-ah te, Lunglei Rahsi Veng-ah te Sub-Centre tha tak min sak sak a. Tin, hmanni lawkah December-ah khan a niin ka hria Sazaikawn-ah Urban Public Health Centre min rawn hawn sak a. Saw te saw hmanni bial kan fan te

pawhin bial mipui te leh Lunglei mipui ten, (kan bial chauh pawh ni lovin Lunglei mipui te pawh sawn) an hmang tangkai tawh a. Hei hi kan Health Minister pawhin a lo hriat ve atan kan duh chu an hmang tangkai tawh a, sawlai hmuna min rawn dah sak saw Lunglei aiawh pawhin, bial mipui aiawh pawhin a chungah hian lawmthu ka sawi duh a ni.

Referral Hospital leh khatiang te kha chu sawi a ngai tawh lovin ka hria a. An hmalakna tuna College kan din theih na tura a hmalakna te hi a ropui ka ti a. Chumi piah lamah chuan kan sawi duh chu, kan Minister hian district hrang hranga District Hospital te tichangtlung tura a hmalakna hi a ropui ka ti a. Hetiang Minister kan nei hi a lawmawm ka ti a. Ram hian hetiang Minister hi kan mamawh a. Tunah hian district hrang hrangah CT Scan te, X-Ray machine te, Aizawl District-ah te pawh MIR tih thleng te pawh khan a sawi khan ka hria a hmannah khan, ka hriatsual loh chuan. Hetiang te kan nei chho thei zel a nih chuan Lunglei te, Kolasib te, Champhai te, kan District Hospital te a lo changtlung ve zel a nih chuan Aizawl te pawh rawn pan ngai tawh lovin, rawn kal kher ngai tawh lovin mipui tan, sum leh paiah te pawh a awlsam zawk dawn a ni. Chuvang chuan kan Health Minister chungah hian lawmthu sawi tur tam tak a awm a. Nichinah khan kan senior member zahawm tak Pu Sangthuama khan a rawn sawi a. A thahnemngaihna te, sawlai Referral Hospital-a doctor leh nurse kan mamawh zia te kha a rawn sawi a, a lawmawm khawp mai. Hei, tunah doctor lak belh tur te a awm tawh a. Kan lak belh dawn te a rawn ti a. Hei hi thingtlang bialtu tan chuan a nghahhlelawm tawh khawp mai a. Hei hi Finance lam te leh kan hotute hian chak takin hma min lak sak se. Hetiang doctor tha tak tak mai te hi min lak belh sak thuai thuai se a va lawmawm dawn em tih ka sawi duh bawka a ni.

Demand no.48-na ICT hi tawi te sawi ka duh bawka a. ICT Department hi department langsar em em si lovah chuan pawimawh ve tak mai a ni a. Vawiin kan khawvelah chuan changkanna, paperless document te kan ti a, E-governance te kan ti a, hetiangah hian hma nasa takin an la chho a. Tunah pawh hian ka hriatsual loh chuan hmanni khan award te an dawng niin ka hria a. Pu Dy.Speaker, i phalna in NEGD Scot Digital India Champion Award, 2016 hi Dr. Lalthlamuana, Chief Informatic Officer khan a zuk dawng a ni. Khatiang khan hma an han la chho a, a lawmawm ka ti a. An hmalakna chi hrang hrang Online Banking, Online Electric Bill Payment te, Disaster Management Application tih te, Mizoram E-Governance Enterprise & Framework tih te,

Chief Minister Online tih te hi Pu Dy.Speaker, Zoram mipuite tan hetiang an rawn chhawpchuak te hi a lawmawm tak zet a ni.

Tin, a tawp ber atan chuan I&PR, Demand no.26-na hi tawi te han sawi ka duh a. I&PR Department te hi Zoram mipuiin kan sorkar hmalakna te, thil ro tling kan pek na te information kan pek chhuahna a ni a, a pawimawh khawp mai a. Helaiiah hian kan Minister hian chak takin a enkawl chho a. Department-in kan hmalakna te, sorkar-in kan hmalakna te puanzarnaah chak taka hma an la hi lawmawm ka ti a. Chutah chuan thil han belh lawk ka duh chu I&PR Departmentah hian Mizoram Journalist Welfare Fund tih hi an rawn dah a. Hei hi a lawmawm ka ti khawp mai a. Kan Journalist te tana hamthatna ti mai ang, natna khirh tak tak te leh ex-gratia kan tih, Accredited Journalist te tan ralna an han dah te hi a lawmawm a, a ropui ka ti a. Hetianga hma la thei tu Minister kan nei hi Zoram mipui hi kan va vannei em tih hi vawiinah hian ka sawi duh a. Chuvang chuan Pu R.Romawia Minister zahawm tak demand nos. 6,12,,21,23 leh Pu Lal Thanzara, Minister zahawm tak demand nos. 24,26,48 te hi he House hian pass pui ngei turin ka rawn thlawp e, ka lawm e.

**DEPUTY SPEAKER** : Tunge han sawi leh ang le? Tunge han sawi leh ang? A ding lai hi hun i hmang zo kan ti a kan innawr thu a, in sawm leh nan hun tam tak kan hmang leh thin hi a fel lo a ni. Aw, Er. Lalrinawma.

**Er. LALRINAWMA** : Pu Deputy Speaker, ka lawm e. Vawiinah demand kan sawi leh dawn a ni a, Minister zahawm tak Pu Lal Thanzara leh Pu Romawia te demand kan sawiho leh dawn a, a lawmawm hle in ka hria a ni.

A hmasa bera ka'n sawi duh chu demand no. 24-na Medical & Public Health-ah hian han lut phawt mai ila, hetah hian sawi tur tam tak a awm in ka hria a. A hmasaa ka'n sawi duh chu RSBY chungchang hi mipui ten kan tangkaipui em avangin han sawi zau ka'n duh a, sawi tur tam tak karah. Tichuan he RSBY hi nasa takin Mizoram mipui ten kan chhawr tangkai a, thingtlang lam bialtu te tan pheii chuan a hlu leh zual em em a, kan miten an rawn hmang a. Damlo kan kan reng reng pawh hian, 'i smart card a fel em,' tih hi kan in zawhna hmasa tlangpui a ni a, a lawmawm ka ti a.

Tin, tuna Subject Committee-III leh kan Minister te hmalakna te pawh a ni ang a, heng hi lawmawm tak nia ka'n hriatna chu hmanni ni 21-a Starred

Question 62-na ah khan Empanelled Damdawiin te hnena leiba awmzat kha ka zawt a, 2014-2015-ah nuai 30 vel bawr awmin, 2015-2016-ah nuai 31 vel bawr a awm a, 2016-2017-ah erawh chuan a guideline angin kan lo pe thei tawh a 'Nil' an ti a, hengte hi a lawmawm hle in ka hria a. Hei hi helama hma la tu te chungah pawh lawmthu han sawi tak meuh meuh ka duh a. A chhan chu hemi leiba tam lutuk avang hian harsatna, a bik takin thingtlang miharsa te te ten kan tawh a. Nikum lam pawh khan harsatna tawh a ni a. Tunah phei chuan a zia deuh tawh chu an ti a, tukin zingah te ka han zawt kual a.

Durtlang damdawiin te pawh khian leiba a tam avang avang khan RSBY hmang zawng zawng, beneficiaries zawng zawng pawh kha an lo ti hleithei lo a, nikum phei chuan 20% chauh kha an lo ti a ni. Tunah phei chuan leiba a lo tlem tak a, hetiang chak zawka hma kan lo lak theih tak avangin pawisa hmuh te pawh a lo tha a, a kal te pawh a lo mar sawt tawh a ni tih kha heta tang hian a lang a, kha kha a hmasa in a changtu Minister zahawm tak leh Subject Committee-III, hemi chungchanga nasa taka bawhzuitu te chungah leh a thawktu te chungah pawh lawmthu ka'n sawi duh a ni.

Tin, thahnem kan ngai ta sa sa bawk a, hei hi RSBY tender document a ni a, kan hriat angin vawiin ah pawh House-ah khami chungchang kha chu an rawn lay tawh a, public property a ni tawh a ni. He tender document ah hian item hi package hrang hrang 1,516 tender chhuah lai hian a awm a. Amaherawhchu agreement copy kan thlir hi chuan item 1,091 chauh agreement kha sign hnan a ni a. Helai hi han sawi zui deuh ka duh a, a chhan chu hetia damlo te an rawn kal a, an item a awm loh hian dan ang chuan heta empanelled te nen insurance te nen sawiho a tih luh leh theih tho kha chu a ni. Amaherawhchu thingtlang atangin damlo mangang kan rawn lut thla tawh a, smart card nen an va in report a, khatah khan an item a lo awm loh kha chuan a buaithlak a, nakina sawifel theih nimahse khatia an natna ngei, natna chi hrang hrang 1,516 zinga kan lo tel kha chuan thil kha a fel em em dawn a ni a, item 400 velin a inmil lo a. Agreement hi kan extend kan extend a, kum 2014-2015-a an chhan bak kha chu kan extend chho zel a, kumin ah pawh kan extend leh in a rinawm a. Khatiang a nih chuan kan extend lai khan he item 1,516, hemi item document

a kan chhuah ang ngei hian agreement copy ah hian min lo thil tel sak thei se tih kha kan Minister zahawm tak pawh hi vawiin hian ka'n ngen duh a. A nih loh chuan hetah a lo thu ten 'i natna hi a tel lo e' an lo tih khan sawi kual leh chhung khan keini thingtlang lampang mite tan pheii chuan pawisa hman a lo ngai a, kha khan harsatna min thlen thei a ni. Sawi ngai lova a nih rual ruala luh ve chat chat mai kha kan duh a ni tih ka sawi duh a.

Tin, kan Health Care te leh RSBY te hi kan han inzawm tir a, hei hi a buaithlak angreng khawp mai a. Health Care-ah hian critical illness natna a lo tlem deuh bawk si a. Tin, private damdawiin thenkhat ah te he Health Care Scheme lo zawm lo an lo awm bawk si a, heng harsatna te pawh hi a awm ve nek nek a. Chuvangin helai hi Mizoram atanga an zawm deuh mai nia hriatna ka nei a. Chuvang chuan hei hi chu zawm loh dan te pawh a awm lawm ni? Entirnan private damdawiin lian deuh ten RSBY an duh loh deuh pawhin Health Care-a va luh theih mai dan te kha awm thei se chuan a lawmawm hle ang tih ka ring a.

Tin, Finance demand sawi ni khan kan sawi tawh a, Health Care-a kan rate hlui lutuk kha vawiin ah pawh hian ka sawi leh dawn, a mangan thlak em em a ni. Chuvangin kan Minister zahawm tak pawhin he rate hi chu khawngaihtakin ennawn turin min lo chhawpchhuah sak thei sela. Tin, corpus fund pawh kha tihpun mai theih niin a lang a ni, tunah pheii chuan state-in financial power sang zawk a lo nei a, NEDP-ah pawh kumin ah ringawt vaibelchhe 750 kan dah thei a ni a. Chuvang chuan khang ang chi kha han dahbelh a, heng rate te hi revise a lo nih chuan thingtlang mi te tan pawh, khawpui mi te tan pawh, mirethei harsa zawk tan rah tha a lo chhuah leh zawk dawn a ni tih ka'n sawi duh a.

Tin MR Bill chungchang pawh hi a rate hi siamfel a tha khawpin ka hria. A rate hi kan neilo ni tur a ni, tihian a dinhmun harsa leh chau zawk ten rate man tlawm em em kum 2008 rate kan hman tir laiin, dawmdawiin rate apiang kan lo hman tir mai niawm in a lang a. Hengte pawh hi a rate siamtu Health deparment lam an nih hmel a, hei hi chu min lo ngaihtuahsak sela a kal mar zawk nan tih kha ka'n sawi duh a ni.

Tin, nurse chungchang hi, Civil Hospital hi ka kal ngun angreng khawp mai a, an indaih lo em em a, an khawngaihthlak dan chu turu tak a ni.

Chuvangin kan Health Minister zahawm tak khan nichin lawk khan Aizawl Civil Hospital atanga Referral-a nurse an sawn phei avang khan buaina lutuk awm lo ang deuh khan a sawiin ka hria a. Engpawhnise hei hi min lo ennawn sak leh sela, nurse ho saw an hah a ni, a bik takin Aizawl Civil Hospital saw. A chhan chu an leave neih ang te pawh hi la mumal hlei thei lo te in an awm a, han biak rei te phei chuan an lung te pawh saw a chhia emaw ni chu aw ka ti deuh thin a. Chuvangin nurse lakbelh dan te hi ngaihtuah ni sela. Doctor chu an lo kal a, nurse ho kha chu damlo min awmtu, engkim mai damdawi zawng zawng min petu an nih avang khan an hah ropui si a. Chuvang chuan lakbelh dan te, tun aia indaih zawka kan neih dan tur ngaihtuah a tul hle a. A chhan chu mipuite hian nurse te lakah kan beisei a lo sang a, leh lamah kan lo vui awl lo thei bik lo a, mahni damdawiin tiin.

Tin, Civil Hospital leh Referral te pawh mipui in kan beisei sang bik a, sorkar damdawiin a ni kan ti a. Entirnan khawilai kohhran damdawiin-ah te emaw kan boral chuan kan rilru pawh a dang deuh niin a lang a. Civil Hospital-ah te, sorkar damdawiin ah te kan boral chuan vui vaina hi a chhuak awl em em mai a. Chung vui vaina tibo tur chuan nurse te pawh chak zawk leh indaih zawka kan siam theih kha a tha mang e aw tih ka rilru ah a awm a. Engpawhnise kha kha Health Department lama ka sawi theih ni phawt se.

Information & Communication Technology lam hi han sawi ve zawk ka duh a, hei hi thil pawimawh tak niin ka hria a. Department hrang hrang hian tun hunah hian computerization te kan ti a, Civil Hospital-ah ngei pawh khan kan ti a. Nikum lawkah khan Computerised Hospital Management Information System tih kha kan lo ti a, kan hre vek awm e. March 2016-ah khan Committee in paper hi he House-ah ngei a lo pharh tawh a. Hei hi public property a lo ni tawh a, duh duh in kan hre vek thei tawh a, kan en vek thei tawh a ni. Tahchuan chiangkhang takin a awm a, heta an Clause 1.14-ah hian kha computerization chungchang ah khan completion certificate kha an lo pe ve ringawt mai a ni, a thiam lo te khan zo bawk si lo khan, kan buai kan buai mai a. Chuvangin hetiang kan hna thiam loh pui enkawl kan tum talh te pawh hi thil buaithlak a nih avangin, heti laiah Department fel tak hetiang technology chungchang hre tur



awm kha kan lo nei reng tho bawk si a, in rawn tawn te hi a theih em aw tih kha ka'n sawi duh a. Chutiang a nih loh chuan mahni thiam loh hna kan enkawl khan completion certificate pawh kan lo pe thei e, pawisa pawh kan lo pe thei e.

A pawimawh ber zawk chu mipuite tana chhawp chhuah a lo nih dawn khan buaina a lo thleng thei thin a ni. Chuvangin department dang dang te pawh in computerization te pawh kan ti zel ang. Mahse he deparment hi kan hmang tangkai a, a thiam te awm khawmna a nih avangin he lamah hian ke kan pen leh zual a tha awm mang e aw tih ka sawi duh a. (Dy. Speaker : I hun a tawp a) Pu Dy. Speaker, tlem te, sawi tur a tam si a, kan in hnawn deuh tho bawk si a, min lo hrethiam hram teh.

A dawt leh a ka sawi duh chu Information & Communication Technology hnuaiah hian the Government of Mizoram (allocation af Business Rules) angin Adhaar Card chungchang UID kha, a sawi theih tho niin ka hria a, UID chungchang hi eng ang in nge an rawn kal pui tih hi kan enchhian a tha awm mang e aw tih hi ka rilru ah awm deuh a. A chhan chu a siam man hi a inang lo nuaih mai a, thingtlang hmun thenkhat ah a hminga MLA te kan lo nih ve avangin phone te kan han dawng a, a man leh mual hi a inang lo a ni. A then ah ` 50, a then ah ` 100, a khaw hla deuh ah a man leh mual kha a hrang nuaih mai a. Entirnan mi pakhat ah ` 100 pawh lo la teh reng se, mi pakhat ah ` 100 zel a nih chuan chhungkaw nga ah chuan ` 500 te a ni mai a. A rate leh helai vel bithliah hi en fel a tha mang e aw tih kha ka rilru ah a awm a. He ka demand sawi mek Business Allocation tawp lamah khan UID chungchang an rawn dah ve avangin kan sawi tel a ni a.

Tin, central scheme lam te tun hunah hian kan han uar chho viau zel a, Housing for All lamah te pawh kan han thut khawmna ah chuan Adhaar Card neilo chu pek loh tur a ni tih te pawh a awm a. Amaherawhchu vawiin chanchinbu ah khan Supreme Court-in heng central scheme-ah chuan Adhaar Card neih kher kha a lo phut lemlo a nih tih te kha kan han hmu leh a. Engpawhnise helai hi chu hrilhfiahna mumal a ram mipuite thlamuan nan hian kan ngaihtuah a va tha awm em tih ka rilruah awm a. Kha kha a deparment chan bik ah chuan ka sawi theih ni ta se.

A dawt leh ah chuan Art & Culture lamah hian kan lut daih teh ang. Nikum khan Art & Culture demand kan sawi tum khan keimahni Mizo hnam hla ho kha a thluk te nen a bo mai ang tih kan hlauhthawn thu kha kan sawi a, kan Minister zahawm tak

khan hma la tur ang deuh khan a sawi a, kha te kha eng angin nge hma an lak tawh? Heng keimahni Mizo thil te hi a hlu em em si a. Heng kan culture leh kan nih phung leh kan hnam dan te kan tihbo chuan Mizo pawh hi kan nung khaw chhuak rei kher lo ang tih a hriat theih a. Mizo hi chuan keimahni Mizo nun hi kan lo hlmpui ber mai, kan lo ngeih ber mai a niang ka ti thin. Chhriat that han tawh te reng reng pawhin keimahni Mizo society-in kan lo tih phung entirnan khawhar in riah tih te, thlan laih tih zawng zawng te pawh hi hmanlai kan pi leh pu te atanga kan lo chhawm a ni a. Kan mangan ni ah pawh min tithlamuang ber tu a ni zel a. Vawiiin ah pawh kan member zahawm tak te pawh mibo zawngin an kal a, khatiang ni ah pawh khan keimahni Mizo tlawmngaihna kha lo langin tui tla ni se kan kal hum hum zel bawk a. Mizo te hian keimahni hnam nun leh nih phung hi kan lo mawi pui in kan lo thlamuan pui ber a nih avangin Art & Culture hian heng Mizo nun ze mawi te leh hetiang thil hrang hranga hma a lak tawh na ah te lawmthu sawi chungin hma han la uar zual leh se a tha hle ang tih kha ka ring a.

Pu Dy. Speaker, a tawp nan tak tak Higher & Education Department bik ah hian kan sawi duh chu education loan chungchang hi a ni. A hmingin thingtlang lam bial kan lo ni a, zawhna kan dawng nasa em em a, heng ah te pawh hian education loan te pawh hi chak leh zual zawka hma kan lak a, thingtlang ah talent tha tak tak dinhmun harsa si te pawh kha an awm teuh a ni. Heng ang loan atanga lo din khaw chhuah tum te, amaherawhchu thil kalphung hriat loh vang te pawh a ni ang, a dan ah te harsatna neuh neuh kan tawk thin in ka hria a. Hei hi tun aia sam khai leh zual zawk nan bank hrang hrang te pawh dawr a, dinhmun harsa zawk ten an lak theih dan tur te pawh kha ruahmanna awm thei se a lawmawm khawp ang tih ka ring a ni. Ka duh tawk dawn tawh mai ang, sawi tur chu ka la ngah mai. ( Dy. Speaker : I pel thui tawh khawp mai ) Ka lawm e.

**DY. SPEAKER** : Le, Pu R. Vanlalvena.

**Pu R. VANLALVENA** : Pu Dy. Speaker, ka lawm e. Kan demand sawi tur hi a tam tham a, amaherawhchu kan hun a tam lo a, chuvangin midang an lut tho a, luh thui teh vak ka tum lo a. A tlangpui thuk thuk in sawi ka tum dawn a ni hun reilo te ka neih chung hian. A hmasa ber ah chuan demand no. 6-na Land Revenue & Settlement Department-ah hian thil pahnih khat lek thawktu te indaih lo zia kan ngaithla tawh a, anmahni surveyor ten hreawm an tih leh an sawi ve fo thin chu motor kan neilo a an ti a,

an mamawh khawp in ka hria. Entirnan ram teh tur in, ram buai teh turin kan sawm chhuak a, a inkhing te zinga tu emaw zawk zawk in a va phur lo theilo a, motorin emaw a va la a, a phur lo tu zawk kha chuan a phur tu zawk kha a tan turah a ngai a, a ringhlel tlat zel mai a. Hei hi nuamlo an ti ve thin a, chuvang chuan Department hian an kal na tur motor pakhat hi chu nei thei ila, a ram in chuh an teh sak a te khan min en dan hi a lai thei ang a, hei hi chu kan mamawh khawp mai an ti a. A nih duh hmel khawp in ka hria a, chuvang chuan pool motor an mamawh a ni.

Tin, pakhat Revenue tih tur hi a ni em aw ka hre chiah lo a, mahse ka rilru ah ka vei ve reng hi a awm a, kan sawi chhuah ve hrim hrim duh chu, mi ram angin, mi state lian te ang in flat hi kan lei ve ta zeuh zeuh a, Mizoram-ah hian inchhawng flat te, tah chuan in lei dan mumal tak a awm loh chuan, entirnan inchhawng li vel te alo awm a, a chhawng thumna vel kha ka lo lei a, a chhawng hnuai ber chhawng hnihna emaw chhawng khatna emaw khan ka thiat dawn ti tlat mai se chuan chung lam tan chuan a buaithlak dawn khawpin ka hria a. Aizawl ah hian an in lei ve zeuh zeuh tawh a, ka zawt thin a, Mizo chu kan rilru that lai hian tha deuh hian kan in ti a, a dan leh dun kan that hun lai, kan hlim tlan hun hian kan ngaihsak lo a, an rei deuh hian kan inti buai leh tho tho thin a. Mi state-ah chuan kan hre vek tho in ka hria a, fel fai takin dan a awm a, chutiang chuan an in lei thin a, Aizawl-ah hian chutianga kan in lei loh avangin harsatna te hi hun kal zel ah hian kan la tawk awm mang e aw ka ti a. Chu dan chu Revenue Department-in an neih awm tak chi niin ka hria a, chu chu kan sawi chhuak duh a. Kan hun kal zel atana kan ram mamawh tak chu niin ka hria a ni.

A dawt leh ah chuan Higher & Technical Education Department-ah hian, an ni hian college 24 emaw lai tunah hian an enkawl ti mai ila, an vil a. Pawisa te pe in building sakna tur te, library sakna tur te an pe a, an ti lawmawm khawpin ka hria a. A hminga kan bial T. Romana College chungchang pawh ka sawi fo thin a, he House zahawm tak ah hian kan Chief Minister te, kan Minister ten theihtawp min chhuah sak a, tunah khuan colege hmun tha tak mai min pe a, ruahmanna an siam mek a. Kan Minister zahawm tak leh kan Chief Minister te, kan hruaitute chungah hian a hmasa in lawmthu kan sawi duh a.

Demand 23-na Art & Culture Department-ah hian tawite sawi ka duh chu Patent Right hi kum hnih kal vel tawh ah khan Art & Culture Department hian an

buapui in ka hria a, hei hi pawimawh khawp mai a, nimin piah lama Agriculture demand kan sawi lai khan ka rilrua lo lang chu hmarcha (Mizo chili) kan tih te thar chhuah dan tur project-ah khan hmu a, mahse hemi Geographical Identification (GI) kan tih hi a neitu nihna Registration & Protection Rules India-in a neih ah hian Mizo chili hi miin an lo GI daih mai a, a neitu nihna an lo nei daih! Ka hlauhthawn chu Mizo chili te kha lo thar chhuak ta teuh mah ila, a neitu nihna kha anni khan an neih si chuan, a hlawkna hi an chang mai awm mang e aw tih ka ngaihtuahna ah a awm a, chuang chuan helam kawngah hian engtin nge Art & Culture Department hian Mizo thil kan Thangchhuah puan, Puanchei, Puanzeh, Khumbeu kan tih bawr vel te hi GI nei a, registration and protection rights kan neih theihna turin hma an la ni khan ka hria a. Helai chauh pawh ni lo ah hian hmalak hi kan mamawh tam khawp mai a. Chu chu enge an thlen chin kan Minister zahawm tak hian a hriat ka ring a, chu chu kan sawi lang duh a.

A dawt lelah chuan Information and Communication Technology ah hian kai deuh dawrh ka duh a, hetah hian anni hi an hnathawh a tam em em a. Kan sawi seng lova, hnathawh tamtak an nei a ni tih kan hmu a, mipui nawlpui zawk hian kan va man pha chiah lova. An technology kan tangkaipui dan te hi mipui te hian kan hmu thiam chiah lovin ka hria a, chuang chuan kan mithiam bik te awmkhawmna a nih avang hian an fakawm khawp in ka hria a, chumi zinga pahnih pathum vel lek ka sawi duh chu electric bill hi online in kan han pe thei tawh a, henge te hi a lawmawm khawpin ka hria a. Bill pe tura intlar vak vak te hi tha a hek a, hun a hek a, tunlai angah chuan nikhat tha te a uihawm em em tawh a, chu chu online-in a pek ve theih tawh a, chubakah mahni remchan na laiah entirnan, Luangmual ami in bazar a kal pah in lo pe dawn ta se bazar kha a tan rem riau se, bazaar-ah a pek theih a, mahni veng kher lo ah pawh pek theihin an thlun zawm vek tawh a. Heng te hi an ti lawmawm in ka hria a, IT hmalakna a ni a. Tin, tui bill te pawh chutianga tih tum mek chu a ni tih kan hmu bawk a ni. Ka ngaihpawimawh em em thin chu property return online payment hi tunah hian an ti dawn mek bawk a. Hei hi Vigilance Department-in an monitor tur a ni a. A lawmawm khawp in ka hria a. Kan ram ah hian corruption hi a awm ve nual niin a lang a. Politician te chuan ti hian MLA te kan tih dawnin kan bungrua che thei emaw, che theilo emaw te hi kan ziak a, kan submit vek a, R.O hnenah hian a duh duh hmuh theih in a awm a. Sorkar hnathawk hian an tih ve a ngai a, an ti ve tho bawk a. Chumi an tiha a awlsam theihna

turin Vigilance department in sorkar hnathawk zawng zawngin an bungraw neih te an ziahlan ve na tur, an submit na tur ruahmanna fel tak mai IT department in a rawn siam hi a lawmawm khawp in ka hria a. Thil awlsam tak a nih phah thei dawn a. Tin, a pawimawh bawh a ni hei hi. Mahni hlawh aia hausa ti mai ang, mahni sum lakluh aia hausa te hi awm ve theih a ni a. Chung zawng zawng te pawh chuan an bungrua te, an in leh lo, an assets kha an dah lut ve thei dawn a, chu chu Vigilance Department tan awlsam takin alo hmuh theih dawn a ni. Chuvangin he thil tha tak hi tangkai taka kan hman chuan kan rama corruption nasa lutuk te pawh hi a ven theih ka ring a, a lawmawm ka ti a, chu chu kan sawilang tel ve duh a ni. An hmalakna hi tlem te, tam tak a ni chungin point 3 chauh te kha kan sawilan hman ni ta se a tha awm e.

Tin, demand no 24-na Medical and Public Health tih hi a pawimawh khawp mai a. Hemi department ringawt pawh hi darkar khat sawi tham a ni hrim mai a. Kum hnih khat chhung leka an hmasawna hi a nasa em em a, tam tak chuan kan bel Chiang Chiah lo maithei a, amaherawhchu han belhchian hian a tam a ni tih hi a hriat em em a ni. District hrang hranga an hmasawna Saiha-ah te, Lawngtlai-ah te, Mamit-ah te Aizawl Civil Hospital leh Referral Hospital ringawt te pawh hi a ni awm e. Chubakah Cancer Hospital te nen zawng zawng pawh sawn.

Kumkhat chhung leka bungrua an neih thar nasat zia te, hmasawna hrang hrang an neih tam zia, building an sak te zawng zawng hi kan sawi seng lova, tun ang hun reng renga he department-a thil thar kan neih tam leh kan hmasawna nasa hi a la awm in ka ring lova. Chutiang khawp chuan a tam a, sawi fe tham a ni tih khan a fun kim mai awm e. Chutiang hmasawna kan han nei hi a lawmawm khawp in ka hria a. Tin, drugs test hi ka ngaipawimawh khawp mai a. Pu Deputy Speaker, House hmasa ah pawh khan ka sawi tawh a. Hemi chungchanga kan Health Minister zahawm tak hmalakna te hi a fakawm em em a, drugs lem hi a awm tam ve a ni tih hi a hriat a, Mizoram ah pawh hian.

A chhan chu a test-na laboratory kan neih tlat loh avang hian North East hian Gauhati ami kan intawm a, khuta zu test tur khuan a reilo berah vawikhat an zu thawn hian vanneih chuan thla khat chhung ten a result a hriat theih a, vanneih vak loh tum emaw, an damdawi thawn chhuah kha khulaia test-na tur bungrua remchang an lo hmuh zung zung theih loh phei chuan thla thum velah te a result hi kan hre chauh thin a

ni. Chutiang a nih avang chuan Mizoram-ah hian Drugs and Food testing Laboratory hi a pawimawh em em a ni.

Tuna kan department hmalakna ah pawh hian, an zu thawn ah hian damdawi thalo, damdawi result thalo, damdawi lem ti thawng mai ang, (tawngkam mawilo a ni em lawng chu maw,) an nei zauh zauh tawh a ni. Chutiang chu kan dinhmun a ni a, harsa tak chung pawh hian an thawk rim em em a. Kan drugs inspector lampang hi an fakawm takzet a ni. Chutiang a nih avang chuan kan mamawh zia te hria in tunah hian a hlawhtlinna kan hmu tep a ni.

Crore 6 bawr vel hi an hmu mai dawn ni te pawh hian kan hria a, an thawhrimna leh an veina ah te, an thahnemngaihna ah te an fakawm takzet zet a, an department hi tihchangtlun a, thawm that deuh deuh hi a tul khawp in ka hria a, chu chu kan sawi leh thuak duh a.

Tin, RSBY leh Health Care hi kan hre fuh hleithei lovin ka hria a. A inang lutuk a, hei hi kan hriat fuh deuh te pawh hi a tha in ka hria a. Tin, Pu Deputy Speaker, a thahnemngaih awmin ka hria a, tunah RSBY renew hun hi a inhawng mek. Hei hi kan in register nasat hi a tul a ni. Chutilo chuan kan pawisa neih ang ang, kan hrisel laia pawisa kan khawl ve ang ang te damlohna kan tawh hian kan hmang ral vek zel a. Tin, kan hmang ral vek pawh nilovin ba hial khawp ten dam kan duhna avangin kan inenkawl thin a ni. Chumi a nih avang chuan Health Care leh RSBY hi kan ngaih pawimawh a tul ka ti, keimahni nun chhanhim nan leh kan economics tihchangtlun nan pawh a tul takzet in ka hria a.

Entirnan, kan chhungkua ah sorkar hnathawk tu emaw kan lo awm a, kan chhungkaw zingah khan dan in a phal bak bill theih lo pahnih pathum tal hi chu sorkar hnathawk chhungkaw zingah pawh kan awm ve thin. Chungte pawh chuan Health Care hi kan in register ve a ngai a ni. Tun dinhmun ah chuan mi awmthei tak tak te pawh hian Health Care-ah kan in register lo va kan chhungkuaa medical re-imburement ti theilo te an damloh changin, damlohna an tawh in bill tir ve hram tum in kan department-ah hma kan la fo thin. Hei hian Medical Re-imburement hi a tipung a, sorkar sum kan seng nasa em em a ni.

Chuvangin Health Care-ah hian in register ila, sorkar hnathawk chhungkua te pawhin bill theilo kan chhungkua ah an awm a nih chuan medical re-imburement kan

sen teuh teuh hi tamtak min save ang a! Tin, keimahni security-ah a tha em em bawk a ni. Entirnan, Health Care-ah ` 1000 kan deposit chuan ` 2,70,000 a bill let theih a, ` 750 kan tih chuan ` 1,70,000, ` 100 kan pek chuan ` 70000 vel kha a bill let theih a ni. Thlanmual fee thawh ang deuh hi a ni a, thlanmual fee pawh kan thawh a, kan thih loh hlahuh chuan a lawmawm em em a. Chuvang chuan heta ` 1000 vel emaw kan dah a, kan hman leh loh hian ui loh tur a ni. Tam tak chuan ‘nikumah ka ti a, kan hmang leh chuang si lo a, tunkum chu ka ti lo mai,’ hi an lo ti thin a. Kan hman loh khan lawm zawk tur a ni a, keimahni chhungkaw security atan pawh hian a tul in ka hria, Pu Dy. Speaker.

A tawp berah chuan Health Department-ah hian Director 3 lai an awm a, an in level vek a, hnathawh hi a kal har leh deuh hlek thin niin a hriat a. Chuvang chuan Principal Director atanah hi chuan IAS awm thei ta se, intluk tlang pet pet hokhawmtu atan khan Principal Director-ah hian IAS chu awm thei se chuan an Department hmalakna hi a zau si a, a tam si a, an thatpui zawk hi ka ring. Pu Dy. Speaker, ka lawm e.

**DEPUTY SPEAKER** : Pu T. Sangkunga.

**Pu T.SANGKUNGA** : Pu Dy. Speaker, ka lawm e. Vawiinah kan Minister te 2 demand kan sawiho dawn a, sawi ve thei tura hun min pek avangin ka lawm hle a. Ka hmuh ve dan leh ka hriatphak chinah chuan kan state-a Health Care kan tihdan hi ka fak tulh tulh mai. Duhthawhna avangin han sawisel thin mah ila, tunhnaiah phei chuan improvement nasa tak a awm a, chungte chu sawisen a ni lo a.

Health demand atang hian han sawi ta ila, an achievement leh an pawisa hmuh thar leh an hmalakna ringawt pawh hi kan sawi seng dawn lova. Tawi te ka'n sawi duh chu, ka tupa pakhat hi hmanni khan kan bial lamah a chesual a, kan Health Minister zahawm tak hi ka zu phone a, X-ray te, CT scan te an lo ready vek a, a zanah a result chhuakin an tithei vek a, treatment a tul ang kha a zan la la ah an pe thei vek a ni. Hetah reife an enkawl hnuin USA an awmna lamah an haw thla ta a, harsa takin an thleng thla a. A school kha a zawm leh thei dawn em tih hriatna turin X-ray a ngai an ti a, family doctor kaltlang a ngai an han ti a, X-ray result ringawt kha kar khat leh a chanve chhungin a chhuak lo a ni, hetah a zanah a chhuak vek zel si a. Midang zai kan tih reng reng pawhin a ni a, chhuaklo ka hrelo. USA ang ram ropui, an khua chu USA-ah pawh

khawlian 10 zinga tel pha a ni a. Ka zu phone thin a, X-ray result a la chhuak thei lo, an ti reng mai a, 'kar 3 hnu velah an school a zawm thei e,' an ti chauh a ni. Chu chu ka ngaituah ta a, an bill system lah chu Obama Care an chhungkuain an zawm a, mahse an bill-ah khan cut tur a tam bawk si a, a buaithlak bawk si.

Tuna an president thar Trumpa khuan, "Obama care hi a rangthei ang berin paih vat tur," a ti a, a swearing an zawh a, an cancel mai te kha, American mipui an lawm em em a ni. Chuvangin Health Care system-ah hian duhthusam ang diak diak ni lo mahse kan government hospital leh PHC-a kan tihdan te hi America pawhin a lo tluk lo hle mai. Heta an lo chho kha, 'ha siam tur, kawchhung en tur, hmeichhe thatlohna lam, zun thlum, ruh na, etc. khulamin a tluk lo lutuk,' an ti a, nitin hian an chhungin a dam te pawh kha in entirin an buai hle a ni. A intlawm hleih bawk si a, mak an ti a. Chuvangin Mizoram-a Health Care system nasa tak maia tun hnaia kan Minister chak tak hova kan thang hi ropui ka ti a, chu chu thuhmahruaiah ka'n sawi duh bawk a.

A dawt lehah hmannah doctor 80 kan han ti nghet kha ropui ka ti a, a hlawma khatiang doctor han lak ngheh te, tunah 27 lak lehna tur a awmte hi, kan Health Minister khan hmannah a puang tawh a, a lawmawm ka ti a. Khangah khan ka'n sawi duh chu a kil lam hian 80-ah khan kan chang si lo a, tun tumah hi chuan block headquarter awmna Khawbung-ah te pawh kan la chang lo a. Doctor hengah te hian min rawn pe ve tawh se, Bungzung leh Sesih PHC-ah te khian min rawn dah ve tawh se, Technician leh Pharmacist te nen. A kil deuh te hi kan Minister zahawm tak hian min rawn hria sela tih ka'n sawi duh a .

Tin, nurse te pawh hmannah 50 an la nghet a, Referral Hospital atan, tunah 25 court case avangin nghet mai tur a buai a. Hengah te pawh hian heng ho chhuahsan kha, khing kan biala hospital nurse awm manglo ah te khian a bial mi a nghet lo hian min tih sak ve ta se kan lawm em em dawn a ni.

Tin, Health Worker 180 lak mai turin peih fel tep a ni a, pipeline a awm tawh a, hei pawh hi kan bialah Leisenzo, Khuangthing tih te, Vangchhia, Sazep tih ah te kan mamawh em em a. A te ber vanneih thlak takin Social Welfare sumin hmannah Zawngtetuiah a nghetlo min rawn dah hlauh mai a, an President te phone chu a ring in kan lawm hle a ni. Chutiang chuan heng mamawhna ah hian a bial mi han dah hram thei se, train chhuak an awm ve tho a. Hengho hi min dahsak ve theih chuan helama insawn



an bei lo nge nge a, helama awm ho hi chu a tirah phur takin an zawm a, thla 2 a liam hi chuan, ‘a insawn theih lo maw,’ an ti a, bialtu MLA te hi (zirtirtuah te pawh) min rawn hmu ringawt zel mai a, thin hi a rim a, lo an khum hrep mai hi a hlauhawm a. Harsa taka kan kherh chhuah ve ngar ngar kan Minister zahawm tak ten min khawngaih a, min han pe a. Insawn an rawn ti nghal zel mai a, heng atang hian a bialmi te khi min rawn pe thei hram se. Nurse-ah pawh, Health Worker-ah pawh tih kha kan Minister zahawm takin min lo chhinchhiah sak se ka duh a.

Tin, 20 October India Today issue-ah khan thil ropui deuh mai a lo chhuak a. Chutah chuan West Bengal-a an Sport Minister, Aroop Bishwas-a nu a damlo a, amah Mamata laka tlatlum tak a ni a. A nu kha Govt. Hospital-ah awmlo theilo dinhmunah a awm ta a. A chhan chu private hospitala awmna ten a nu enkawlna bill ` 27.00 lakh an thing a ni. A thin a rim em em mai a, C.M. Mamata hnenah a thlen a. C.M. khan committee a ko rum rum a, Assembly Standing Committee (kein in Subject Committee) khan a hma in Private Hospital te hi an lo zir chiang tawh a.

Han sawi chiang deuh ila, West Bengal-ah khuan private hospital ringawt hi 2088 a awm a, 2088-a an investment cost chu crore hliir a cheng nuai hnih a tling a. Private Hospital 942 an han zirchiang ta a, heta an zirchianna ah Private Hospital te hian tul lovah damdawi man to tak tak an chawh a, tul lovah Life Support Ventilator, etc. an vuah a. Inflated bill a tam em em bawh tih an lo hmu in report an lo siam tawh sa reng reng a. Chuvangin, Mamata hi a thin a rim em em mai a. Tun thla ni 3 (3.2.2017) khan Assembly session chuan West Bengal Clinical Establishments (Registration, Regulation and Transparency) Bill, 2017 an passed nghal chuk chuk a. Chu Bill-ah chuan Private Hospital-a enkawl that loh avanga damlo an thi a nih chuan ` 10,00,000 thleng hospital-in a chawi thei ang tih te. Tin, an record kha an tamper a nih phei chuan ` 50,00,000 thleng chawi tir theih an ni ang a, an license cancel theih a ni ang tih te, chi hrang hrang kha Assembly khan Bill-ah tun March ni 3 khan an legislate ta a. An Chief Minister phei chuan i phalna in a tawngkam hi han chhiar ila, “Everybody is complaining about exorbitant Bill, a hospital is not a slaughter house or factory” a ti tawp mai a. He Bill hi opposition zawng zawng leh West Bengal mipui ten an lawm a ni an ti. Political analyst

te chuan ‘Mamata chuan he Bill avang hian a dinhmun a sawh ngheh phah hle a ni’ ti te in an ziaak a ni.

He Act thar hmang hian W. Bengal sorkar chuan he dan kengkawh tur hian member 11 nei Regulatory Commission an din nghal a; chu chuan Quasi-Judicial Power a nei a, he Commission hian Private Hospital bill dan hmang monitor-te, dik lo takin, tullo tak takin an damlote kha damdawi man tam an chawh em, an damlo te tha takin an enkawl em tih te an en nghal ang a. An bill dik leh dik loh te pawh an en nghal vek thei ang a, action pawh court ang deuhthawin an la nghal thei ang a, disciplinary proceeding-te pawh a draw thei ang tih te an telh a. Hetah hian Mizoram-in kan vanneihpui ka rin chu Kolkata Hospital te kan pan nasa si a, tunah chuan an fimkhur phah tawh dawn a. Mizoram pawhin Kolkata-a kan medical expenditure hi a hniam phah ka beisei bakah kan ramah pawh hetiang dan neih hi a tha awm mang e, sawi neuh neuh a tam ve tawh riau a. A theih hram chuan sorkar leh Durtlang Hospital kan pan hram hram nachhan pawh hengte hi a ni ve fo bawk a. Chuvangin, kan Subject Committee-te pawh hian helam hi an lo ngaihven a tha awm mang e tih te ka ngaihtuah a.

Tin, hetiang hi opposition leh ruling inlungualna chi a ni a. CPM lal lai khan hetiang dan tha hi siam an lo tum tawh a, Mamata hovin TMC khan nasa taka Assembly-ah an oppose avangin a tlang zo lova. Tunah an han tawng ve a, CPM pawh an lawm em em mai a, opposition leh ruling, an vaiin an hlim a ni an ti a. Kan state ah pawh hian medical bill a tam kan tih kan tih te pawh hi hetiang dan hi hmang ila chuan a zia deuh dan a awm awm mang e tih te ka rilruah a awm a.

Pu Dy. Speaker, minute 1 lek, Pu R. Romawia, kan Minister zahawm tak demand no.21 kha ka lo la sawi si lova, tawite tak takin. Higher & Technical Education Deptt. hnuaiah Aizawla college kal kan duh vek mai si a, zirturtu pawh an lo tha nge nge a, transfer-te pawh an dil lo nge nge a. College building extension-te, zirturtu hlawh tam vak lo pawh a han lak belh te, qualified tak tak chuang kan ngah tawh si a, han tih belh hi a theih lo em ni? Hmannia kan Minister-in a tih ang deuh khan, morning leh evening shift-te pawh hi thingtlanga college kal ai chuan a tha a ni.

Ka sawi tawh thin a, ‘PUC-a kan zir laia kan college chhiat zia chu, thla hnih chhunga English-II-a kan zir chu, ‘write a precise’ tih chiah kan zir a, kan ziah lah chu endiktu an awm hlei lova. Thingtlanga a dintirhna ah phei chuan Managing

Committee chairman hnenah zingah kan zuk kal a, kan zir ho lutuk dan an sawi a, Lecturer te nen kan inhnial vak mai a. Chutatang chuan a improve ta deuh a. Tunah chuan thingtlang college pawh a tha fu tawh a. Khatiang kha a nih avangin miliante hnar hnuai, state capital-te leh district capital-te college building tih len hleka zirtirtu lak belh hlek hian zirnaah kan chankan ka ring a. Khawpuiah chuan zirtirtute an tha in an regular nge nge ang a. Chuvangin, hei hi kan ngaih pawimawh a tha in ka hria a.

Demand no.23-na, Art & Culture Department hi kan hnam tan an pawimawh hle. Kan pi pute sulhnu pawimawh zawng zawng chu khawchhak lamah a awm a. Archeological Survey of India-te pawhin an rawn ngaipawimawh a, kan hre vek a. Kan pi leh pute sulhnu humhalh leh journalist te hip thama project pawimawh deuh te kan sorkar-in kan state sorkar fund nilo, DoNER-ah te, NEC-ah te khing khua tan khian siam belh a ngai em em a. Vangchhia ami pawh USA-ah carbon dating an zu ti hial a nih kha. Ngaihnawm tak tak an hmu a. Pu Vanhela'n Goa-a a awmlaia a sawi ka hriatring chu, “Kan Director-in lungphun hlui te tak te pakhat hi a va hmu a, ‘ka pu, a ropui lutuk, va en ve teh,’ a ti a, a ngaisang a, hahipin a rawn sawi a. Ka va en chuan lungphun te tak te hi a lo ni a. Mizoramah, Tuipuirala khing pi pute sulhnu zozai te khi rawn hmu se a ropui an ti awm mang e”, a ti a ni. Ka bialah khian thil hlui hmuhnawm tak tak hmuh tur a tam em em mai a. Dunglelang ringawtah pawh khian thil hlui puk te, lungphun hlui tak tak, bungbel chhiate a tam a. An inhmun hlui te, lungphek leh thlan ziak lem, thlan hlui te tam tak, darkar 2 chhunga fanchhuah sen loh hmun khatah ringawt pawh khian a awm a. Chuvangin kan Minister hian a ngaipawimawh a, khilam khi a duhsak em em a. Mahse state hian sum kan ngah lo tlat. A tlawhtute chawlhna leh thlenna nuam deuh project siama tihpuitlin hi a theih hram chuan he House kaltlang hian kan sorkar hi ka ngen a ni. Tichuan, kan Minister pahnihte demand pawimawh tak tak te hi pass turin ka rawn support a ni e. Ka lawm e.

**Dy. SPEAKER** : Dr. Ngurdingliana.

**Dr. NGURDINGLIANA** : Pu Dy. Speaker, ka lawm e.

Vawiinah Minister zahawm tak tak pahnih demand sawi tura kal khawm kan ni a. Nitin ka la ding a, vawiin chu hun a chep bawk a, demand pahnih hi ka rawn la bik ang a.

Pakhatna ah chuan Higher & Technical Education Department demand no. 21 hi. Kan hria a, Higher & Technical Education Department hi Pu Dy. Speaker, state budget atang hian 90% hi hlawh-ah a kal a, 10/100 hi administrative cost-ah a kal a. An khawngaihthlak angreng khawp mai a. Amaherawhchu, DONER atang te, RUSA atang te in tanpuina an dawn avang hian eng tin tin emaw an kal a ni mai a. Tunah hian Mizoram University Ordinance ang chuan Mizorama Govt. College 22 kan neih atang hian zirtirtu neih ngei ngei ngai, minimum chu 866 a ni a. Tunah hian 817 kan nei a, chumi a nih chuan 120 in kan la tlin lo a ni. Chuvang chuan, kan Minister zahawm tak pawh hi tum hnih lai zirtirtu hnawhkhahna tur hian department-in engtingge hma a lak tih ka zawt tawh a. Tun session-ah pawh ka rawn zawt leh a, chuta a chhanna ah chuan, ‘tunah hian RUSA kaltlangin post 72 siam tura hma lak mek a ni,’ a ti a. Chu chu 120-ah 72 chu paihin kan la pha lo hle a ni. Hetiang kawngah hian department-in tan han la se tih hi Pu Dy. Speaker, ka thahnemngaihna a ni a. Tuna Govt. College 22 kan neih bakah College 5 kan nei a, a thente chu Arts-te, Commerce, Science-te pawh kan nei. Hengte hi uluk taka tuna enkawl a nih chuan kei chuan Pu Dy. Speaker, College hawn belh hi main stream pangngai Arts, Science leh Commerce bakah hi chuan Professional College zawng hian kal hi tha ka ti a.

Tuna kan College neih mekte pawh hi UGC kaltlang hian NAAC Team kan tih, National Accreditation & Assessment Team ho hian an rawn check thin a, kum hnih emaw, kum khat emaw danah. Tunah hian ka hriatsual loh chuan College pakhat chiah hi rawn endik loh a la awm a ni awm a. Hemi NAAC Peer Team in an rawn en tawh, grading an pek dante pawh hi hriat a chakawm a. Tun session-ah pawh hian ka rawn zawt ngeiin ka hria a, mahse vawiin thlengin kan la dawng lova. NAAC Peer Team an lo kal hi chuan grading an pek hnu ah hian College hian tih ngei ngei tur, vawi engzahngse seminar neih ngai, symposium conduct ngai, zirtirtute research an beih a ngai, khatiang criteria, tehfung kha a ken tel avang khan hmasawmna a keng tel a ni. An grading azir khan funding pawh an hmu tha in an hmu chhia a ni. Chuvangin kan College neihsa te hi, pakhat la en loh a nih pawhin, rawn en rang se. Tuna ka hriat dan ah chuan, ka hmuh danah chuan kan College-ah te pawh academic environment hi a tha em em a. College pakhat tha fal deuh hi a awm a, chumi um chuan hrisel takin an inel niin a lang a, lawmawm ka ti em em a ni.

Lengpui-ah hian, tuna thu kan lo hriat danah, Society of Jesus, Catholic institution-in College rawn din an tum a ni awm a. Hei pawh hi a nghahhlelhawm khawp a, quality rawn keng turah beisei ila. Tuna kan College neihte hi uluk taka RUSA leh DONER leh state budget atanga kan enkawl chuan hmasawna tur tam tak a awm zel a ni tih ka han sawi duh a ni.

Tin, Polyclinic lamah tunah hian Champhai, Mamit te, Kolasib te hawn theih tep niin kan lo hria a, a lawmawm a. Hengte hi central CSS fund atanga sak a ni a, cheng vbc 12 theuha sak a ni a, hengte pawh hi hawn theih thuai thuai ni se. Heng bakah Lawngtlai te, hmun dang danga tuna hma lakna mek te pawh hi tun aia chak zawka tihpuitlin ni vat thei se a lawmawm ngawt ang. Tin, DONER atanga infrastructure development-na tur College 19-ah hian pek niin kan lo hria a. Hengte pawh hi an hmang tangkai hle niin a lang a, a lawmawm ka ti khawp mai, Pu Dy. Speaker.

Tunah hian Post-Matric Students' Hostel, Aizawl-ah cheng nuai 141 leh Mizoram Law College, Luangmual-ah cheng nuai 283-a sak mek a niin ka hria a. Hengte pawh hi stream hrang bik Law College changtlung kan neih phah leh zual dawn niin a lang a, a lawmawm ka ti khawp mai.

Tin, Pu Dy. Speaker, nakinah Minister wind up hunah ka hriat duh chu nikum academic session atang khan crore 4 ve ve model College pahnih Govt. Zirtiri Residential Science College leh Govt. Hrangbana College-ah RUSA sum atangin pek a ni a, model College an nihna angin eng eng nge improvement kuminah hmuh theih, naupangah leh zirtirtuah kha hriat a chakawm a. A hming ringawta ropui ni lova, he college atang hian eng progress leh achievement nge awm fal bik kha hriat a chakawm a, chu chu hriat theih chuan a lawmawm khawp ang.

Tin, tunah hian Lunglei-ah professional college, Mizoram Engineering College tur Pukpui-ah sak mek a ni te hi a lawmawm a. Hei hian kan zirna lamah, line hrang hrangah hma kan sawn zel a ni tih ka han sawi duh a ni.

Tunah chuan demand no. 24-na Medical & Public Health-ah hian ka han lut leh duh lawk a. Mizoram pumah ka chik a, statistics leh data hi ka collect ngun a, IMR (Infant Mortality Rate) hi tunah a tlahniam zel mai te hi a lawmawm ka ti a. Saiha District-ah pawh District Council-te, kohhran ang te pawhin an tang em em a. Kuminah pheih chuan an tlahniam leh zual te hi kan Health Department-te hma lakna a ni a, a

lawmawm ka ti a. MMR-te statistics ka la hre lova, leprosy leh TB-a an hmasawna te pawh Unstarred Question-in kan zawt vek a, hei hi kan la hmu lova, an rawn pek chhoh hunah member-ten kan hmuh ka ring a. Tin, malaria thihna te kum tina a lo tlem tial tial te, cholera-related death kan tih te pawh kum tinin a lo tlahniam te pawh hi kan Health Department leh kan Minister-te hmalakna niin a lang a, hengah te pawh lawmthu ka han sawi duh a ni.

Tin, thil lawmawm deuh chu district tina pheikhai rual taka hmalakna a awm hi, khawl thu hla a ni emaw, equipment an mamawhna zawng zawngah te, hengte pawh hi a lawmawm a. Aizawl hi chu a loh theih lohva, khawl chungchang ah te pawh bun than bik ngai, capital a nihna ang ngeia hmun tin hmun tang atanga rawn pan kan nih avang hian, hemi kawngah pawh Aizawl Civil Hospital an upgrade dante vawiinah kan lo chhiar a, a lawmawm ka ti khawp a. Chumi hma in, kan Health Department-ten tuna an hmalakna a ngaihsanawm rualin, an hmalak leh zualna tura pawimawh ka tih chu infrastructure lamah hian pawisa an nei lo chung chung pawhin han dap kual sela, hemi kawngah hian hma la thei se a lawmawm leh zual ang.

Tuna Civil Hospital an upgrade, new improvement, hmasawna thar kan han hmuh te, dialysis khawl kan mamawh ngawih ngawih 7 dah thar a han ni te. Tin, current awm ngei ngei ngai Cardiology Department-te, Radio Diagnosis & Imaging Department-te atan 160KV kan han bun thei te hi lawmawm ka ti a. Tin, Hepatitis C leh Hepatitis B enkawlina tur a vaccine-te pawh an nei reng thei te saw damlo tan a thlamuan thlak a. Tin, ho te a lang mahse riah em em ngai si lova Skin Department bik in Day Care hmangchang hre taka an han siamte pawh saw mipuiin an chhawr ka ring a, a lawmawm ka ti khawp mai.

Tin, hemi piah lamah Post-Graduate-ah DNB student mi 20 lai kan han neihte zinga 2 te hlawhtlinna, Asst. Professor te, tin, tunah research la zir zawm thei zel mihring an han chhuak thei te pawh hi a lawmawm ka ti a. Tin, hma an sawn zel na tur an han phochhuah bakah tuna an rawn tih te, cabin siam belh mek an han nei leh dawn te hi, dental te a lawmawm a. Tin, India hmarchhakah eye bank nei awmchhun kan ni te hi an ngaihsan awm a, a ropui a. Mitthi kal ta te, mit pe tam tak an awm phah a, hei hi vai ram atang te pawhin a tul chuan an rawn la lawm lawm a ni tih te kan han hriat hian kan medical department Minister leh official te hmalakna ah lawmthu ka sawi a. Keima

mimal experience atanga ka hmuh chu Pu Deputy Speaker, kan hria a, nikum hmasa khan thih sualin ICU-ah ka awm a, Pathian leh a kohhran te tawngtaina zarah vawiin ah he rorelna in sang berah ka lo ding leh thei a. Chuta ka hmuh chu ICU-ah khan kar hnih vel ka awm a, ICU saw partition engmah a awm loh avang sawn, natna hrang hrang kan mu let reng a, a then chu pneumonia vang te, a then chu internal bleeding vang te, natna hrang hrang a ni. Sawmi in a ken tel chu, partition a awm loh avang sawn heta a tira ka vei loh pawh kha ka lo vei thei a ni. Delhi-a kan han kal thlak khan pneumonia kha ka lo pai tel reng mai a, chuvang chuan.

**DEPUTY SPEAKER** : Ngawi rawh aw lawk, dar khat alo ri a, sawi zawh tir lawk kan remti em? Aw, sawi zawh tum tawh la.

**Dr. NGURDINGLIANA** : min zai theih loh phah ta a. A chhan chu partition a awm loh avang khan helaia ka awm lai khan khami kha ka lo pai reng mai a. Chuvangin kan Minister zahawm tak hian glass fibre-in a khum diat diat te saw partition han siam thei se chu damlo tan pawh damna sawng sawng a nih ka ring a ni.

Tin, PHC-a doctor indaihlohna Mizoramah pasarih chauh te an lo la awm a, chung te pawh tunah a hnawh khah nan doctor post 26 lak a nih tur te hi kan Minister chungah hian lawmawm ka ti em em a ni. A tawp ber atan chuan thil hote-a lang mahse tangkai deuh mai chu Pu Deputy Speaker, kan doctor mi thiam ten facebook-a prescription min rawn pek, thil hrang hrang mahni department theuhah hetiang hi a tangkai khawp mai a, rawn uar leh deuh thei se ka duh a ni, thahnemngaihna thil ah. Tichuan vawiina kan Minister zahawm tak tak pahnih te demand hi ka rawn thlawpin he House hian pass ngei turin ka rawn dilpui a ni e. Ka lawm e.

**DEPUTY SPEAKER** : Awle, tunah chuan kan chawl rih anga, dar hnih ah kan thu khawm leh dawn nia.

**2:00 P.M.**

**DEPUTY SPEAKER** : Chawhma lam khan member zahawm tak tak parukin an sawi tawh a. Tunah kan chhunzawm leh ang a. Tunge han chhunzawm ang? Awle, Pu John Siamkunga.

**Pu JOHN SIAMKUNGA** : Pu Deputy Speaker, ka lawm e. Hun tha tak min pek avangin ka lawm a. Vawiinah kan Minister zahawm tak takte pahnih demand kan sawiho mek a ni a. Thu tam han sawi tur phei chu ka nei lova.

A bikin Higher and Technical Education, demand no. 21-na atang hian han sawi tan ka duh a. Pu Speaker, Higher and Technical Education hian hna a thawk nasa hle a. A bikin keini bialah phei saw chuan nasa takin hna min thawh sak a. Hnahthial Government College saw min thum that sak nasa em em a ni. School naupang kan neih tlem thin avang khan thawkkhat lai phei kha chuan J. Buana College lamah amalgamate mai ni se tihte a ri thut thut a. Amaherawhchu kan hotuten ngun taka an ngaihtuahin a din chhuah lehna tur zia kha ruahmanna siam a ni a. Chumiah chuan theihtawp kan chhuah tawh hnu ah khan Geography Department te min han din sak a, permission te min pe a. Chu mai bakah tunah hian Asst. Professor pahnih lak phalna te min han pe leh ta zel a. Chumi a nih avang chuan Mizoram University-ah kan in affiliate thei tawh dawn niin kan ngai a, kan lawm tak meuh a ni. Kan Minister hi a chak em em a, ka hriat reng chu ama hnenah pawh hian kan sawi tawh thin a. Society of Jesus kan tih Jesuit Society hian Mizoramah College rawn din an tum a. Chumi tumah pawh chuan kan Minister hian tha taka lo chhawmin an din theih dan tur te kha a lo ngaihtuahpui a. Chumiah chuan Jesuit Father hote hian a hmun te an han zawng a. Tunah chuan nichina member zahawm takin a rawn sawi tawh ang khan khulai Lengpui ramah khuan hmun an khuar ta a. Kumin atang emaw hian class tan ve an tum a, a hmingah hian St. Xavier's College an ti dawn a

He mi te hi reliable deuh mai an ni a. Khawvel ram hrang 32-ah hian zirna in hrang hrang an nei a. USA-ah khuan College ringawt pawh hi 52 an nei a ni. Europe lamah te, Latin America lamah te, South America lamah te, Africa khawmualpui ah te, Australia-ah te hmun dang dangah an nei a. India ramah ringawt hian College chin ringawt pawh hi institution 28 an nei a. Khung Loyala College, Chennai te pawh khu an ta vek a ni. Khatianga zirna lama nasa taka beitate an nih avangin kan Minister zahawm takin a lo welcome te, kan sorkarin a lo welcome te hi a lawmawm tak zet zet a. Chuvangin an chenpakawm dawn hlein a lang a, a lawmawm a, hmasawna ropui tak niin ka hria a ni.

Art and Culture, demand 23-na hi tawi tea han sawi ka duh a. Economic Survey lam atanga han en hi chuan phak khat lek te hi a inziak ve a. An hnathawh ropui tehlu nen hian engatinge heti te chauh mai hi a inziah le tih te ka ngaihtuah a. Kan culture vawng himtu leh kan heritage te vawng hima theihtawp chhuahute an ni a. A inziak tlem lulai mang e aw ka ti deuh a. Nichinah member zahawm takin khawchhak



lama an hmalakna te a rawn sawi tawh a. Keini pawh helaia han sawi lan ka duh chu hma min laksak tawhna Saikuti Thlan leh a panna velah te nasa takin hma min laksak tawh a. Tin, chu mai bakah tunah hian Lalnu Ropuiliani rorelna tlang, sawlai hmun saw min chei sak turin kan ngen a. Sap hma pawha zam ve lo lal kan neih chhun kha a ni a. Ani kha sawlaih, sap-in\`a an rawn hneh tuma man an tum pawh khan “Lal ka nia min zawn tur a ni” ti ngat kha a ni a. Lungleiah a tang a, Lunglei atangin Chitagong-ah, Chitagong atangin a ruang a rawn haw ta a tih kha kan hriat dan a ni a. A lalna tlang saw zin mite tlawh atan thil ropui tak ni turin a lang a. Kum hnih chhung chu Chapchar Kut pawh kan hmang tawh a. A ngaw a thain a hmun a nuam a, a hmunin a dawl zo bawk a. Chu mai bakah zin miten, pawn lam mi an ni emaw, foreign tourist an ni emaw, domestic an ni emaw, khang ho tan pawh tlawh nahawm tak tur niin a ngaih theih a. Helamah te pawh hian Art and Culture lama kan hotu, kan Minister zahawm tak pawhin min lo chhinchhiah sak sela. Sawlai hmun saw zin mite tan leh Art and Culture hnuai liau liauah pawh hian kan mi hluite hnuhma leh sulhnu vawn himna tha tak tur niin ka ring a ni.

Tin, Land Revenue and Settlement lamah hian tawi te han sawi ka duh a. Hei pawh hi Economic Survey-ah hian a chuang tlem hle mai a. A vang chu an hna thawh te a tamin an dan siam tawh te ka`n ngaihtuah thin a. Sorkar tha chuan dan tha a siam a, chumi hmang chuan a khua leh tuite a hruai a. Chu dan hnuai atang chuan kawng dik min zawhpui thin a ni. Chumi a nih avang chuan Land Revenue and Settlement hnuaih pawh hian dan tha tak tak te siam a lo ni tawh a. He bua an lo lang ta lo hi a pawh hle a. An revenue collection te, rregistration fee an collect te, stamp duty te, heng ho te te chauh mai hi a rawn lang a. Kan dan tha siam ang chi te pawh tlem azawng han tilang ve se a that nen.

Tin, kan Minister chak takin ngaihtuahna thuk tak seng chung a beihnaah hian LSC pek chhuahna atana dan han siam te, mimal hnena LSC pek chhuah dawna sorkarin mimal hnenah chatuan atana pek tawh tur a nih avangin registration fee chungchang bitukna kawnga an hmalakna te hi a lawmawm takzetin ka hria a.

Medical and Public Health Department, demand no. 24 chungchang hi. Health Care hi kan sawi tawh a, kan hotuten in rawn sawi nasa tawh a, chuvangin helam hi chu ka sawi vak lovang a. Tunlai hi registration tih lai a ni a. Veng tinah tunah hian

Sub-Centre neihna hmunah chuan an ti mek a. Heng hi keini thingtlang bialtu tan chuan a pawimawh zual a. Damlo an lo kal a, kan lo puih theih loh tam tak an awm a. Kan puih sen lohte an awm ve bawk a. Khangah khan Health Care RSBY hnuai hian nasa takin min chhawk a ni. Heng avang hian MLA ten kan sum sen tur tam tak kan sen loh phah mai bakah min chhawk nasa em em a. Tin, kan sawi leh duh chu kan Doctor-te, kan Nurse-te hi an fel tawkin ka hria a. Mizote hi kan phunchiar mah mah em aw tih tur hi kan ni ve deuh a. Kan phunchiar vanga fimkhur ta nge kan nih chu ka hre chuang lova. Amaherawhchu thil hoteah hian kan indem hma em em a, a fak lam erawh hi chu a ri zui tawh chuang lem lova. Amaherawhchu damdawi lama kan thawktute an felzia te, biak an nawmzia te, thil ti tak taka an tih dante ka ngaihtuah hi chuan an fel hlein ka hria. Morgue Van chungchangah te pawh a ni a. Englai pawh hian bia ila heng thil hoteah te pawh hian a tua mai pawh hi min chhawn tha hle zel a, an fakawm takzet a ni tih hi ka'n sawi pah duh a.

Chutih rual chuan MSACS hnuai ami hi. Mizoramah hian kan vak ve thin a. World Bank kawngte kan han tlan a, Lunglei kawngah, thingkung remchang tin maia condom hman tur chungchang kan han kilh bet thup te saw ka rilru hian a vei ve thin a. A tha ber chu ka hre chuang lo, amaherawhchu a nalh em aw? Hei hian a tha lamah min hruai hruai ang em aw tih hi chu ka ngaihtuah thin a ni. A vang chu tunah hian i insum theih ngang loh chuan condom hmang ang che kan intihah hian condom hi zaa za-a him ta anga ngai tam tak an awm a ni. Tin, condom hmanna tur atana condom han fak vak ringawt mai pawh hi thil tha ber a ni em tihte ka ngaihtuah thin a. Chuvangin tunah hian condom hmang tura kan infuihna nasa lutukah hian nupa pawna sex hman te, a nih loh pawhin a hun hmaa mipat hmeichhiatna lama lo tlante hi a ti tam mai lo maw aw tihte ka ngaihtuah a. A vang chu a a zual deuh leh engmah chinchang la hre lo tan chuan zaa za, 100% safe-a an ngai a nih chuan pawisak kha kan nei dawn lo a ni. Khami a nih kha chuan thil pawi thei a thleng zawk lo maw aw tih te ka ngaihtuah a. Heng ai hi chuan a tih dan dang deuh te hi a awm em aw! A thu te hi tidanglam ta hret zawk ta ila. “Nupui pasal neih hmain sex hmang suh, nupui pasal neih hmain mipat hmeichhiatna hmang suh” tihte emaw, nupa pawnah mipat hmeichhiatna hmang suh, natna hlauhawm positive hi a vei theih a ni ti zawng hian inti ta ila self control hmang khan thil hi a kal tha zawk lo maw aw! State dangah te kan han kal ve thin a, kan han hawi a, a awm mang si lova.

Tunah chuan taxi hnung nen lam hian kan bel mai si a. Hei hi ngaihtuahna thar sen a tha lo maw aw tih te ka ngaihtuah deuh a. Tin, khalai te kha engnge tha zawk ka hriat loh laiin engnge tha ang tih ka rawn sawichhuahna ni sela. Health Dept. hi nasa takin in tang a, kan bial chhungah pawh nasa takin hna in thawk a. Tunah khilai Thingsai ah pawh PHC min sak sak a. Khi khi la commission loh a ni a, min commission sak thuai te kan han beisei ve tawh a.

Tin, Hnahthial damdawiin saw Phase-I kan sa zo tawh a. A Phase-II kan sak loh saw chuan a chhumbung hle mai a. Kan Minister zahawm tak pawhin min hriatpui a, min sak sak thuai dawn ni te in kan hria a, kan lawm tak meuh a.

A bik takin kan Minister hi ka fak duh chu khawtin mai ah hian Health Clinic din theihna turin nasa takin hma a la a ni. Chung atan chuan Health Worker te pawh nasa takin tam tak an la dawn lehngal a. A vang chu khaw te pawh ni se an damlo a, an mangang a, natna te an tuar ve thin a ni.

Khang mi te khan Sub-Centre hnai ber pawh pan dawn se km engemawzat te a lo ni a. Khatianga an manganna hria a kan Health Minister in, 'khaw te pawh ni se clinic hi chu awm rawh se,' ti a hma an la hi a ropui takzet a. Heng te hi min la dahkhah sak dawn a, hma a la te hi ropui ka ti a. Chu chu ka'n sawi duh a.

Tunah hian AYUSH building, Thenzawl ah 50 bedded te hawn a lo ni ta te hi a lawmawm a. Tin, AYUSH damdawi lampang hi a pawimawh hle in ka hria a. Saw keini bial ah pawh sawn OPD pakhat kan Minister zahawm tak hian min rawn sak sak a, a lawmawm hle in ka hria. He lampang hi kan han chulnel deuh a, keipawh an damdawi te ka hmang nasa ve a, a lo tha hle in ka hria. Chuvangin kan Minister hmalakna te hi ropui ka ti khawp mai.

Information & Public Relation, demand no.26 hi tawite han sawi leh ka duh a. Hei hi mipui leh sorkar inkara thu thlentute an ni a, a pawimawh takzet a ni. Sorkar hmalakna emaw, thil thar leh eng eng emaw thil lo thleng zawng zawng ram mipuite min hrihtute an ni a, an hmalakna hi a ropui takzetin ka hria. A pawimawh em em na chu, military coup an neihna ah chuan information emaw, broadcasting center an la hmasa thin a. Chu chuan ram mipuite an control a, chumi hmang chuan military coup hi awlsam takin a thleng thin a. Chutiang bawkin Information & Public Relation hmang

hian Zoram mipuite min zirtir a, min hrilh a. Thil thleng chitin reng hi min hriattir thin a. Chuvangin an fakawm hle in ka hria.

Amaherawhchu thil pakhat lek kan sawi duh chu, calendar erawh hi chu ka la vei reng tho a. Tlem hian a lem te deuh se, tin, a number te hi te deuh ta se. Thla kal tawh leh thla hman mek leh thla lo la awm tur hi paper pakhat hian lang thei se chuan calendar pahnih-pathum tar kan ngai tawh lovang a. Khati khan hmalam hun tur te, appointment a ni emaw, eng engemaw kha kan siam thei ang a. Hei te hi chu ti tha leh deuh se chuan a duhawm ve aw ka ti.

**(Dy. Speaker:** Hun i pel thui viau tawh a nia, tihtawp tum tawh la.)

**Pu JOHN SIAMKUNGA :** Awle, Pu Dy. Speaker, heng kan Minister zahawm tak takte demand hi ka rawn support a ni e. Ka lawm e.

**DY. SPEAKER :** Le, Dr. K.Beichhua.

**Dr. K.BEICHHUA :** Pu Dy. Speaker, ka lawm e.

Vawiinah kan minister zahawm tak tak pahnihte demand kan sawi dawn a. A thenin in sawi a, an ti leh tak tak dawn chuang lo va tih te hi a ni thin a. Mahse, Pu Dy. Speaker, kan Minister zahawm tak takte hian kan thusawi leh kan rawtna te a tha lai te a awm chuan min bawhzui sak ngei a, he ram tan hma an lak beiseina lian tak ka nei a ni.

Demand no.21 atangin ka'n tan mai ang a, Higher & Technical Mizoram hi kan hriat angin literacy rate-ah India ramah pahnihna kan ni a, a lawmawm viau a ni. Chutih rual chuan rualawh a natna lai chu Engineering College kan la neilo a, Medical College kan la neilo a, Agriculture College pawh kan la neilo a. Chutihlai chuan Vety. College te chu kan nei a, a lawmawm hle in ka hria. Quality education leh all round development Mizoram mipui in kan neih theihna tur chuan Higher & Technical system kan tuaithar a, skill development Zoram mipui hnena kan introduce a ngai takzetin ka hria a ni, Pu Dy. Speaker.

Tunah chuan Mizoram University kan nei a, kan University pawh hi a nep lo a, a chhuanawm hle in ka hria. Chutihlai chuan Govt. College hi tun dinhmunah 22 kan neiin ka hria a. Chu lovah Craft Training College kan tih, zirtirtu 2 awmna kan nei baw a. Mizoram Hindi Training College te kan nei a. Polytechnic tuna kan neih mek 2 leh district danga hmalak mek te pawh kan nei a ni. Private college 5 kan nei baw a. Chungah chuan tuna kan budget hi ngaihtuah ta ila, kan budget nikum leh kumina a

punna ngaihtuahin Higher & Technical-ah hian kan budget pumpui punna hi 9 something a niin ka hria a, ka hriat sual loh chuan. Higher & Technical-ah hian 4 something in a pungin ka hria a ni. Chuvang chuan a tlem deuh hlekin ka hria a. Engpawhnise, RUSA kan tih te, DoNER atangte pawhin kan hotuten hma la chho turah ngai ta ila. Chutiang a nih lai chuan Higher & Technical Education Dept-ah hian teaching staff shortage hi a nasa hle mai a. Hei hi sorkarin engtingge hma a lak ang tih te min ngaihtuaitir a ni.

Mizoram University ordinance-ah chuan a tlem berah teaching staff hi nichina ka rawn sawi tawh ang khan 866 an ni tur a ni tih a ni a. Tuna kan dinhmunah chuan 817 chauh kan ni a, 120 shortage a ni. Chutihlai chuan kan Rules & Regulations ah chuan 'No college shall be granted affiliation if it fails to satisfy such minimum requirement' tih a ni. Pu Dy. Speaker, chutiang a nih avang chuan hei hi sorkar hian a ngaih pawimawh viau pawh ka ring a. Kan Minister zahawm tak hian theihpatawp a chhuah ang a, hma kan sawn chho turah te pawh ngai baw k ila.

Tun dinhmunah hian UGC norms ang chuan Asst. Professor 127 fill up ngai kan neiin a lang a. Hei hi kan sorkar hian fill up thei turah ngai baw k ila. Contract Asst. Professor 15 post kum 5 complete tawh te an awm baw k a. Heng contract-a thawkte hi engtingge regularise dan tur ang chi te pawh kan hotuten an hriat ka ring baw k a. Chutiang te te chu ka rawn tarlang a.

Chutih rual rual chuan mahni bial lam sawilo thei kan ni lo a. Mahni bial theuh hi changtlung ta se chuan Zoram hi a changtlung mai dawn a. Govt. of Mizoram Higher & Technical Dept. letter no. chu ka lo chhiarchhuak lo mai ang a. Ni 28.11.2007-ah khan Saiha Govt. College saw Science stream leh Commerce stream, 2009-2010 academic session-a chhunzawm tur a tih a ni a. Chu chu a order pawh hi ka nei a Pu Dy. Speaker, ka chhiarchhuak lo mai ang a. Mahse wawiin thlengin Science stream leh Commerce stream saw kan la nei tlat lo mai a. Chu chu kan Minister zahawm tak hian kan awmna pawh saw a hla a, mi tam tak harsa tak, Aizawl pan theilo, phai lam pan theilo, 12 an pass a luhna tur nei hleitheilo tam tak kan awm a ni.

Chuvang chuan Science stream leh Commerce stream hi Saiha Govt. College-ah sawn min chhunzawmsak leh thei hram se tih kha ka ngenna ni baw k se. Chutiang chuan, hetah Aizawl-ah mi tam tak in class 12 chhim lam atang ten kan lo pass chhuak a. Kan college tam tak helai ami te hian min accomodate zo tawh lo a. An rawn

phei a, a hminga bialtu kan lo nih chuan admission te kan lo buaipui a. Chutiangah chuan kan buai viau mai a ni. Chuvang chuan district lama kan college te hi tuna kan dinhmun aia changtlung zawka hma min laksak theih chuan a lawmawm viau ang tih kha ka sawi duh a.

Pu Dy. Speaker, demand no.24, Medical & Public Health hi han sawi leh ta ila. Mizoram hi kan hriat angin kan ram a tha a, a hrisel a, population kan tlem a. Chuvang chuan Health services system kan tih fuh chuan India rama model state-ah kan siam thei ang tih hi kei chu ka dinna a ni tlat a ni, Pu Deputy Speaker.

A hmasa berah chuan kan hriat angin doctor service rules hi felfai taka kan siam a ngaiin ka hria a, kan siam tawh em aw! Ka hriat dan chuan kan la siam lovin ka hria a. Tuna bifurcation kan tih hnu hian DHME leh DHS in kan inthen ta a, chungah chuan Principal Director in a thut chilh a ni. Chutiang dinhmunah chuan kan awm a, vawiina kan awmna hmun tur chu DHME lam chuan tuna specialist kan tih ang chi ho hi an awmna tur anga option an pekna tlangpui a ni ta a. DHS lamah chuan generalist te hi an awmna hmun tura option an pek a ni a, chu chu an tih tur te pawh a ni bawk a.

Tin, DHS lamah hian a tul chuan specialist te pawh hian option te pawh an pe ve thei tho a, chutiang dinhmunah chuan kan awm a ni. Chuvangin Service Rule chiangkhuang tak sorkar hian siam sak ta ila, chutiang chuan an seniority-ah te pawh entir nan MBBS an zir chhuaha service an luh atang hian seniority count ni rawh se kan tih chuan sorkar hian nghet takin chu chu siamsak mai ila, chu aia tha zawk te kan hriat chuan thil dang ni ta se. Chutiang chuan ti ta ila a tha hlein ka hria a ni. Chutiang a nih chuan anmahni an awmna theuh tur ang an position dik taka kan dah theuh chuan kan doctor te hi hna tha taka thawk thei vek tur leh hlim taka mipui rawngbawl thei vek tur an ni tih hi a chiang hle in ka hria a ni. Chuvangin tuna kan rilrua awm ah chuan Health Service kan tih hian curative kan tih hi chu tuna kan sawi DHME lam khawih tur deuh hi a ni ta a. Curative ah hian tihdam hna chu hospital chan bikah a ni a. Chungah chuan tun kan dinhmunah hi chuan specialist hi duh angin kan la nei tha tawk lova, dama kan awm chuan tun atanga kum 5, kum 10 ah chuan specialist chauh ni lo super specialist te pawh tam tak la awm chho turah ngai ta ila. Tuna kan dinhmunah hi chuan district lam te pawh hi specialist kan neih ang te te hi sem zai thiam ila. Geographical location azir te leh hospital din hmun anga zir hian sem zai dan kan thiam hi a tul hlein ka hria a. A

chhan chu indaih tak tak hi a awm thei lova, chutiang chuan ti ta ila, infrastructure hi tichanglung ta ila, district hrang hrang a bik takin department pawimawh medicine, surgery leh gynaecologist te kan dah theih chuan an hnuai ah anmahni support tu tur leh anmahni lo puibawm tu tur chuan junior MBBS te hi an tha thawkhat viau a ni.

Chutiang chuan district hrang hrangah rualkhai takin han siam ta ila, a vai vaia kan tih theih loh pawhin priority kan pekna district te entirnan Champhai te, Saiha te ang te chu Aizawl atanga hla deuh hlek an nih avangin priority te hi pe deuh ta ila. Tin, specialist kan tih kher loh te pawh tuna generalist junior te te kan tih ang chi te pawh hi an thiamna khawrhchhuah tur hi tam tak a awm a ni. Short course training te hi pe uar ta ila. Chu chuan tuna endoscopy kan tih ang chi te, ultrasound kan tih ang chi te, dyliaasis kan tih te leh colonoscopy kan tih ang chi te leh thil dang dang ah te hian short course training pek theih vek an ni. Short course training hi district hrang hrang ami te hi pe ta ila, capital pan ngailo hian tun kan dinhmun ai hian 50% in kan natna hi a tlak phah ang a, medical re-imbusement-a sorkarin nasa taka kan sum sen nasa taka kan buai pawh hi kumkhat hnu ah chuan hetiang system-a kan kal chuan kan hniam thlak ka ring a ni. Chutiang chuan ke pen ta ila a van tha dawn em tih hi rilruah ka nei a ni.

Chulo leh ah chuan Pu Deputy Speaker, preventive leh promotive-ah hian tuna kan kal phungah chuan promotion-ah hian tlem in kan uikawm deuh hlekin ka hria a. Heng kan generalist kum 20 (sawmhnih) chuang thawk tawh te MO a la awm reng te tan chuan lungawi taka awm hi thil har tak tur a ni. An hna thawh ai hian an lungawi lohna nilenga sawi hi a awm palh ang tih hi ngaihtuahna min neih tir thin. Heng te hi an seniority ang hian promotion te pawh hi functional angin uikawm lo ta ila. District-ah hian CMO hnuai ah programme hrang hrang a awm ta a, tunlai khawvel thangchho mek ah programme tam tak a awm tawh a, programme tharte pawh a la piang chho ve zel dawn a, heng lo tackle tur hian CMO hnuai ah hian programme thawk tur hian SMO rank hi pali vel tal theuh hi dah ta ila. Chung ho chuan anmahni zawn theuhah theihtawpin han thawk ta se, a thenin Health Care kan tih lamah te pawh an thawk ang a, a thenin programme Malaria kan tih lamah te pawh an thawk ang a, TB kan tih ah te an thawk ang a, chutiang chuan an hnuai ah Sub-Centre ho kha hneh takin han enkawl mai se chuan Mizoram hi tun atanga reilo ah IMR kan tih te, MMR kan tih ah te hian India state ah

hian entawn tlak in kan siam ang a, model state ah kan siam thei a ni tih hi rilruah lian takin ka nei a ni.

Pu Deputy Speaker, chung ti tur chuan financial implication engmah a awm lo, designate tawp hi a ni mai. Vawiina an nihna ang ang hian an ni ang a, pawisa cheng khat te mah implication a awm lo ang a, lungawi takin kan dah ang a, lungawi takin hna an thawk thei theuh dawn a ni tih ka sawi duh a. Chutianga kan tih chuan vawiina kan harsatna member tam takin kan sawi te hi kan umbo ang tih hi ka rilruah a awm a ni.

Tin, nurse hi kan in daihlo khawp a, hmannah Ortho department-ah ka va kal a, nurse pahnihin chhunah mi damlo 30 kan vil an ti a. Zan lamah engzatnge? Zan lamah mi pakhat te chauhin damlo 30 an vil a ni. Khatiang kha chuan work load kha nurse te tan khan a rit lutuk a, tha taka han inenkawl hleihtheih kha a ni tlatlo mai a, a paw hle a ni. Chuvangin nurse recruitment te pawh hi tun aia chak zawk hian lak theih ni se a tha awm mang e aw tih te min ngaihtuah tir a. Kan Minister chak tak pawh hian chu chu bawhzui thei se a tha hlein ka hria a ni.

Demand no. 6-Land Revenue and Settlement Department kha tawite in han sawi ta ila. Department hian tunah hian eng ang in nge stamp duties hi a kalpui mek tih te pawh hi nakinah kan Minister-in min hrilh turah ngai ta ila. Stamp Duties Act kan neih hi rules kan siam tawh em tih te pawh kha min hrilhfiah se. Tin, chubakah hemi atanga chhiah kan lak refund leh refund loh chungchang te pawh kha min hrilh thei turah ngai ta ila. Kan Land Acquisition leh Rehabilitation Act te pawh kha rules kan siam hma in tikhan amendment a lo lut leh ta a, House-ah kan pass mai a, khangte pawh kha engtinng e rules hi a ranglama siam a, hman ran te pawh hi tul dawn hlein ka hria. JICA te, hei Aizawl atanga Tuipang thleng kawngte an lai dawn a, hengte avang hian heng rules te hi tih hma a tul viau lo maw tih te rilruah ka nei a ni. A dang hi chu han sawi zel a chakawm viau a, Pu Deputy Speaker, hun i vawng dik ang reng si a, kan hlau deuh baw si che a, ka thu tawh mai ang e. Ka lawm e.

**DEPUTY SPEAKER** : Minute 15 deuh thaw i hmang a ni. Tunah Pu Lalrobiaka

**Pu LALROBIKA** : Pu Deputy Speaker, ka lawm e. Vawiinah kan Minister zahawm tak tak te pahnih Pu R. Romawia leh Pu Lalthanzara te demand



kan sawi dawn a ni a, kan thian thenkhatte angin ka sawi rang ve thei lova, Pu Dy. Speaker, hun min pek sei deuh loh pheichuan.

A hmasa berin demand no. 6 -Land Revenue & Settlement-ah hian tawite te in sawi kan tum ang a. An work load te kan hria a, tin, vawiin-ah hian in hmun lo ram buaina chin fel tur tam tak an nei a. Dispute chi hrang hrang hengah hian land record-ah hian kan nei tha viau tawh nachungin nasa leh zuala tan an lak a va ngai em tih lai kha ka'n sawi duh a. Tin, chutih rual chuan kan economic survey-ah khan ka'n thlir a, an chanchin, an hnathawh a tam tehlu nen a in ziak tlem khawp mai a, a lungawilo zawnga han ngaihtuah pheichuan a lungawi thlak lo viau mai awm mang e ka'n ti deuh a. Tichuan, an fimkhur a ngaihzualna em em chu ka hriat reng chu thawkkhat lai khan thenawm hnaiah ram avanga buai an awm a, chu chu anmahni ve ve chu an thiam ve ve a ni, an LSC han en chuan an LSC-ah chuan. An tanhmun kha a dik ve ve. Amaherawhchu a hmunah kal lovin an demarcate nge ni lehlamin lehlam compound kha a rawn huam tel a, lehlamin a rawn huam tel baw a, an tanna ve ve ah kha chuan a dik a ni. Chuvangin anmahni department pawh hian thenawm khawveng pawh hi a chotuah thei mai dawn a nih hi a! tih te pawh rilruah a awm a, heng hi fimkhur zawkin kalpui ta sela. Tin, tax tam tak te leh registration-ah fee atanga an lakluh thenkhatte pawh kha a duhawm hle a ni. Amaherawhchu indaihlohna a na hle a, kan sawi tak ang khan surveyor-te pawh a phur chhuah pawh kha a inchuh in kan in chuh a ni ber mai a. Hetiang lo deuh hian kan indaihlo a nih rau rau pawhin engtingge kan solve theih ang tih hi kan ngaihtuah ran a ngai a ni tih kha kan Minister zahawm tak hian min lo hriat sak sela a tha awm e.

Demand no. 21-na Higher & Technical Education-ah hian kuminah kum dang zawng aiin demand ah pawh sum leh pai rawn tih chhuah hi a tamin ka hria a. Chumai bakah chuan hmun hrang hrangah college thuam thatna tur te; tin, hmun thenkhatah chuan hostel sakna tur te, sak mek te chutiang chu tam tak a awm a. Hei hi a lawmawm ka ti a, quality education kan ti ta sa sa, nasa zawka tan lak hi a pawimawh hle a, kan ram tan hmun pawimawh a ni tih kha kan sawi ve duh a ni.

Demand no.23-na Art & Culture, economic survey-ah khan kan han en a, phekkhatah hian a lo awm ve a. Amaherawhchu Christmas dawna kan chhiar thin

angin Bethlehem i te ber tawp lo ve tih ang deuh hlek khan Art & Culture department pawh te tak te a nih rualin vawiin ah chuan Art & Culture department-in Mizo rilru a hneh zia leh min influence nasat zia hi zep rual a ni lovin ka hria. Tin, kan dress chi hrang hrang ah te, kan lam chi hrang hrang an han revive chhoh leh danah te pawh hian Art & Culture hi a pawimawh em em a ni. Budget-te han en hian a beitham hle a ni tih a hriat a, mahse nasa zawka tan rawn la sauh sauh tur leh an hnathawh hi a department anga in en mai lovin Mizo zawng zawngah hian hna an thawk a ni tih lai kha ka'n sawi belh duh a ni.

Tin, Minister zahawm tak Pu Lal Thanzara demand no. 24-ah hian kan sawi duh chu lawmthu kan sawi hmasa ang a. Min duhsak hle a, kan sorkar leh Minister chak takin tunah hian PHC 2 min han sak sak a, sorkar chungah leh kan Minister chungah lawmthu kan sawi duh a. Chutih rual chuan nikum budget session-ah khan ka sawi tawh a, amah pawhin min assure a, chumi min assure chu a hlawhtlinna atan nikum kum tawpah khan kan biala khaw pakhat ah chuan Clinic min rawn hawn sak tawh a. Mahse khami ruala ka sawi min la rawn tih hlawhtlin sak loh a awm a, Saithah khuaah building kan sa vek tawh a, amaherawhchu worker kan la nei thei lova, hei hi a hma thei ang bera min rawn ngaihtuhsak turin kan duh a. Chutih rual chuan ka sawi chhuah bawk kha kan sawi leh mai mai ang a, a mawi lo lam ni lo sela, min rawn dil nasa khawp mai a, a hminga MLA kan nihna angin an VC te lokal in an rawn sawi hmasak ber leh an sawi pawr em em pakhat chu, 'Ka pu, kum hei leh chen kan nupuite leh kan mi leh sa te mi khuaah an va in phelh sek reng mai hi kan ngai thei tawh bik lo a ni, min dahsak ve ngei ngei rawh.' an ti a, chutiang chu an mamawh dan a ni. Chuvangin Saithah khuaah hian a building sorkar chakna in BADP in kan sa vek tawh a, chu chu min dah sak thei hram se kan ti a ni. Tin, keini bial a bik takin Mamit district hi IMR kan tih te, MMR kan han tih te leh Malaria death kan han tih ah te hian Mizoram tihnufulu, tihnufumtu kan ni fo a ni. Chuvangin health ah hian min ngaihtuah bik kan ngai hle a ni tih hi ka'n sawi duh a, A bik takin hnam chi hrang hrang inchawhpawlh kan ni a, Chakma te, Tuikuk te leh chi hrang hrang kan awm khawm a, chung avang chuan heng thil chi hrang hrang hi kan mamawh em em a.

Tin, a bik takin Phaileng PHC-ah khuan nichina kan thianten an sawi ang khan X-ray in kha kan sa zo diam tawh a, amaherawhchu a worker-te leh X-ray khawlte kan neihsa kha a lo chhe hlauh mai a, tunah hian tithei lovin kan awm ta a, chungte pawh chu kan Minister chak tak hian min hriatsak se tih ka'n sawi duh a ni. Tin, March ni 7 khan kan hriat angin Elderly Ward/ Upa te ward Lunglei-ah kan Minister hian a va hawng a, hetiang chi hi a thain ka hre khawp mai a. Aizawl-ah te pawh hian chaklo zawk te leh upa zawk te a chak zawk te hian kan ngaihsak hleithei bik loh lai te pawh a awm a, churang chuan a bika ngaihsakna han lantir hi a lawmawm ka ti a. Hetiang hi hmun dangah pawh hian siam zel thei ila a va lawmawm dawn em tih ka'n sawi duh a ni.

Demand no. 26-Information & Public Relation-ah hian film an promote danah te hian (hei tunlaih chuan state hrang hrang kan in tlan siak nasa ta em em a) an hmalakna hi a ropui ka ti a. Chumi piah lamah chuan prominent press representative tih ang chi te, mi senior a bika chanchinbu lama sulsutute chawimawina an han nei te hi a lawmawm ka ti a. Kum 30 chuang zet journalism-a lo cheng tawh te chawimawina an han nei a, kan House Leader pawh hian chawimawina a phu ngawtin ka ring. Journalist Association-ah te president leh a founder president te pawh kha an lo ni a, chungte pawh chu lo hriat tel a tha lo maw ka'n ti duh a. Tin, a lawmawm em em rual ka'n sawi ve leh duh chu keini bial hi a bik takin a buaithlak khawp mai a, information chungchangah hian min rawn tawiawm tur leh sorkar programme-ah te min tawiawm turin kan ti ve thin a.

Amaherawhchu, District Officer ten lirthei te an lo nei lova, an rawn kal thei si lova, 'whatsapp ten min rawn thawn mai rawh u', te an rawn ti thin a. M0ahse, khang hmunah te khan signal te a lo awm lo ve thin bawk nen, han in thawn zung zung te hi a har khawp mai a. Sorkar thu leh hla puang chhuaktu, sorkar tawtawrawt an nihna laiah khan engtingge hma kan lak theih ang tiin District Officer te pawh kha nasa zawka tan kan lak a, motor te pawh kha han thuam that hi an mamawh em em a ni tih te pawh ka'n sawi duh a ni.

Tin, Information & Communication Technology Department-ah hian ka han kai chho ve leh ang a. Anni hi Information & Communication Technology-a Mizo min hruai thlengtu te an ni a, an pawimawh hle mai a. A bik takin a hotu lu pahnih te

phei chu Mizoram mai ni lo India ramah pawh a ber ber zing ami mithiam kan han nei mai te hi ram hmangaihna kawngah an theihtawp an chhuah a, mipui zawk hian kan la thiam lo mai zawk kha a ni a. Engpawhnise anni pawh hi vawiinah hian he House chhung ah pawh hian lawmthu kan sawi hi a pawimawh tak zet zet a ni tih ka'n sawi duh a.

Tin, khawvel lo thang chho zel ah online water bill te, electric bill te leh thil chi hrang hrang mahni kutphah atanga kan han tih mai theih dan awlsam an duang chhuak tawh a. Chutiang te chu a nih avangin an chungah hian lawmthu ka'n sawi duh a. Tichuan heng demand pahnih te hi rilru takin ka rawn support a ni e. Ka lawm e.

**DEPUTY SPEAKER** : Tunge sawi ve leh ang le. Awle, Pu T.T.Zothansanga.

**Pu T.T. ZOTHANSANGA** : Pu Deputy Speaker, ka lawm e. Ka sawi ang nge sawi lovang aw ka in ti a, a chhan chu nikumah khan "Champhai Hospital thihna tlak ah min siam sak rawh u" ka ti a, ka sawi teuh mai a, reflect a nih loh bakah pakhat mah in hma kan la sawn si lova, harsatna hi kan la nei deuh reng mai a. Tunah khian kan NGO Coordination Committee-te pawh in April thla chhung ah engemaw tak kan nei lo a nih chuan 1<sup>st</sup> May atangin Champhai Hospital khi close an tum tawp mai a, khami harsatna kha tunah hian kan tawh a ni a. Inzai thiam, naupang doctor te kan mamawh a, kan tum angin kan nei thei chiah si lo hi tunah hian kan buai hle a.

Tin, Aizawl-ah an lo chhuk nasa a, inzai thiam kan neih loh avangin, Pathianni chawhnu leh zan phei hi chu damlo kan ringawt hian kan hmanhlel hi a ni mai a. Helaia kan sawi hi a sawt em aw tih hi ka rilruah te hian a awm tawh a ni. 'Lo ti lo hram hram rawh u', kan ti a, kan in nam nasa thin a, NGO-ah te pawh Chairman te kan lo nih ve tawh thin avangin lo ti lo hram hram turin kan inngen thin a. Amaherawhchu, kan in khap rei tawh a, an ti lo ve deuh hlek tawh a. Chuvangin a hrehawm kan ti khawp mai a, rawn sawi lo thei lo niin ka in hre ve deuh hlek a, kha kha min lo hriatthiam sak ka duh a. Champhai-ah inzai thiam leh naupang doctor kan nei lova, nurse kan tlachham bawh a, kan indaih lo va, Aizawl atang hian thi hian kan in thawn haw reng mai a. Khalai kha Health Department-ah hian nikuma ka sawi kha ka ring vek mai ang a, thui tak ka sawi lo mai ang.

Tin, Pu Speaker, College zirtirtu chungchang demand no. 21-na Higher & Technical Education-ah hmanni khan thahnem ngaih thu ah ka'n sawi deuh vak mai a.

Zirtirtute hi kei ka ngai pawimawh khawp mai a, politician te hian kan ram leh hnam hi humhim a ngai a ni kan ti a. (Chair an in thlak a Er. Lalrinawma Chair tir a ni ) Pu Chairman, ka lawm e. MZP kan nih lai te, YMA-ah te, ram leh hnam humhalhna kawng ah te, sorkar politician hrang hrang te pawh hian kan manifesto-ah leh kan thil tum ah hian kan ram leh hnam kan humhalh duhna ah te, ramri chungchang ah te kawng engkim ah hian ram hmangaihtu leh neitu bik ni tur hian kan inchuh hi a ni tlangpui a. Amaherawhchu, ka rilruah hi chuan hetiang a hma kan lakna zawng zawng hi a tha a, a fuh vel vek a, chutih rualin kan ram leh hnam humhimna tur tak tak hi chuan lehkha kan thiam hi a ngai a ni ka ti.

India ram sap hovin min rawn awp a, sap hovin min raw awp lai khan tal chhuah hi kan tum nasa a, ‘Sap ho chu tlem te an ni alawm, helaiah tuipei ral ah an tam hleinem’ tiin helaiah a mihring tam lam hmachhuan khan han beih deuh huk a han hneh mai kha kan in beisei a, mahse, kan hneh thei reng reng lo. Chutih lai chuan India rama kan mithiam hmasa Pu Tilak-a te ho khan, ‘ English ho hi kan hnawt chhuak ngei ngei tur a ni’, an ti a, keimahni tharum thawhna leh kan tamna hrim hrim khan a hnawt chhuak zo lo. Western education-ah khan kal turin nasa takin an in nawr ta a. Tichuan ‘anmahni thiam ang kan thiam ve a ngai a, an hriat ang kan hriat ve na atangin an tactic hi kan man chhuak ang a, chuta tang chuan kan hnawt chhuak thei ang’ an ti a, a dik chiah mai a.

Tunah pawh hian heng laia kan mistiri te leh kan chhang siam te avang ringawt hi chuan kan ram hi a boral ngawt in ka ring lo. Nichina kan hotu thenkhat ten an rawn sawi ang khan University kan neih dawn pawh khan ka ngaihtuahna thui ber chu zirtirtu qualified kan nei em tih lai tak kha a ni. Shillong-a kan awm laiin Prof. V.V. Rao chuan, ‘ Mizo te chu lehkha thiam thei tak in ni a, amaherawhchu, in Mizo professor thiam ber pawh ka zirtir chhuah a ni,’ a la ti tlat mai a. Chuvangin University kan neih dawn pawh khan kan ngaihtuah nasa khawp mai a. Shillong-ah YMA Group hruaitu ka nih lai a ni a. Ramri dai theu tak tak tur chuan lekha thiam a ngai, tunah pawh khilalah Vety. College kan han nei ve a, chutah pawh chuan Manipuri hi an thahnem em em mai a ni. NIT-ah te pawh hnam dang Manipuri an tam lutuk, tunah hian Horti College te kan han ti a, Medical College te chu vanneihthlak takin zirtirtu tur tha deuh deuh kan nei

tawh tih te kan lo hria a. Horti te, Agriculture te, thil dang tam tak te ah pawh hian keimahni atanga zirtirtu qualified hi kan nih a ngai vet lat.

Zep thu a awm lem lova, kan sorkar hmasaa ka sawi chu Geology& Mining-ah pawh hian +2 hi kan in zir tan a ngai. Kan ram leilung hai chhuak tur hian theihtawpin ONGC te leh midang dang te an lo kal a, tunah hian lei hnuai hausakna hi lo la chhuak thei tak tak ta ni ila hnam dang hian min capture vek mai lovang maw? Tunhma in Assam Digboi-ah an laichhuak a, khutah Barauni, Bihar-ah an la chhuk a, ASSU (All Assam Student Union) te pawh an harsatna ber kha a ni fo a ni. Khatiang deuh hlek khan keimahnin mithiam kan in chher chhuah hi a tul ka ti a.

Chutih rual chuan Arts line-ah, kan hotute zingah hian IAS te pawh an awm a, Central Service te pawh an awm deuh zauh zauh a. Heta thui tak kan kal na turah hian kan College zirtirtute hi kan thuam that a ngai a ni. College zirtirtu kan indaih loh chuan ram ropui kan thleng lovang tih hi ka ring tlat a. Dik tak chuan tunah hian class-a kan nau te hian kan zirtirtu te nen Mizoram kan la awm dan tur hi class chhungah hian an duang mek a ni. Napoleon-a pawh a chak loh khan, “Duke of Wellington pawh i hneh ta lo a ni maw!” an ti a. Ka sawi tawh in ka hria helaiah pawh hian, Napoleon-a chuan, “Ka hneh lo a ni reng reng lo, ka hneh loh chu Eton College khu ka hneh loh chu a ni”, a ti tlat mai a ni.

Chuvangin, Higher & Technical Education-ah hian kan Minister te pawhin post hnawhkhah te pawh an la rawn dil ang. Chutih hunah chuan Finance lam te pawh khan “Hei hi kan ram humhimna tak tak bulthum chu a ni” tia min lo approve zat zat kha chu ka duh khawp mai. Lehkha thiamna atang lo chuan kan ram hi kan humhalh tak tak lovang.

Chuvangin, keima rilruah tak phei chuan tawng mawilo ni lo sela, ka tawng lo hrethiam ula, service dang tam tak ai hi chuan doctor te leh zirtirtute hi chu kan la hnem tur a ni. Finance atang pawh hian tlang awl se ka duh leh zual, hei hi ka rilrua awm tak a ni a. Kan taksa na te tidamtu doctor te an pawimawh em em a, he kan Zoram kan chhanhim zel theihna tur hian kan Assistant Professor te an pawimawh bawk a, nichinah an rawn sawi tawh a ka sawi zui lo mai ang a. Khangah khan anni kha an pawimawh khawp mai a. Anni tello hian kan ram hi ropui takin kan awm lovang tih hi ka ring tlat a ni.

Pu Chairman, Champhai-ah khian vanneithlak takin vbc. 9 chuang zetin College kan sa a, tunah hian kan hawng thei lek lek tawh a. Building-ah na na na chuan Mizoram-ah hian a tha pawl a ni mai ang em aw ka ti a (Chairman : Minute hnih i la nei aw) Ka lawm e, ka duham lem lovang. Nakin lawkah kan Chief Minister te, kan Minister ho te nen kan la hawng thei turah ka ngai a. Khi khi in kal nikhua pawhin Champhai-in kan assest ropui ber te zing ami a ni a. A building-ah chuan a tha a, nakinah staff-te in min la rawn thum theih turin ka lo inring reng a ni tih ka sawi duh a ni.

Demand no. 6- Land Revenue & Settlement-ah khan ka rilrua ka ngaihtuaha na ka tih fo chu, Mizoram chung ni bawk si, Mizo ni bawk si, ram neilo an tam lutuk hi a pawl ka ti a. Ram theh tur kan neih reng rengin ram an neih tawh leh tawh loh hi uluk deuha tih hi tha ka ti a. Champhai-ah term hmasa te pawh a niang, tun hma te pawh a niang, ram hi an theh zeuh zeuh thin tawh, a nei leh a ti thei ten ram an nei thuah tup tup a, an duh hunah an hralh leh mai thin han hmuh hian rilru a na a. “Ti em em hian a ni maw Mizote hi kan lo duham” tih hi ka rilruah hian a awm phah fo a ni. Chuvangin, ram neilo ten ram an neih theihna turin kan Minister zahawm tak pawh hian hma han la thei hram se ka duh a. Mi thiltitheih leh a zaktheilo apiang pe lo hian theihtawpin, fair takin Zofaten ram an neih ve theih nan hma han la se ka duh a.

Tichuan, vawiinah kan Minister duhawm tak tak Pu Lal Thanzara leh Pu R. Romawia ten demand an rawn chhawpchuah hi lawm takin ka rawn thlawp e. Ka lawm e.

**CHAIRMAN :** Tunge han sawi leh ang? Pu Lalruatkima i lo sawm ang aw.

**Pu LALRUATKIMA :** Pu Chairman, ka lawm e. Vawiinah kan Minister zahawm takte pahnih Pu R. Romawia leh Pu Lal Thanzara te demand sawihona hun kan nei hi a lawmawm hlein ka hria a. Hun min pe rei deuh dawn niin ka hria a, lehlam ho sawn min thik deuhin ka hria a, chuvangin khalai chance kha kan melh ve deuh a ni. Min lo pe rei deuh ahnih pawhin a awmah min lo ngaih sak ula. Kha ka hmaa member zahawm tak khan minute khat chauh warning bell a rik khan minute hnih ila nei a ti bik a, khalai kha min lo pe rei deuh a nih pawhin lo complaint lo hram rawh u kan ti a ni.

Demand No. 6-na Land Revenue & Settlement Department-ah hian Revenue Department hi kan hriat angin chhungkaw tin mai file khawihthu an ni a, an buai khawp mai a. An buai em em karah hian thawh tur tam tak an neih laiah a dawrtute hi nu leh pa, pitar putarte an ni tlangpui a. Chuvangin, hawihhawmna kawngah te leh an muang lutuk tia an sawiselna kawngah te pawh tan an lak a ngai telin ka hria a.

Tin, Aizawl khawpui leh District khawpui thenkhatah hian Pu Chairman, SAB vawiin thlengin a la awm lova, engnge a chhan chiah sawi chian a la awm si lova. House site allotment chungchangah te, khatiangah khan harsatna tam tak mipuiin ka la tawk ni te pawhin a lang a. Chungah te pawh chuan tan kan lak thar a ngai khawp mai.

Tin, leiman khawn theih lohna khua kha a la awm a, tunah chuan kan khawn thei turah kan ngai a. A chhan chu revenue kan mamawh a, harsa takin kan intuak a, chung ang ah te pawh chuan law and order lamah tepawh tan kan lo lak zel te pawh a tul dawn a ni tepawhin a lang a, khang te pawh kha kan sawi tel duh a.

Tin, kan ramah hian lui 13 ni tain ka hria ka hriatsual loh chuan, reverine reserve-ah km 1 ve ve kha puan a ni a. Helaiyah hian luipui kam tha zawng zawng hi lo neih nan leh leilet siam nana kan hmante a lo ni si a. Helaiyah hian harsatna tam tak mipuiten an tawk niin ka hria. Permanent cultivation kan duh a, luipui kamah te leilet kan duh a. Amaherawhchu, in hmun lo ram khatiang huan pass ang kha alo siam leh theih si loh va, khatiang reverine reserve chhung a lo nih zel avang khan. Heng te pawh hi engeni kan kal zel dan tur Forest Department te nen pawh uluk lehzuala kan sawiho a tulin ka hria a. Tin, chu mai a la ni lova, khaw tam tak sanctuary kan duh avang ten kan han sawn chhuak a. Ramsa khan mihringa te zawk kha min nek chhuak niin a lang a, tun kar lamah te pawh kan ngaithla a, Ser hmun chungchangah te pawh khan Tiger Reserve forest ang te pawh khan a tiger tak tak te pawh kha a awm em maw ni le tih pawh kha ngaihtuah fe tham a awm a. Amaherawhchu, mihring zawka kha pi leh pute atanga kan chenna, kan pasaltha ti ngat teh ang, Taitesena lungahna hmun ngei te pawh kha chhuahsan turin sorkar-in ruahmanna a siam ta zel mai a. Chutih lai



chuan development kha Serhmun khuaah phei kha chuan a la kal ta zel mai an ti a, tui lak project te. Khatiang khan sorkar hmalakna project hrang hrang te insawn chhuak tura ruahmanna siam a nih lai khan kan kalpui ni te pawhin a lang a.

Tin, ka sawi fo va Pu Chairman, The Mizoram Land Revenue Act, 2003 kan han nei a. Chutah chuan vai ram dana kha a tam khawp mai a, a har em em mai a. AMC-in in sak phalna permission a pek chhuah dawn khan LSC a demand si a. Helamin LSC nei tur chuan in a sak phawt a ngai a ni an ti bawk si a. Khalai kar vel te pawh kha dan siam that ngai fello tam tak a awm a. Khang kha siamtha mai tura ka lo ngaih kha vawiin thleng hian siamthat a la ni ta lova. Hemi kawngah tepawh hian tan kan lak a ngai hle in ka hria a.

Tin, Boundary Commission kum 2/3 kal taah khan kan din a. Amaherawhchu, a report hmuh tur chiah a la awmlo nge ni, theh hmeh angin a reh ta vang vang mai a. An hmuh dan te, kan ramri fello hrim hrim te pawh an hmuh dan hrim hrim te pawh kha he House zahawm takah te pawh hian rawn pharh ve thei tawh se a thain ka'n hria a.

Tin, Revenue deparment-ah hian stamp registration te, property registration te kan han ti a, bank-ah te deposit alo ngai a, chutah judicial paper-ah affidavit siam a lo ngai a, kan vir kan vir mai a. Heng te hi mipuite tana awlsam zawka siam dan hi kan Minister zahawm tak hian min ngaihtuah pui se a tha hlein kan hria a.

Demand No. 21-na, Higher & Technical Education-ah khan han lut leh ta ila. An department hi Gazetted Officer ngah ber an ni a, an pawimawh a. Nichin ka hma ami khan a rawn sawi tawh a, tun hnaiah RUSA te kan han nei thar a, thingtlang lamah mission kal tha duh kan ngah vak loh avangin khawpui lam zirna in a buk em em thin a. Chumia kan harsatna tam tak chu Hostel tih te, tin, a thawktu quarter te pawh kha a ni telin ka hria. Hengah hian hmun hma kan neihna hmunah te hi chuan a thawktute chenna tur te hi han ruahman theih ni se chuan hmasawna rah duhawm tak a nih te pawh ka'n ring a. Kan hma lawkah Higher Secondary resulte a rawn chhuak ang a, chungah te pawh chuan zirlai tam tak admission-ah an buai leh dawn a ni. Khangah te khan harsatna kan neih loh na turin vawiin atang hian ruahmanna kan lo siam a, building sa mek te pawhin

contractor te pawhin an thawh chak leh zual theihna tur te pawhin tan la tura nawr kalto kan nih zel kha a tul a.

Tin, Pu Chaiman ni 23.8 khan office order mak tak mai a lo chhuak a, mak ka ti khawp mai a. Chutah chuan politician te thusawi phallohna, khapna ti mai teh ang, tawng mawilo ni lo sela, chu chu an rawn chhuah a ni. A paw ka ti khawp mai a, kha thil kha college te zalenna rahbehna a ni te pawhin ka hria a. A bik takin Pu Chairman, kei pawh a victim ka ni, he House zahawm takah hian ka sawi duh a. College pakhatin College Week kharnaah thu sawi turin min rawn sawm a. Amaherawhchu, zanlaiah a theih loh thu khawilai emaw atangin an dawng a, min rawn hrilh a hrehawm an ti khawp mai. Banner-ah pawh an tar vek a, keini MLA te leh zel min phuar a kha chu a mak a ni. Khatiang kha chu thleng tawh lo se ka duh khawp mai. Zirlaite hmasawna tur te leh mipuiten tling lo mah ila min thlan angin khawi hmunah pawh min sawm a nih chuan opposition kan ni emaw in ang khat vek tur ah ka ngai a, khalai a harsatna kan han tawh ang kha chu thleng tawh lo hram se ka duh a ni.

Tin, Library ah hian, hei hi a pawimawh hle mai a, digital software te RUSA hnuaiyah kan tih chhoh zel pawh a tulin ka hria a, hemi bakah hian Deputy leh Assistant Librarian RR 2015-a kan neih tawh te pawh la tihputlin a ni lova. Tin, College 10 lai in Library an la nei lo te pawh kha pawisa kan nei dawn tho bawka, henge pawh hi NASC assessment atan pawh thil pawimawh tak a nih tel avangin khang ang te pawh kha tihlawhtlin turin theihtawp chhuah a tan kan lak a tul hle in ka hria.

Tin, Art & Culture Department hi, Vanapa Hall chei tur thu ka lo hria a, a lawmawm khawp mai a. Vanapa Hall hi a sakna a rei tawh a, a thutna te pawh a nuam lo em em a. Aizawl hmel lanna, kan khual chhia khual tha kan lo lawmna hmun a nih avangin air condition thlenga chei kha a tulin ka hria. Tin, Mizoram Publication Board lamah pawh sum leh pai te dah tam deuh ni sela, a ziamite tan kan lak a ngai a. Hei hi Art & Culture tih tur nge ka hre chiah lova. Kan a, aw, b te pawh hi a bo zo ta vek niin ka hria a, phone no han inzawt ila 94361...kan ti zut zut mai a, pakhat pahnih kha a bo der mai a ni. Helai hi tu mawh nge ka hre lova, kan inzirtir a ngai a ni. State Library tha tak mai kan nei

a, chutah chuan Village Library, YMA Library te pawh han tichang lung ila. Social media-in nasa taka min nuai tak avang hian harsatna kan tawka, lehkhaziak leh chhiar min ti thachhe zo vek mai a, hei hian hun reilote ah harsatna min thlen dawnin ka hria a ni.

Pu Chairman, demand No.24-na ah hian doctor indaihlohna a nasa khawp mai a, tan lak a ngai khawp mai. A bik takin CT Scan Aizawl Civil Hospital ami a chhia an ti deuh reng mai a, hei chu kan Minister pawhin a hria in ka hria. Mipui harsa zawk te tan chenpakawm ve tur a nih avangin khawl siamthat na kawngah pawh tan kan lak a tul hle in ka hria. Tin, NHM-ah contract a thawkte hlawh rei tak kan pe thei tawh lova, pek theih dan kawng awm sela.

Tin, zuk leh hmuam dona kawngah tan kan la a, lawmawm ka ti. Vaihlo zuartute hi engtinge kan tihtawp ang a eizawna dang kan ngaihtuah sak ang tih hi i veilam ami te hian an ngaihtuah a ngai in ka hria. Vaihlo kan chin a kan la thar chhuah reng si kha chuan khap kan tum nen khan a in kalh tlatin ka hria a, chungte chu ka'n sawi tel duh a.

Tin, Champhai Hospital thihna tlak ni lo kha a rei tawh khawp mai a, district hospital thihna tlak lovin an lo chhuah der mai kha a pawka ti khawp mai. Keini chuan damdawi in ni lovin damlo tan thihna tlakin kan rawn siam ngei ang tih kha ka'n sawi duh a. Khum 100 awmna turah 74 a awm a, doctor leh nurse indaihlohna a nasa a. Tichuan Nursing School tuna an sak khi Indian Nursing Council-in a ban phun atangin a endik a, an approve thei lova, building lianpui a ding lurh ringawt mai a, khingte pawh tan lak a tul khawp mai. Champhai Hospital khi naupang specialist dah a tul a, Elevator pawh dah a tul.

Tin, I & PR-ah hian kan chanchinbu mite hi Parliamentary Studies and Training-ah hian zu training ve sela, MLA te kan training ang khan. Kan Journalist te tan pawh hmasawna a ni dawn in ka hria, a pawimawh tak zet zet a ni. Gujarat te, Maharashtra te pawhin training an neih tir thin a. A tawp ber ah chuan demand 48-na Digital India kan kalpui a, hemi kawngah hian website tlawh tlak loh department hi kan tam mai a. Service provider kan tih Airtel te, BSNL te hian min run a ni ringawt a, kan sum leh pai nasa takin min lak sak a ni. Hemi

kawngah hian mipuite kan phu ang tawk, kan va dawr ang tawk hi min pe ve rawh se, service tha min pe ve rawh se, chumi tur chuan kan Minister pawhin lo kawm khawmin lo sawipui sela, service tha min pe ve rawh se tih kha ka'n sawi duh a ni. Network busy reng mai hi chuh! (Pu Chairman, i dinglam ami te hi tun hunah hian network a busy hrih a ni e) Ka lawm e.

**Pu P.C. ZORAM SANGLIANA** : Pu Chairman, ka lawm e. Ka hmana sawitu hun hman ang zat kha min pe turin ka ngai a nia. Kan Minister te pahnih demand pawimawh tak tak kan sawi turah hian Higher & Technical Education-ah hian ka'n sawi duh chu Mizo naupang phailama kal pha lo hian khawpuiah tal College kal hi an duh ve em em mai a. District capital hrang hrangah te College tha tak tak kan nei a. Kolasib-ah te ram zau tak kan la nei a, building extension tiha naupang te tan kalna tur siama, zirtirtute nen han thuan zui leh hi thil pawimawh tak niin ka hria. Hemi kal tlanga vawiina malsawmna kan dawn ang chi hi khawtlangah hian a bikin Mizo zirlai chhuak te hian mahni khuaah malsawmna an thlen let na mit ngeia hmutu ka nih avang hian lawmawm ka ti a ni.

Kan College hrang hrang ten an hmunhma neih te hi humhalhna fel tak neih a thain ka hria a, hei hi department hrang hrangin kan mamawh a ni. Ram kan humhalh tawk lo hi a pawi em em a ni, hei hi ka'n sawi tel duh a.

Demand no.23-na ah hian tunhma ang reng kha an la ni reng in ka hre thin a, demand ka en ve thiam dan ah pawh heng Library te, thil hrang hrang kan state sorkarin hmun sawma thena hmun khat a lo tum ve hi kuminah hian ka hmu thiam tlat lova. Helai bawr hi kan Minister leh kan hotute pawhin lo ngaihtuah sela. Kan tradition te khawvela min pho lang tu leh kan hmeichhia te themthiamzia min pholan saktute, kumin Chapchar Kut-a Aizawl khawpui he department-in a hman dan tur dik taka YMA ten hman nachang hriaa min han hmanpui dan turu zia kha! Aizawl khawpuia kut kan hman tum khan Dawrpui Biakin chhak atang sawn motorin ka kal laklawh si, lammual thleng turin minute 45 kan hmang a nih chu! Kan culture te, kan ni pawimawh te kan hlut ta em em a ni. He department hmalakna avang hian kumin kut kha hmun tinreng, district tin kan hman dan han en khan he department hian kan culture ah, tradition-ah min

thanharh tir hi a ropui ka ti a, a theih ang anga tih vul zel ni sela. Vawiin ah pawh kan Minister a remchan loh hlauh avangin chawhma lam khan National Cultural Festival Vanapa Hall-ah ka han hmanpui ve a, chung atang te chuan ka kawr hak mawi tak te pawh hi min pek nachang an lo hria a, an fel hle a, lawmthu te pawh ka han sawi ve duh a ni. Chutiang chuan, he department pawimawhna te he hnam tan hian a hria a. Tin, Mizo zawng zawng min huap zo NGO,( a dang pawh an tha vek tho a), YMA-in kan kut ni vang thla pawimawh an hman thin te hian kan culture, kan tradition an tinung a ni tih a lang a, chung chu ka han sawi duh a ni.

Pu Lal Thanzara demand-ah hian han chen ka duh deuh hlek a, chu chu demand 24-na. He department kaltlang hian Pu Chairman, vawiin ah hian kum 3(thum) leh ni 28 ka nihna a ni. Ka pian kum dik tak bakah, ka pian nawn leh na te pawh ti ila a dik in ka ring e, kum 3 (thum) leh ni 28 kal ta ah khan he department hian engnge ka dinhmun tih a hria a, phaia min thawn avangin ka kidney transplant a ni a, chuang chuan ka cheng nasa deuh duh bik a. Kan Minister zahawm tak hnenah pawh hian Kidney Patient Association aiawhte pawhin thil kan thlen thin a, a takin chung chu kan han hmu mai zel a, keimah mai pawh ni lovin Kidney Patient Association zawng zawng te aiawhin Minister leh department te chungah lawmthu ka sawi duh a ni.

Vawiina kan mamawh ber kal thlitfim na tur leh building thar nuam em em, ka kal min thlak na hmuna doctor ngei nena kan kal dun pawh in, “Ka kal min thlak na hmun ai khan dialysis an tihna hmun hi a thianghlim zawk a ni ti raw”, ka ti a, ani pawhin a thianghlim zawk a ti a ni. Chuti khawp chuan India rama damdawi in tha ang kha he Aizawl khawlai ah hian min dahsak a ni. Chutiang te a nih avang chuan he department hi ka tan chuan sawi loh thei lo a ni a. Aizawl Civil Hospital bik tana hmasawna chi hrang hrang han hmuh te hi a nuam em em mai a, tuna kan sawi lai mek ah pawh Minister leh department ten chak taka hma an lakna avangin dialysis unit thar te, OPD thar te an han hawng a, dialysis tan khawl thar pali leh hman lai pahnih nen a vaiin paruk a ni ta a. An remruatna ropui em em mai chu heng natna nei mek ah hian natna inkaichhawn theih thil kha an nei ve thin tho bawk si a, chungte hman tur bik an han thliar hrang thlap mai te; kan second capital Lunglei lamah pawh heng ang tana khawl an han chhawp te, hmun thianghlim tak mai, sawilai hmun ah second capital zawka Aizawl-a ground floor a hman a nih lai khan Lunglei ah chuan hmun thianghlim

tak mai an lo ti te hi lawmawm ka ti tak meuh meuh a, lawmthu ka han sawi duh a, department hrang hrang ah pawh a tam a ni. Tin, vawiina an hmasawmna pawimawh em em, kan Assembly tan pawh tha a ka hriat chu, Aizawl Civil Hospital-ah sawn damlo harsa te leh harsalo te tan pawh, a kan tute (visitor) tan a awlsam zawk nan ATM booth an siam thar a ni. Kan Assembly pawh hian ti ve ta se Pu Chairman, keini ho hi a mamawh ber tu leh hmang tangkai tur kan ni e. Hei hi Assembly hian tih ve atan a tha khawp in ka hria.

Tin, rilru khawih em em chu post graduate student mi 20 chuang han neih hi kan ram tan vanneihna a ni ka ti a ni. Medical College kan awt em em a, mahse a tehna ah kan la tling zo si lo a. Tehnaa tling lo kan nih lai khan he laia zirlai 20 te kaltlanga malsawmna kan hmuh mek hi tih changtlun chhoh zel ni ta sela, chu chu malsawmna nasa tak a ni ang tih ka ring tak zet zet a. Chutih rual chuan Pu Chairman, internship ti lai mek mi engemaw zat kan nei a, chungah chuan state dangah chuan Guwahati Medical College te, SHMCH han ti mai ila Mizo lam in, Himachal Pradesh-ah te, Tripura, Assam, West Bengal-ah te henga ti mek te hi lawmman an siam sak a. Tun hma pawh khan he lai kan Civil Hospital-a ti mek te pawh hi lawmman pek thin an ni a, cheng 18000 ka sawi sual loh chuan, a tawp lamah phei chuan 25000 lai kha an dawng emaw ni kha aw, chutiang te chu an la ve hman zuai zuai a ni a. Tunah hian chutiang chu tih a ni ta lo a, zirlai chutiang ti lai mek chu mi 20 chuang tunah hian an awm in ka hria, internship ti lai mek kha. Heng ang te hi an duty dan te saw, hrisel lohna avangin anmahni mamawh reng kan nih avang hian kan han tlawh thin a, heng te hi kan Minister zahawm tak hian lawmman tlem a han ngaihtuah sak leh ta se tih te hi ka han sawi duh bawk a. Lawm thu sawi rual in, sawlai hmuna damlo ten kan mamawh em em X-ray khawl leh thil dang dang ah (CHAIRMAN : Minute hnih aw.) he department in malsawmna min thlen dan hi, hmun pakhat ami ringawt pawh sawi dawn ila minute 10-a sawi zawh sen loh khawp kan ram tan malsawmna min thlen a ni. A dang sawi tur tam tak awm mahse kan sawi vek seng lo mai ang a.

Tin, dialysis khawl thar pali lai kan han nei ta a, chutiang a nih chuan a hmaa thisen thlitfim darkar hnih chhung chauh an tih thin kha darkar 4 te in tih chhoh an tum mek niin ka hria a, lawmthu ka han hrilh a. Chumi atana mamawh em em chu dialysis technician a ni. Dialysis technician zir chhuak hi mi 11 lai kan nei in ka hria a,

an hming te pawh ka han nei ve ringawt a, a chhan chu kan mamawh te an nih avang khan. Chung mi 11 zingah chuan mi pahnih hi thawk mek an ni a, a dang 9 te hi kan Minister zahawm tak hian damlo te kan tam chho zel bawk si nen , a nghet ang zawnga a theih loh pawhin muster roll ang tala chhawr dan min ngaihtuah sak se kan va han lawm dawn tehlul em! Mizo hnam tlem te zing ah hian

**CHAIRMAN** : Hun a tawp a, i khaikhawm thei dawn tawh em ?

**Pu P.C. ZORAMSANGLIANA** : Member 200 chuang lai mai Kidney Patient Association-ah hian awm in, tun hnai ah ringawt pawh chatuan ram pan kan han nei ta zeuh zeuh nen, member 50 dawn lai chatuan ram min pan san an awm ta a. Heng zingah hian Pu Chairman, ka sawi duh em em chu kan mamawhnate hi midang te ai in a nasa bik a ni. Dam tha lai kha an hrisek that poh leh kal min pe tur khan doctor ten an duh bawk si a. Entirnan, ka kal ka dawn na kha kan examna chi hrang hranga a matching kan zawwna ah khan kan in match loh hniamna lai ber 92 a ni, ka va vannei em ve aw ka ti a ni, min zaitu doctor ten 50% kha a tih theih an tih lai khan! Chutianga malsawmna kan dawn laiin, na miah lo kha kan va tuar tir a ni. Chung te a nih avang chuan heng Intensive Care Unit kan tih te kha Mizoramah khang ho khan kan mamawh lehzuai a, zankhat emaw thilthu lek ah heng kidney, heart transplant te tan hian Isolation ward an tih ang chi te hi room khat emaw lek chu ICU chhungah pawh chuan han dah hran ni leh ta sela malsawmna a ni lehzuai ang tih hi thahnem ngaih thil ah Pu Chairman, ka'n rawt tel duh a ni. Chuvang chuan vawiin ah hian ka han sawi uar duh em em lai chu,

(**CHAIRMAN** : Kan inthlak lawk ang e aw.)

**Pu P.C. ZORAM SANGLIANA** : (SPEAKER : Aw, sawi rawh.) Pu Speaker, ka lawm e, vawiin ah hian he department hi ka tan leh kan chhungkaw tan leh kan damlo pui zawng zawng tan hian an belhfakawmna hi ka sawilo theilo a ni. Khawilai emaw dukhawp loh nalai te chu a awm thei e, amaherawhchu chung zawng ai chuan kan tana malsawmna an nihna hi ka sawi duh a ni. Kan district chhungah he department kal tlanga malsawmna kan dawn te hi he House kaltlang hian lawmthu sawi hi ka bat a ni ka ti a ni. Department pali lai mai min han hun thar belh a, chungah te chuan MPCDCS-ah hian a thawk turin doctor 2 leh thawktu dang 5 min dah sak a. Tin, MHP-ah hian enkawl turin doctor 1 leh staff 4 dang min dah thar sak bawk a, MPPCD-ah hian doctor 1 leh thawktu dang 2 te min han dah sak a, MPHCE-ah hian doctor 2 hemi pual hian min

dah sak bawk a. A chhan ni-a ka hriat chu kan hotute hi nuar in kan nawr ve ngai lova. NGO Coordination Committee te pawh a awm ve tho a ni. A chak ber ber leh nuar dawn se nuar huai ber ber pawh an ni ve thei tho in ka ring. Mahse kan hotute zai ngaiin an che a. Nuar miah lova an tihna rah, kan Minister hnenah, kan Chief Minister hnenah, kan hotute hnenah, department hnena an thlen hi department hrang hrangah hetah chauh lo pawh, kan hotuten an lo ngaihthlak sak thin avang hian a nuar zawng hian an nawr ve ngai lo va. Kolasib tih dan hi district dang pawhin zir ve se a lawmawm awm mang e.

Vawiinah thil dang tam tak zingah he department atang ringawt pawh hian malsawmna kan dawng tih hi bial aiawha lawmthu han sawi pahin heng RSBY-ah te, Health Care Society atang te leh malaria lo tlahniam ta te. Tin, HIV/Aids-ah erawh chuan kan percentage a chhuanawm loh khawp mai. Chuta tan pawh department te nena tang tlanga theihpatawpa MLA te kan thawhona te hi he House-ah hian ka'n sawi tel duh a. Hetiang theuh hian MLA te hmang tangkai thiam ta se hnathawhna hi a lang zel ang tih ka ring tlat. Minister zahawm takin kan bial te, kan district te mi a ngaihsakna avangin lawmthu ka sawi a. Minister pahnih ten an demand rawn pharh hi lawmthu sawi chungin pawmpui ka rawn thlawp a, ka duhsak bawk a ni e.

**S P E A K E R** : Tunge sawi leh ang ? Sawi leh tur tunge, aw Pu Hmingdailova Khiangte. Pu Piana i phar hmasa zawk maw! Pu Pianan sawi mai rawh se.

**Pu R.L.PIANMAWIA** : Pu Speaker, ka lawm e. A hmasa in Assembly Assurance Committee te Zokhawthiang daia vanduaina kan tawh champha ah nangmah ngeiin min lam chhuah sak a. Tawrhpuina leh duhsakna min hlan avangin keini ho Pu Thanliana te, Pi Vanlalawmpuii Chawngthu te aiawhin Assembly-ah hian lawmthu kan sawi a ni. Kan rilru a ngui deuh hlek a, churang chuan thil han sawi pawh a chakawm loh viau a. Amaherawhchu pawimawh leh tul te kan neih ve tho avangin tlem tlem han tarlan diat diat ka duh a.

Demand no.6-na Land Revenue & Settlement-ah hian ka hmaah khan an sawi tawh a. In hmun teh tura Surveyor min pek pawhin hruai an ngai a. Churangin thingtlang mi tan an kalna tur motor ngaihtuah leh ei leh in senso te thil hautak tak alo ni ve a. Ka hma amite sawi ang khan motor an hman tur hi pek dan ngaihtuah theih hram ni sela tih kan sawi lang tel ve duh a.



Demand no.12-Parliamentary Affairs Department-ah hian ka sawi duh chu All India Whip Conference kan nei thin a. Hemia kan thurel te bawhzui hi a awm ngai lo lutuk a. Chuvangin a Secretariat lam te hian heng hi bawhzui nachang hre thin sela a duhawm hle ang . Tin, PAD-ah hian Driver, MR in hun rei tak an chhawr tawh a, post create a ni lo a, hengte hi chu tih sak ve atan an tha a ni. Tih sak theitu Minister nih pawh thil vanneihthlak tak a ni ang tih pawh ka ring a ni.

Demand no.21-ah hian lawmthu ka sawi duh a. Shillong-a Boys & Girls Hostel-a awm tur te chungchangah hian. Tunhma khan a harsa em em a, mi langsar pha lo te tan phei chuan mamawh tak tan pawh chan a har em em a. Tun hnu ah kan Minister kaihhruainaa rualkhai leh felfai taka, a mamawh tute tana buatsaih a ni ta hi lawmthu ka sawi duh a.

Demand no.23-Art & Culture-ah hian. Anni hi YMA Library sakna min pe thei tu an nih avang hian kan mamawhna a sang em em a. Mamawh kan tam em em mai si a. Ka bialah khian library nei hi khaw 3 vel chiah an la ni a. Khaw 24-ah khaw 3 sak sak a nih chuan a bak zawng kha sak loh ala ni tih min hriat sak sela. Chungah chuan kan mamawh dan te min hriat sak a, min enzui sak a, min tihhlawhtlin sak turin kan ngen duh a. Tin, library enkawlna chungchangah lehkhabu te tha takin min pe a, kan lawm hle a. A endikna chungchangah pawh an taima in Mauchar YMA Library te an endik a. Lawmman leh Citation te an han pe thei hi an thawk tak tak a ni tih a tilang chiangin ka hria a. Fak an phu hle a, ka fak a ni.

Demand no.24-Health Department-ah hian lawmna tur leh lawm lohna tur a inpawlh nuk mai a. Kan sawi ang khan Zokhawthiang daia kan vanduai chungchang te rilruin a ngaihtuah lo thei lo va, mood a fuh vak lo a ni. Amaherawhchu tawngkam kan thiam loh deuh leh kan tih fuh loh deuh a awm pawhin min ngaihdam kan dil lawk a ni. Lawmthu sawina lampangah ti ta ilar, Darlawn-ah leh Sakawrdai-ah Doctor tha tak min pe a, kan lawm hle a. Midang pawhin an awh em em min pe phal hi kan Health Minister chungah lawmthu ka sawi a. Tin, Health Clinic-ah thawktu tur Health Worker hmeichhia 4, Upper Sakawrdai-ah te, North Khawdungsei-ah te, Lungsum-ah te, Damdai-ah te min pe a, hmabak la awm chu Zokhawthiang chiah a ni. Chutiang chuan min duhsak a, kan lawm tak meuh meuh a.

Tin, Department hian kan Minister hi tih mualpho an tum em ni ang ka ti hial a, ka rilrua a thawh danah chuan. Mauchar-ah Health Worker pakhat kan nei a. An dah atangin vawikhatmah a thawk lo va, aikal a la nghal a. Tunah hian Aizawl-ah an sawn leh a. Tin, Pehlawn-ah Health Worker mitha tak kan nei a, midangin min thlak sak bawk a. Hengte hi chu khawngaihtakin kan session chhung hian Health Minister hian an transfer order sut lehna order hi min pe thei sela ka duh khawp mai. Tin, 2008 vel kha niin ka hria a, concept paper Health Department in an buatsaihah Darlawn PHC sak na tur hi a awm vang a ni. Amaherawhchu tun thlengin sak ala ni lo va, hmun dangah sak a nih thu kan hmu tam khawp mai a. A ziak te, ziak lohah te pawh kan hria a. Chuvang chuan Darlawn PHC building hi sak that ve ni se a lawmawm khawp ang tih ka'n sawi duh a. Tin, nichina Clinic Centre-a thawktu min pekna khuaah te khan building khan min umzui sak thei bawk se tih kan ngen duh a. Tin, session hmasa lamah khan ka sawi tawh a. Darlawn-a kan MO motor kawl ve khi damlo hman chi Ambulance kha a ni a, Bolero min ngaihtuah sak thei ang em ka ti a. Kan lei leh hunah kan pe ang che u tih kha chhanna kan hmuh a ni a. Chungte pawh chu an lei leh tawh em aw tih ka hre lo a. An lo lei leh tawh khiat a nih chuan Darlawn MO ta tur kha pangpar nen hawn chhohpui theih a ni ang em? Tin, Ratu-ah khawtlangin damdawiin kan din ve a, khawtlangin doctor quarter, tuizem, electric connection te lam in kan ti a. Tin, department lam in khum te, puanthuah te a famkim thlapin min pe tawh a, Doctor hi reilote kan nei a, a awm leh ta silo a. Hei hi kan Minister pawhin min hmuhpui tawh a, min ngaihsak hle ang tih ka ring a, hei hi min ngaihsak hle tih hre chungin ka'n sawi nawn ve duh hrim hrim a ni.

Demand no. 26-na, anni hi fakna tur lam vak ka hre lo a, tanlak theih chu ni se a tha mang e ka ti a. VIP programme ang chi an cover hleithei lo tawp mai hi a beidawnthlakin ka hria a. Motor an neih loh thu te kan hre thin a. Amaherawhchu vawiin ah kan hria a, kan House Leader zahawm takin NLUP lam atangin motor 8 a pek thu te kan hria a. Tunah hian Upa pawl te tan Darshan ti thei tawh lo tih hi chhanna a ni mai bawk si a. Chuvangin hengte pawh hi ti leh thei se keini thingtlang mite tan chuan a pawimawh hle a, tunhmaa min lo tih sak tawhna ah lawmthu ka sawi tak meuh meuh a ni. Pu Speaker, ka'n Minister te pahnih demand hi ka thlawp a, pawmsak turin ka rawn dilpui e.

**SPEAKER** : Pu Hmingdailova Khiangte.

**Pu HMINGDAILOVA KHIANGTE** : Pu Speaker, ka lawm e. Kan Minister zahawm tak pahnih te demand hi thiam taka sawi sak an phu hlein ka hria a. Chutih rual chuan an department officer te an thahnem viau mai a, gallery-ah an khat hmak mai a, an fakawm hle in ka hria a. Amaherawhchu an duh zawng emaw, an lawm zawng emaw kan sawi lovang tih chu a hlauhawm viau a. Engpawhnise tul ka tih ve nalai ah chuan ka'n han kal nawk nawk mai ang a.

Pu Speaker, a hmasa berin demand no. 6-na Land Revenue & Settlement hi department-ah chuan hna tam tak awm na, hna har tak awmna a ni a. Chuvang chuan kan Minister zahawm tak pawh hian a rilru a seng a, a office-a han len pawh hian land dispute in a tibuai emaw ni chu aw tih mai tur hian a serious viau thin tih hi a hmuh theih a. Tin, hna tam tak a thawk a, example pakhat han sawi ila Hunthar veng lei tlahniam bulah khuan LSC pathum inthuah victim ka ni ve a, tih dan tur ka va rawn a 'Ka pu, engtin nge ka tih dawn?' ka ti a 'Ram dangah dilna han siam ve phawt teh', a ti a, ka'n submit ve a, nimin mai khan an verify dawn tih lehkha ka hmu a. Ka ngaihtuah vang vang a, Revenue Department-in sincere takin hna an thawk a ni tih hi ka zuk hmu a, an chungah lawmthu ka'n sawi nghal bawk ni sela.

Tin, ka rilrua ka ngaihtuah thin, term hmasa pawha ka'n sawi ve nial nual, compensation a awm dawn apiangin Revenue field staff te an pawimawh em em a. Hetah hian hna an thawhin PWD staff te nen nationalism kan sawi fo, nationalism dik tak nen hian hna thawk se a va tha dawn em tih hi ka ngaihtuahnaah a awm a. Pu Speaker, helai House zahawm taka ka member pui te hi ka rawn share a ni.

Demand no. 21-na Higher & Technical Education hi a pawimawhna te kan sawi tam tawh viau a, a dik khawp mai. He lam hi a pawimawh em em a, pawimawh lo lai pakhatmah a awm lova. Naktuka demand tur a ni nachungin han sawi a tulin ka hria a, Higher education a pawimawh rual rual hian School Education -a a mawng ber Primary School-ah zirtirtu pathum an awm chuan kan hotuten 'kha bak chu a ngaihna a awm lo' an han ti a. Middle School-ah chuan pasarih atanga sawm a tlangpuiin an awm a, an chhe ngai lova, Primary School-

ah chuan pathum an awm chuan a tawh alawm tih hi kan tawng a. A basic, a bul fundamental-a education a nih avang hian a pawimawh em em a, helam hi naktuka demand tur chu ni mahse han sawi a rem em a, ka sawi duh a. Higher Education te nen a pawimawh lam a inang reng e ka tihna a nih chu.

Tin, thil 2 han sawi duh ka nei a, Polytechnic school hi Thingdawl-ah khuan awm tura tih kha, (Thingdawl han ti ila Kolasib District a ni zawk a. Thingdawl chu Kolasib khawpui peng ve tho a nih avangin), an sa zo vek tawh a. Amaherawhchu eng ang in nge an hawn dawn hi waviin thleng in kan la hre thei lo niawm tak a ni a. A chhunga internal wiring pawh an ru zo titih tawh a, chu chu vawikhat pawh ka sawi tawhin ka hria. Kan Minister zahawm tak hian nakinah remchang a awm chuan min react thei se ka lawm khawp ang tih kha ka'n sawi duh a. Tin, private Higher Secondary School hi a awm neuh neuh a, he ramah hian. Silchar kawng Kawnpui-ah khuan private (ti mai ang) in a ding a, waviin ah chuan Gov't aided school dinhmun a ding tawh a. Khu Higher Secondary khu a tha khawp mai a, a tha ber chu ka ti ngam lo nachungin a tha ber te zing ami a ni a. School naupang pawh hi khaw hran hran atangin an lo kal a, an enkawl sen loh school naupang an hmu a ni. Khung te khu sorkar hian min provincialise sak thei sela a va lawmawm dawn ve tih hi Pu Speaker, a changtu Minister zahawm tak hnenah hian min react turin ka'n ngen bawh a ni.

Tin, Art & Culture-a hma kan sawn zia kan hmu a, a lawmawm-na lam kha chu kei pawhin ka share vek nachungin duhthawhna lam ka'n sawi duh a. Hun hmasa-ah khan Pu Speaker, Mizo pawndum-te kha subsidized rate-in kan lei thin a. Tin, darkhuang te pawh kha subsidized rate in, darmang te, PA system thlengin. Khang kha kan nei lo tih hi a ni deuh reng tawh mai a, hei hi Pu Speaker, a neih leh theih dan a awm lo em ni Pu Speaker, ka'n ti a ni.

Demand no. 24-na Medical & Public Health-ah han kal ila, mi zawng zawngin hriselna kan mamawh a. Ka hmaa sawi te ang deuh khan kei hi a mamawh ber ka ni awm e, ka taksa hi wavi 5 zai a ni tawh a, amaherawhchu Pathian khawngaihna zarah kan medical staff te, doctor te an thiam em avangin tun dinhmunah hian ka la ding a. Chuvang chuan medical department hnenah hian kan colleague Pu Zoram Sangliana sawi ang deuh khan lawmthu sawi tur

niin ka inhria a, lawmthu ka'n sawi a ni. Tin, duhthawhna lam han sawi ila, Kawnpui PHC compound khu a zau phian mai a, encroachment pawh a awm nek nek a, encroachment a awm zel lohna turin a fencing hi kan Minister zahawm tak hian min ngaihtuah sak thei se ka lawm khawp ang tih hi Pu Speaker, ka'n sawi duh a. Tin, nichina Polytechnic school ka sawi ang khan Polytechnic school bulah chiah khuan a karah lui a kal a nurse training centre kan ti nge school ka hre lo a, a awm a, chu pawh chu a building sak zawhna a rei tawh khawp mai a. Polytechnic School chhunga internal lining an ti chhe vek bawk ang khan an ru zo tawh a. Khu building pahnih khu kan hawng thei mailo a nih pawhin, a chhiat zel loh nan care taker te hi kan dah em? Vawi khat lai kha chu suggestion ka nei tawh na a, care taker thla khata tam lo tak lo pek hian major repair ai chuan a hlawk zawk kan ring deuh a ni Pu Speaker, ka'n sawi duh chu engtikah nge kan hawn dawn tih kha Health Minister zahawm tak hian min react thei se ka lawm khawp ang.

Tin, kan Health Minister zahawm tak hian a chhui chuak thei in ka ring a, term hmasaa Health Worker training pass ve tho nula pakhat hi Health Worker hmeichhe awm loh na Lungmuat khua ah a awm a, mipa chauh a awm a, a rei tawh khawp a, chu nula chu a la awm reng a, khua ami ten an tibuai khawp mai, lak theih ni sela chuan a lawmawm khawp ang tih kha Pu Speker, ka'n sawi nawn leh a ni.

Information & Public Relations, demand 26-na kha chu a chiang reng a, kan mamawh ngawih ngawih a. He Department hi khwi khua ah emaw te kan kal in sorkar hnathawh te leh sorkar hnathawh mek te, thawh zawh te han entir a hriattir theihna turin kan han sawm ve lo thei lo a. Amaherawhchu motor te an nei lo a, an lo indaihlo bawk a, a chang pheih chuan kan han in phur lawp lawp thin a nih kha. Chuvangin an changtlun ve na tur hi ngaihtuah theih ni sela, kan Minister zahawm tak hian a rilru lo hmang sela a lawmawm hle in ka ring. A pawimawh zual ang ang chu kan sawi zung zung a ni mai a Pu Speaker, kan Minister te pahnih demand hi vawiin hian pass ngei turin ka rawn thlawp a ni tih ka rawn sawi e. Ka lawm e.

**SPEAKER :** A lawmawm e, hun pawh i hmang dik khawp mai. Pu Zosangzuala.

**LT. Col. Z. S. ZUALA :** Pu Speaker, ka lawm e. Land Revenue & Settlement hi tawi te sawi ka duh a. Surveyor hi improve ngai deuh chuan ka hria a, an survey hi a accurate em em lem lo a, mahse tunlai ah equipment tha zawk an nei a, an improve thei

tur ah ka ngai a. Tin, LSC pek chungchangah hian house side nei kha LSC pek dawnin in sak phawt a ngai an ti a hman ni khan, keimahngei pawh hian ka nei a. Pu Brig. T. Sailo hunlaia phai lama kan awm laia min lo pek kha a ni a, ka hlut ve hle a. House side chauh a ni a, chu chu LSC kan dil a, mahse, 'in sa phawt rawh,' min ti a. Mahse, kan thlir vela kan bul ami te kha insak kha a awm chuang lo a, mahse LSC nei kha an lo ni deuh fur mai bawk si a, hei pawh hi fair deuh hleka kalpui theih chuan a lawmawm khawp ang.

A bik takin Mission veng bazar kan sa a, chu mi approach road siam nan mi in leina turin pawisa nuai 85, CM leh Finance Minister duhsakna in min allot a. Mahse kan hmang theilo a, hei hi kan Revenue Minister zahawm tak hian min pui a, hei hi kan lei theih ngei na tur in kan request a ni. Tin, Higher & Technical Education ah hian J. Thankima College sakna tur hmun tun hmaa brigade kan tih thin ah khan an nei a, saw lai ah sawn hma an han la dawn a, encroachment hi a lo awm leh thin a, sawng te pawh saw kan College zirna hmunsang atan hmun an lo tibuai leh thin te pawh hi a tunge diklo leh a diklo zawk hi chu sort out a kian tir theih dan awm se chu a tha hle in ka ring. Tin, lecturer recruitment hi an tih lohna a rei tawh khawp mai a, heng te pawh hi engemaw tia recruit theih dan a awm em tih kha ka han zawt duh bawk a.

Tin, Art & Culture-ah hian, anni department hi an ti tha hle in ka hria. Mizo tradition vawng himtu an niin ka hria a. Tin, phai lam atanga VIP lo kalte, Cultural Club tha tak tak an nei a, heng ho te hian Mizo dance chi hrang hrang te an lo show thin a, a ropuiin tha hle in ka hria. Helaiia thil pakhat han sawi ka duh chu kan Vakiria hi a dik tak te kha engemaw tia han hman leh dan awm thei se chuan tha hle in ka hria. Siam chawp (artificial) hi a ni deuh vek a, hei hi a to deuh pawh a ni mai thei a, mahse special deuh hleka hman tur tlem anga zawngte han neih dan awm thei se.

Tin, Medical & Public Health hi, hei hi pawimawh tak a ni a, hma nasa takin an la a, Falkawn ah. Hei hi kan lo thlir reng a. Ka bial chhung Kulikawn-ah khuan hospital kan nei ve a, a tha khawp mai a. Amaherawhchu kan doctor te a changin reilo te an awm a, an sawn leh thin a. Tin, khumi hospital khu nasa taka Civil Hospital bazar lun lai ami tanpui thei a nih avangin, khu khu kan tih that chuan Civil Hospital lun tak hi engemaw chen chu a chhawk thei dawn a. Kha kha kan Minister pawhin a hria a. A kawng siam that na tur, (khulai kawng khu a chho khawp mai a, Health-worker bus pawh

khu passengers nen chuan a chho hlei theilo a ni ber a) sum te pawh min han pe a, PWD atangin. Khungte khu min lo enpui zel turin ka han request duh a.

Tin, ITI-ah khuan Health Centre tha deuh kan nei a, an hmang tangkai hle a, emergency ah te, a veng mi leh hla deuh ami te'n an pan reng reng a. Tin, nau neihna hmun tha deuh mai a ni a, khu pawh khu engemaw tia improve dan leh han tih changkan zel dan awm thei se chu a tha a, kan hmang tangkai khawp mai, kan hlawkpui hle tih kha ka'n sawi duh a. Department dang te pawh an hnathawh tangkai dan te pawh kan hria a, department dang demand kha chu sawi tawh lo mai ila, hun tawp lam pang te a nia, chu chu ka sawi theih a ni mai e, ka lawm e.

**SPEAKER :** Aw, Pu Zawma.

**Pu VANLALZAWMA :** Pu Speaker, ka lawm e. Vawiinah kan member zahawm tak Pu Lalthanliana hi nichina kan ngaihthlak tawh ang khan, vawiin hi Zokhawthiang daia ambush an tawh cham a nih avang khan 'vawiin chu ka sawi lo ang e', a ti a, kha kha ka'n sawi sak ni sela. Thuhmahruai angreng deuha ka'n sawi duh chu, Champhai North bialtu khan thuhmahruai ka sawi ngam chiah loh a rawn sawi a chak deuha han support hi ka duh a ni. A chhan chu kei pawh ka rilruah a awm tan deuh a, helaiah hian mahni bial tan te, ram tan te, sorkar tan pawh tangkai tur nia kan hriat te kan han sawi chhuak thin a. Amaherawhchu kan Minister ten mawi angreng deuha an han tlip pawh hian a tak hmuh tur hi a vang ang reng khawp mai a. Chuvangin sawi pawh hi engemaw chen ah chuan a phur awm viau laiin a phur awm lohna chin te pawh hi a awm a, Pu Speaker, ka'n sawi ri duh a ni. Champhai North bialtu in a sawi takah chuan.

Tin, recess room ah sawn West Tuipui bialtu kha, 'I sawi dawn em?', ka ti a, 'A! nikum ah ka sawi vek tawh', a ti mai bawka. Kha kha vawiinah sawi rik ve hrim hrimte pawh ka'n duh a. Tin, kar hmasa lamah pawh helaia i vei lama thu ten kan han rawtna kha keini minute 10 te te min pe a, a wind up tute pawh hian minute 30-ah chuan zawh te pawh tum ve sela tih kan rawtna kal zel kha a ni tih Pu Speaker, kan sawi hmasa duh a.

Tichuan Revenue Minister zahawm tak chan ka'n sawi hmasa duh a. Nikum budget session-ah khan Falkawn Referral Hospital ram sahthlak chungchang kha kan sawi a. Pu Speaker, i ding lam amite leh i vei lam amite kha kan in bat viau kha a ni a. Keini i vei lam amite pheikha chuan kan sawi lawk dan chuan, 'A demand hi pass pui

lo ang', kan ti a. Amaherawhchu kan Minister zahawm tak khan wind up na lamah khan 'Theihtawp chhuah in ka lo en chiang leh ang e', a tih avang khan kan pass pui ta kha a ni a. A en pui ta em? Tun thleng hian a chhanna hi kan la dawng lova. Chu chu a remchang a nih chuan min hrilhfiaw turin ka duh a. 'Referral Hospital ram sahtlak a ni e', i vei lam ami ten kan ti a, helam in, 'a ni lo e', tiin kan inhnial kha a ni a. Khalai chungchang ah khan LSC siam chhoh te pawh kha a awm a. Khami chungchang kha Revenue department chungchang ah chuan ka sawi duh ni mai sela, a department sawitu zawng zawngin a pawimawh leh a tul te an rawn sawi tawh baw k a.

Pahnihna atan chuan Parliamentary Affairs department-a kan sawi rik leh duh chu nikum pawh khan he department-ah hian kan sawi tawh a. Assembly House zahawm takah hian Committee kan din a. Subject Committee te leh Financial Committee kan tih hi chu Assembly lam mawh a ni a. Amaherawhchu Consultative Committee kan tih taka hi Parliamentary Affairs Minister mawh a ni e, min ti a. Consultative Committee hi kan thu ngai reng reng lova, kei ka tel ve-na ah chuan vawikhat mah hi kan la thu reng reng lo, kum 3 chhung hian.

Hetiang Committee thut tul lemlo a nih chuan thiah mai te pawh hi a dik lawm ni? A tullo kan lo din a ni lo maw? Department thenkhat hi chu Minister ho in an thu in ka hria a. Minister hova Consultative Committee han thut a, thil pawimawh han sawiho te pawh a chakawm khawp mai a, he ram tan leh sorkar tan leh mipui te tan a ni a, chu chu la thut reng reng loh te pawh hi kan Parliamentary Affairs Minister khan min lo hriat nawn sak leh sela. Nikum ah pawh kan sawi ri tawh a, mahse kumin thleng hian kei ka tel vena ah hi chuan committee an la ko lo niin ka hria a. Committee pahnih pathum ah hi chuan ka tel ve in ka hria a. Chu chu ka'n sawi leh ni sela.

Tin, Higher and Technical Education hi a pawimawh khawp mai a, kei pawh kum 17 lai ka lo tei ve na a ni a, amaherawhchu hma hi a sawn theilo angreng khawp mai a. Hei pawh hi ngaih pawimawh a tha in ka hria a. Thil pakhat ka'n sawi lan duh chu kan nau pakhat hi adhoc college-ah zirtirtu ah a tang ve a. Mahse hna tha zawk kha a hmu a, ban mai kha a tum a, mahse an Principal khan 'bang lo mai teh, i hlawh hian i aiawh tur kan la dawn nia. I ban chuan Directorate-ah ka report a ngai ang a, i ban chuan i aiawh tur hi min rawn pe leh mai dawnlo tawp mai a, churang chuan bang lo la, i hlawh hian midang kan ruai dawn nia, a ti a, aikal han sawi deuh lai te pawh khan ka



rilru ah chuan alo awm a. Higher and Technical Education hi khatiang kha a la ni deuh nuaih reng mai a.

An Principal kha a fing phian khan ka hria a, a ban tir lova, a hlauh khan midang a chhawr ta mai a. Khang te kha lehlamah chuan technically chuan thil dik tak chu a ni hauh lova, mahse a department awmzia tilangtu te chu a ni mai awm mang e aw, ka'n ti a, ngaihpaawimawh a tul a. Tin, a bik takin technical wing te pawh hi kan thlahthlam lutuk deuh a ni lawm maw ni le tih kha ka'n sawi leh zawk ni sela. Thu tam tak ka sawi lovang a.

Tin, Art and Culture kha a pawimawh zia kan hria a. Art and Culture hi department pawimawh tak, ngaihsak hlauh vak si lo hi a ni reng hian ka hria a. Eng ministry-ah pawh hian a pawimawhna kan hriat lehzuol a, hei aia tihchak lehzuol a, sum leh pai te pawh kan dah hnem kha a dik khawpin ka ring a.

Tin, Information and Communication Technology department lai tak hi a pawimawh khawp mai a, hei hi a pawimawh dan ang hian kan la hmang tha tawklo emaw ni chu aw ka'n ti a, ngaihpaawimawh lehzuol ni ta sela tih kha tlar khat lekin kan sawi ve leh ni sela, Information pawimawh zia te chu sawi ngai lovin kan hre sa vek a. Nichina an rawn sawi tak mai te kha VIP kal vel ten an mi leh sa te an mamawh em em laiin anni tan kal velna hi alo harsa khawp mai kha alo ni a. Hei hi ngaihpaawimawh a tha hle in ka ring a, ka hmaa sawitute ka support a ni.

A tawpna berah chuan Medical and Health department-ah hian Medical College chungchang kha a ni a. Chawhma lamah te pawh khan kan ngaithla a, Medical College kan nei mai dawn lo niin ka hria a, tunah hian a pawi ka ti khawp mai a, a lungchhiat thlak a. He thil ah hian sorkar hmasa, kum 8 kaltaa sorkar te pawh kha kan sawi ri leh zauh thin a. Khatihlaia kan hmalakna kha tlem tlem hi ka hre ve a, vawiinah hian sawi a tul in ka hria a, Pu Speaker. A chhan chu St.John Medical College, Bangalore te nena thawhho tumna boruak kal zel kha a awm a, engchen nge a thu tawp tak hi ka hre lova.

Member zahawm tak Pu John Siamkunga alo lut hlauh a, ani pawh hi kan han sawipui thwak a, a ui ve khawp hian ka hria a. Mahse Pu Speaker, a thutna lamin a zir loh avangin a ui lang vak ngamlo ni mai hian ka'n hre bawk a, Medical College lo piang chho tur anga lang kha. A awmzia ka hriat ve ber ah chuan a hma la tu hmasa ber

leh initiative han titu ber hi chu Father Babu Joseph-a, Catholic Bishop Conference of India (CBCI) an tih, Delhi-a Catholic-ho hmunpui leh an head quarter-a an public relations officer, spoke person ni bawk, TV-ah te pawh kan hmu thin in ka ring a. Christiante tihduhdahna te alo thlenin leh Christian te nekchepna alo thlen reng reng a TV-ah te pawh a hmel kan hmuh thin, khabe hmul nei chhup kha, kha pa kha a ni deuh ber mai a. Ani kha South Indian lam mi Christian MP te hi a contact kual reng a, engemaw hlek ah min ko khawm a, engtingge kan tih dawn tiin rorel turin mi a ko khawm thin a. Chung atang te pawh chuan kan in hre ve em em a. Kha kha hma la tu pawimawh deuh mai a ni a. Medical College chanchin te a hria a, tin, Catholic activities hrim hrim chu engkim hria a ni a, pa fel deuh mai a ni a. Tin, Mizoram-in Medical College kan neih loh chungchang te pawh kan sawipui ve thin a. Tichuan ama initiative in Mizoram-ah te pawh alo zin chho va. Kan Bishop zahawm tak Pu Rotluanga hote leh khatih laia kan Chief Minister Pu Zoramthanga te nen khan kan sawi khawm a. Tin, a hnu deuh phei kha chuan St.John Medical College-a thuneitu lam te pawh a rawn chhoh pui niin ka hria a, khatiang khan hma an la a. Tin, khatih laia kan Union Health Minister zahawm tak Rama Doss hmuh tum te pawh khan hotute hnung zuiin ka kal ve a. Khami pawh khan ‘chutianga Medical College rintlak tak te nena a puitling thei ang, mahni state anga in buaipui chuan rinai chuan a buaithlak khawp ang’ tih kha alo sawi a.

Tin, ‘khatianga behchhan mumal tak neia in tih kha chuan central sorkar tan pawh anni kaltlang te pawhin sum leh pai te pawh in tanpui theih dan hi a awm a ni’ tih kha a sawi a sawi a. Khang te kha a chipchiar kal zel kha chu ka hre thuk lutuk lova. Amaherawhchu St John Medical College lam mi leh sate pawh kha han biak chian khan a tha khawp ang, lo din ve ta ula, state anga in din chuan a teaching faculty ah in buai nghal ang a, amaherawhchu kan ti ho a nih chuan kan professor lian ho te leh a thiam ho te pawh thla thum te emaw an rawn awm ang, an rawn zirtir ang a, an lo kir leh ang a, a then thla ruk te.

Helam pangin state-a tropical disease te pawh rawn zir pahin, zirlaite hnenah lecture te an rawn pe ang a, awlsam deuh zawkin a tih theih ang, tih ang khan hma kan la ho kha a ni a, khatih laia kan sorkar kha. Amaherawhchu, sorkar thar te an lo piang a, englai kha nge a tawpna chiah ka hrelo nachungin, khatiang khan hmalakna thui tak a kal tawh a. Hmanni deuha kan Chief Minister hlui Pu Zoramthanga min hrilh dan

chuan khalai kha kaltlangpui ila chuan Medical College te hi chu kan tan daih tawh ang tih a sawi a ni.

Amaherawhchu sorkar thar a lo piang a, ngaituah dan thar kan lo nei a, kan ti ta lo a ni a. Engpawhnise, tha zawk tura ngaihah kan kal a ni ang e, khalai kha kan sawi leh zeuh thin avang hian a tobul leh a awm dan kha ka hriat chin han sawifiah ve hrim hrim Pu Speaker, a tulin ka hria a. Tunah hian engpawhnise khalam kha kan kalsan chho ta a nih rau rau pawhin chak lehzuala he Medical College hi kan neih theihna tura hma lak zel hi chu thil tul a ni. A tul angin he House hian a tute pawh tumah bang awmlovin hma la ila, central-ah pawh zu nawr ila tih te kha thil tih chi a ni ang em ka hre chiah lova. Tin, a tul anga hmalak zelnaah kan tan tlan te pawh a tul takzet a ni tih kha ka'n sawi ni sela. Sawi tur tam tak a awm thei ang medical thilah hian, kawng thenkhatah Mizote hi kan changkang fu a, zirtir te hi kan nuam khawpin ka hria.

Amaherawhchu medical thil ah hian mahni ngaihndan nghet deuh lo nei ve te hi kan awm thin a. Hetah te hian thianpa te leh thenawmtan an ei lo ei ve nghal mai duh, doctor chawha ring em em, thenawmnu in 'hei hi ka ei a, ka ngeih khawp a nia' tia han ei mai te hi kan awm a, a thatna te pawh a awm a. Amaherawhchu mihring hi inang viau e ti lo chuan kan taksa siam phung te alo inang lo nasa khawp mai a. Chuvangin mi te ngeih ei ve ngawt mai kan ching te hi chu tihloh hi a tha khawp mai a, doctor rawn hram hram a tha.

Tin, mipa lam hi kan ni zual em aw ka ti a, kan inti pa lutuk hian nupui ten 'Doctor kan rawn dawn em ni, kan inentir dawn em ni?' an han tih a, inti pa a, doctor rawn duh lo tlat te hi kan awm thin a, hei hi chu intih pa navak chi a ni lo tih kha hretlang leh ila tih he House-ah hian ka'n sawi ve duh a. Tin, damdawi thiam lam han pan mai te hi hreh lo ila, chu chuan kan buaina tam tak hi a solve in ka ring a. A harsat tawh hnu ah, a tih ngaihna awm tawh loh hnu ah te damdawiina kal te kan han duh hram a, pa tam tak hian. Hei hi chu thil fin thlak a ni lo a; tin tunhmaa kan Mizo zia hrim hrim, thil sak pui pui han ei vak mai te leh puar deuha chaw han ei chiam kan ching te kha a lo tha reng reng lo va.

Tin, thosi tamna hmunah pawh thosilen zar lova mu ngam han nih te kha, tunhmaa kan intih pa thin ang kha chu tunlai khawvelah chuan a chi loh a ni, inzirtir te pawh hi a tulin ka hria, chu chu Pu Speaker, ka sawi ve theih tawk ni se, ka lawm e.

**SPEAKER** : Aw le, Consultative Committee kha koh a ngai lo a ni tih kha, a awm si chuan koh kha chu a tha mai awm mang e. Kha kha kan Parliamentary Affairs Minister in a rilruah min lo neih sak se a tha ang e. Tin, dar 4 a ri mai dawn a, Minister khaikhawm tura kan koh hmain. Vawiina kan tih tur chu zawh law law i tum ang u aw. Aw le, tunah Pu Romawia a demand hnuai sawihona khaikhawma passrawn dil nghal turin i sawm ang.

**Pu R.ROMAWIA, MINISTER** : Pu Speaker, ka demand sawihona ah khan member 16-in thahnemngai takin an sawiin ka hria a. Tin, duhsakna lam pawh a tam hle in ka hria a, khawi emaw laiah kha chuan duhthawh deuh deuh te pawh an awmin ka hria. Kan zavaia hriat turin ka wind up hmaa han sawi tur ka neih chu, inthlan dawna puang thut thin te hi kan hriat tlan a tha in ka hria a. Politic tui chawh nutin vote a hlawk tih hriatna avang hian hnam dang ngaihtheih loh te, ramri vei te hi a pung hluai a, zawl thupuan leh mumang te. Tin, lungawi lohna lantir leh kawng zawh te; tin, ram hmangaih thar thut te an awm bawh thin a. Tin, intih Mizo siak, ram inhmangaih siak vak te pawh hi a awm a. Chuvangin tun tum kan session aiin kan session lehpekah chuan hetiang thawm hi a rin deuh ka ring a, chung te pawh chu thu hmaah i phalna in kan sawi ve duh a ni.

Ka han ziaak ve hlawm a, 16 lain kan sawi avangin, a lawmawm khawpin ka hria. Luangmual khu bialtu MLA khan a ngaimawh hle a, hun hmasa lamah te pawh khan, session hmasa lamah te pawh khan a sawi a. Khuti lai khu a buaithlak khawp mai a, restricted tih chungchang pawh hi debatable deuh a lo ni a, 1971-a kan District Council lai khan District Council-in thuchhuah a nei tawh a. Chutah chuan Aizawl khaw bulhnai ami ho Luangmual te, Tanhril te, Sakawrtuichhun te kha Executive Council ti mai ila Committee, EM kaltlang lo chuan/remtihna la hmasa lo chuan VC-in ram an theh thei lovang ti khan restrict-na kha an siam a.

Tin, 1980 leh tih daih tawh ah khan thu a lo kal leh a, 1987-ah khan khulai ram khu restrict order chhuah a ni a. Tin, khami hma khan khuti lai ramah khan PWD-in Uikawng velah khan, mi te kan lo pung zel a, tiin sorkar hmun tur a tinzawn in ruahmanna an nei a. Chumi umzui chuan, khunglai Luangmual khawbul mai Remna Run tlang thleng te pawh khuan ruahmanna an han siam a, chumi umzui chuan sorkar khan 1987-ah khan, khunglai khu a han restrict thar leh a. Khami hma daih tawh PC sorkar lai

khan khulai ram khu ram lak dan mumal lovin lak vak a ni a. An pass te pawh inchhuh chuang lovin, land acquisition dan pawh hmang lem lovin, khatiang khan a buai chho ta nuaih nuaih a, mi khan an pass kha an lo la hum fur si a. Khatiang a nih avang khan khutilai khu a buai chho reng a, chutah sorkar khan, khutilaia Uikawng bik deuhah khan sorkar building eng eng emaw te pawh a zuk sa a. Mahse khatilaiah khan mipui khan khunglai ram kha an inpe ve tho va. Khatiang zel khan tun thlengin chu buai chu kan awrh chho zel a. Tichuan kan sorkar nen hnathawk ten a hmun an lo mamawh khan hmun te pawh zawn sak a ni a.

Tun kan dinhmunah tak phei chuan khutilai ram neitu GAD khan an ram chin tichiang tur khan Revenue min pun a. Revenue tan pawh tihchian a har khawp mai a, mapping te kan han ti chho leh a. Mahse sorkar building bul chiah chiah ah te khan private building te pawh a lo awm tawh a. MLA zahawm takin a sawi tawh ang khan a thente chuan LSC te pawh an lo hum ve lawi tawh si a ni. Kan sorkar kalphung chu kan hre vek a. Khatiang kha a nih avang khan a buaithlak khawp a.

Tunah hian NEDP lam atangin khutilai ram chinfel nan Revenue-ah hian ₹ 2 lakh dawn sum min han pe a, chu chuan kan surveyor te pawhin a theih chin chin chu sorkar ram chin leh mimal ram chin zuk chinfel te pawh an la tum dawn a. Mahse a huphurhawm angreng khawp a. Chutichuan khunglai khu thenkhat dilna lemah restricted area a ni a, thenkhat leh chu an pe mai bawk a, han tih te pawh kha thil ni ve ve ni. A thenah chuan restrict tih a ni a, a thenah chuan LSC kha Revenue officer emaw, Surveyor emaw te an fimkhur dan emaw, an reading dan emaw ang khan a kal a lo ni a. Tuna keini term ah erawh chuan khatiang kha a thleng tawh lo tih erawh chu min hriat sak ka duh a. Ngun takin sorkar-in a la ngaihtuah turah ka ngai a. In an lo nei a, an lo luah ve tawh a. Sorkar ram ruak tho hi mimalte kan pek chu a ni tho a, sorkar a ngilneih leh ngilneih lovah a inngat thui em em a. Amaherawhchu, a bik deuh anga awm hi a tul a. Sorkar ram anga GAD-te pawh in land lease emaw hum tur chu an nei bik chuang tlat lo a ni. Khami tak kha an buaina a ni a. Hum tur lo nei se, government department khan heti chin hi lo ti pap pap se chuan kan Dan a awm reng a, khami va enforce kha chu enforcement dan khan kan hnawtchhuak mai tur a ni a. Khatiang deuh a nih avang khan hetilai hi chu uluk taka la en a ngaiin ka ring a. Tunah pawh hma kan lak mekna a ni bawk a, ka'n sawi duh a ni a.

Tin, MLA zahawm tak Pu Chalrosanga khan Record of Rights kha a rawn sawi leh a. Hei pawh hi a hma pawh khan a vei tawh a. Record of Rights hi a part of land settlement a ni tho a. Hemi hi kan officer-te pawhin an ngaihtuah a, hemi a Record of Rights te hian keng veuh veuh mai se, hetia card kan neih ang hian, card ang khan siam mai ila tih te pawh hi ngaihtuahna a ni. Amaherawhchu, a hmaa kan kalphung ang kha suih zuih mai theih a ni lova, Revenue chu kan hre theuh a, stage chhawng duat a ni a. Sorkar-in huan hmun atan chuan periodic patta atan ram a va pe a, in hmun atan erawh chuan house pass a lo pe ta a. Miin an lo luah nghet emaw, an lo awm ngheh emaw chuan huanah pawh Agriculture LSC a lo ti a, in hmunah pawh dwelling LSC, land settlement certificate neitu nihna kim a lo pe a. Tin, sorkar emaw, NGO, kohhran lamte pawh a ni ang chu land lease zawngin a ti deuh duah ve a. Khatiang a nih avang khan henga Record of Rights hi kan danah pawh section 79-naah khan a awm ve vek tho a. Mahse, apartment building chungchang, building pakhat insem chungchang ang kha a tin zawn deuh ber a ni a, mahse a dang pawh kha a keng tel thei tho a.

Chuvangin, ram chungchangah pawh hian khatiang zawnga chinfel dan kha zawn mek a ni a. Tin, member zahawm tak, Parliament Secretary Lt. Col. Z.S. Zuala sawi kha, ‘LSC mai theih loh’ tih kha, 2013-a kan dan section 36, sub-section 3-ah hian, ‘ When a plot of land is allotted to a person in order to obtain land settlement certificate for the plot, a house shall be constructed within a period of 10 years’. Kum 10 chhungin in a sa ngei ngei tur a ni a, house pass a neih hnu ah khan, chumi hnu ah chauh chuan LSC a pek theih ang tih kha he House-in a lo pass dan a nih avangin keini depts. chuan kan zawm a tul tlat a. Chutiang chuan tun hma in engmah in sak awm si lo, hungpal pawh awm si lo, ‘ka ram,’ ti a LSC lo neih thluah mai khan vawiin thlengin min tibuai a, thubuai min siam sak hnem em avang hian kan Revenue officer-te nen kan han sawiho thin a. Engpawhnise, house pass kan pek pawh hi hung vek hi phut teh ang u, a kila lungphun thliah thliah mai duhtawklo hian hung vekte phut ila. In an sak ngeite kan phut bawh ang a. Inhmun neilo insak duh pek ni na na na tih kha kan ngaihtuahna ah a awm ve hle a. Chutiang te pawh chuan hmasawn deuh deuh, buai theih loh dan kha zawn hret hret kan duh a. Chuvangin, tunah pawh hian miin in a sak na na na chuan, ‘ inhmun ka mamawh’, a ti a, House pass a rawn dil a, sorkar-in “ i mamawh e, lo sa ta che” a lo ti a. In kha hmanhmawh deuhin a sa ta a. Thla 6-te, kar 2/3 lekah te a sa ta a, a luah ta mai si

a. Khata LSC theih loh em em hi chu a ni lovang a! He dan pawh hi en that leh a ngai a ni tiin enthat tur zingah he dan hi kan member-te khan ‘in pulut zing e mai’, min tih ang te kha kan larawn pulut leh dawn a ni. Enthat leh tur kha tunah hian kan buatsaih tawh a, cabinet-ah te a kal ang a, session lelah chuan kanrawn pulut leh mai thei a ni. Mipui tana tha tur zawnga kan ngaihna ah khan. A dangte pawh ken a la nei dawn a, min lo hriat sak ka duh a.

Tin, kan surveyor-te, kan department te pawh tunah chuan kan fimkhur viau tawh a. Ram tehna fel fumfe tak kan neih tawh avang hian, thla kan lakna khawlte a changkang ve tawh a, tuna kan han tihchhoh zel hi chu buai thei tawh lo turah kan ngai a. Dawhkanah kan han khawih mai a, satellite kaltlanga GPS-a tih a nih tawh avang khan hetia a awm na longitude leh latitude-te pawh, a ram location kha hriat zung zung theih a nih avang khan ram inchuh buai vel hi awm tawh lo turah kan ngai a, hma kan sawn chho ve zel a ni. A thawktu lam erawh chu kan indaih lo hle mai a, kan han sawi thin a, sorkar-ah pawh kan han dil thin a, mahse a harsa khawp mai a, kan ti hleithei lova.

Tin, stamp duty chungchangte pawh kha kan han ri hluai a, kan sawi ang khan khami dinhmunah khan kan la ding reng tho a. Khami stamp duty kha kan la lova, Zoram pum Evaluation Committee- in evaluation kan siam mek a, khatiangah kha chuan stamp duty-te pawh kha kan la leh dawn a ni. Tin, registration chungchangte kha chu dan hrang a lo ni leh a. Khang dan ang khan registration kha chu kan han ti a, mahse awl tur chinte pawh hi an lo awm nual a. A dan chipchiar chu ka zuk hre ve thiam lova.

Tin, MLA zahawm tak Pu Vanlalzawma sawi, sawlaia session hmasa lama lehkha te kan inhmuh kha kan han enchiang a, Health & Family Welfare zawkin ram te an han rin that leh khan an ram pawn kha a lo ni tlat mai a. Chuvangin, mi ram chhunga patta va siam sak kha a nih tak loh avang khan, ram pawn ami kha chu patta theih a lo nih avang khan kan han umzui ta lova. Pu Speaker, i veilam ami te pawhin ‘kha kha enge ni ta zel’ tih kha a awm bik lem lova. Thil a tha e, a tluang vek tawh alawm kan ti a, kan lo ngawihpui ve mai ta a ni tih kha min lo hriat sak la kan duh a.

Tin, riverine reserve chungchang kha chu hmanni khan kan sawi viau tawh a. Luidung 11 nilovin luidung 19 zawk a ni. Chu chu khami a forest clearance emaw tel lova ram kan pek theih lohna kha a ni a. Mahse chu chu a lian zawkin sorkar-in chinfel a

tum mek a ni a, chu chu nghakhlel takin keini depts. pawhin kan thlir a, kha kha lo hretlang ila a tha in ka hria a. Tin, (interruption)

**Pu K. SANGTHUAMA** : A nih leh engtik atangin nge? Hman lai atangin nge ni a, a nih leh kum 70 nge kum 40 atangin, engtik atangin nge, District Council hun lai nge?.....(not clearly audible).....

**Pu R. ROMAWIA, MINISTER** : Aw, District Council hun lai kha a ni deuh a ni. District Council hunlaia khatia an tih kha a ni a, tikhan Assam Forest-ah, khatiang khan Delhi lamah a kal ta zel a ni. Chumi avang chuan central lam in an record-ah pawh khan khami kha a lang ta zel a, chet a har angreng viau a.

Amaherawhchu Pu Speaker, a leh lamah chuan ngaw chungchang te pawh hi hnawk kan han ti viau tak na a, hnawk lemloa ngaih theih dan a awm a. Thil, thangthar zel tana ram min lo khektu, ngaw min lo khektu ang zawngte pawhin lo ngai ta ila. Bank-ah pa berin pawisa a dah a, ama hun chhung chuan hman chhuah a phal reng reng lova, a hun a lo liam ta a, a fate khan a pung nen, tikhan an lo chhawm ta ang deuh hian. Ngaw tha, teak hmun tha emaw, thil tha kan lo humhalh that na na na chuan, keini kum 30, 40-ah kan liam mai dawn a. Mahse, thangthar zelte tan ngaw, thing emaw, ngaw mai emaw atang khan eizawna tam tak a awm thei a. Chung chauh piah lamah pawh boruak tha a siamna ah hian, sap ramah te an sawi ka hriat ah chuan mi in industry lian pawh siam dawn se, kha industry-in carbon dioxide a pek chhuah theih zat, a cubic metre ang zat kha, khawi maw laiah ngaw-in boruak tha a siam theihna tur kha, khami kha an thleng thei ngei tur a ni tih te a ni a. Chuvang chuan, kan kal zel ang a, Mizoram pumpui, kan ngaw in boruak tha a siam ringawt te pawh hian ei kan la la mai thei a ni tih thleng pawh hian global warming ah hian, khawvel thang zel ah hian kan rama kan ngaw ten boruak tha a siam ringawt pawh hi a royalty ringawt pawh kha dollar millions and millions te pawh tel theih dan a awm mai thei a ni tih thlengte pawh ngaihtuahin, ngaw hrim hrim hi kan huat loh tawlh tawlh te pawh a tha mai thei a ni tih te pawh ka han sawi zau a ni e.

Tin, Higher & Technical lam kha duhsaktu aw a ring hle a. Tin, Saiha ah te pawh khan Science College te, Commerce te emaw han din duhna te pawh kha a awm a. Hman atanga ruahmanna, hei ka Pu Speaker phei hi chuan 'in ti thei dawn tawh em', a ti reng a. Kan sorkar dinhmun te a la harsa rih a. Kan rilrua awm lian tak zawk chu Aizawla Pachhunga College, University hnuai ami a rawn ni ang hian, chhim lamah



sawn Mizoram University hian hmun, campus rawn nei turah kan ngai a. Khatianga campus-te a lo neih kha chuan, hisap zelah chuan Lunglei lamah lo ti ta se, Lunglei Govt. College-a tuna kan Science College zawng zawngte pawh saw, heti laia Pachhunga University-a kan Science ang chiah khan a lo kal tawh ang a. Chutiang a nih chuan harsa lo te in Saiha emaw, Lawngtlai ah emaw khangte pawh kha a insawn pheih ve leh mai ang a tih te pawh ngaihtuahna a awm a. Amaherawhchu, Lunglei lam, chhim lamah campus, Mizoram University-in campus min rawn siam sak mai dawn emaw kan tih te pawh kha an inpeih hleitheih bik lova. Kan la nghak mek a, kan bei chu a la dawng chuang lova. A khat tawh hian ‘in tih sak theih dawn tawh em’, kan zuk ti ve reng a. Mizoram University pawh hian ‘khuti lam chu kan la nawr ve zel a, mahse in ngaih ang ngawt hi kan ni bik lo, sum hi kan harsa ve tho a nia’, an ti a. Chutiang chuan thu a la thi lo chu a ni a, a tahtawl te a tih tumna hi chu rilru-ah a awm reng a ni tih kha ka han sawi duh a.

Tin, quality education kan ti a, quality education achieve kan tum a, mithiam tak takte kan ngah tawh a. Mithiam tak tak hlir hi awm se kan tih rual khan, engemaw chenah hian harsatna kan tawh lo theih lova. UGC-in norms a siamte kan pha hleitheih lova, eng tin tin emaw khan kan han ti hram hram a. Nichina Chalfilh bialtu MLA zahawm takin a sawi ang khan NAAC accreditation an rawn tih ah te pawh hian zirtirtu kha kim thap theih kha a pawimawh em em a, chuvangin, kan thla te pawh hi a phang viau thin reng a ni, NAAC an rawn kal dawn a, kan hmachhawn dawn pheih chuan kan thla te pawh a phang riau thin a ni. Mahse, chutichung chuan, eng tin tin emaw kan ti chho theih zel a. College tam ber chu NAAC hian min rawn tihsak tawh a, Kamala Nagar tih vel te, tlemte chauh tih loh hi kan nei tawh a. An rawn tih tawh ah hi chuan hlawhchham pui thak hi chu kan awm lova, grade hniam, engemaw tal hi chu min pe ve zel a ni, chutiang chuan kan kal a.

Tin, drop out an awm hi a hlauhawm berin kan hria a. Mi lekhathiam hna hmu lo an awm hian, Manipur ram ang maiin, engmah ram dinhmun sual pawh ni si lo hian buaina zakhua hi ramin a tuar theih avangin, drop out awm lo hram hram tura thil tih hi kan han tum a. Amaherawhchu, kan college building-te leh kan teaching staff-te strength in a zo lo chung hian, ‘fan theih tawpin lo fan leh rawh u’, kan han inti a. Kan zirtirtute pawh hi an khawngaihthlak khawp a, kan zirlaite thleng pawhin. Mi in pawl 12 an pass chuan Aizawla kal ngei emaw an rawn duh ve a, Aizawl lam ami in phaia kal an

duh thin ang chiah khan. Chutiang a nih avang chuan Zawlnuam-ah te, Khawzawl-ah te, Saitual-ah te seat engemawzat la awm mah se, khang kha an nger tlat lova. Aizawl bawh hi anrawn nger leh si thin avangin, Aizawl-ah hian quality education pawh ti hleithei lo hian kan awm mai awm mang e kan ti thin a. Mahse, kan han inpawt fan hram hram a, chutiang chuan kan la in accommodate thei zel rih a.

Chutih lai karah erawh chuan member-te'n min hriat sak ka'n duh erawh chu, a torch bearer tal hi chu i siam hram teh ang u, kan ti a. Hrangbana College leh Aizawl College te erawh chu admission-ah pawh i dah thu teh ang, '2<sup>nd</sup> Division chin lo chu kan admit thei lo', an lo tih pawhin tumahin i tilui lovang u tiin anni erawh chu kan han reserve deuhhleka, engemaw torch bearer ang kha kan siam a ngai a. High School-ah te pawh dik tak chuan. St. Paul's angte hi kan High School standard siamtu an ni a, Mt. Carmel-te, Home Mission-te. Hetiang deuh hian kan graduate standard siamtu deuh siam kha tul ve a kan hriat avangin college pahnih kha chu kan han zuah ta a. College dang erawh hi chu Aizawl-ah pawh come first, serve first, lo kal hmasa sa admit tur kha kan ti ta mai a ni. Chutiang chu kan dinhmun a ni a.

Tin, chutih lai karin private-college rawn hawng te an han awm chho zel a, kan lawm khawp a. Lunglei lamah sawn HATIM a awm bakah, KT College a rawn din belh a. Tin, Aizawl-ah hian Aizawl City College private a lo awm a. Tin, sawlai Bawngkawn lamah sawn College pakhat a awm bawh a; tin, khutah Lengpuia St. Xavier's College kha hawn tan tur a ni a. Tin, Vaivakawn tlangah Helen Lowry kha College-ah an upgrade dawn bawh a. Khang avang khan kan nau, pawl 12 han pass thar leh turte pawh seat accommodation chungchangah chuan a harsa lo turah kan han ngai nghal deuh ringawt a, chu chu kan han tih chhoh ve dan a ni a. Engpawhnise, hengah hian drop out an awm loh dan tur hi kan han ngaihtuah hram hram a ni.

Tin, Librarian chungchang hi chu, kan indaih lo khawp a. Heti laiah pawh hian a chhan leh avang, keima mimal in ka ngaihtuah dana ka han chhut chhuah ah chuan, khawtlang ten thahnem ngaiin private college-te kan han din nawk nawk a. Chutah chuan, staff kha a tlem thei ang bera in enkawl chhoh kha kan han tum ta a. Tichuan, sorkarin min buaipui ta a, sorkarin an la ta a, sorkar in an lak khan college tam tak chu Governing Board te pawh kan lo fing tawh lo a lo ni thei a. Engpawhnise khata an strength-ah khan Librarian lo nei tel lo kha an awm ta a, sorkar in a lak tawh hnu ah

kha chuan Librarian post create leh kha a harsa em em tawh a, recurring expenditure kha sorkar lam chuan a lo thlir lo thei tawh si lo a. Chuvang chuan college tam tak hi Librarian neilo in kan awm a. Tunlai thiamna sang zawkah te phei chuan Librarian te hi an pawimawh em em a, computer khawih keuh, download mai, lekhabu lian pui pui inpawm hnawk ngai tawhlo te kha a ni tawh a. Chutiang ah te chuan kan mamawhna a sang khawp a, sorkar ah te pawh kan han dil tang tang a, a remchan hunah te chuan min la tihsak turah kan ngai a.

Tin, hostel han sawi kha, hostel te pawh hi a pawimawh khawp mai a, zirna atmosphere siam turin a pawimawh em em a, chung ah te pawh chuan hostel te pawh hi tam zawka la neih te pawh hi rilru ah chuan a awm a ni. Tin, chutihlai karah Aizawl khawpui ah hian hmun a awm mang lo a, kan pi leh puten thahnem ngaia an rual awtin college an han siam a nih avangin compound nei mang lo a han tih naw naw kha a ni a. Chutih laia Sikulpui compound-ah Aizawl College te a rawn piang ve tawp a. Tin, Pu T.Roman-an ama inah T.Romana College te a pian tir ve tawp ang kha a ni mai a. Chutiang chuan Johnson College te pawh a lo piang tawp a, Aizawl West College te pawh Dawrpui Vengthar Middle School area-ah a lo piang ve tawp a. Aizawl North College ni se DIET compound-ah a lo piang ve tawp a. Khatiang reng reng kha kan nih avangin kan College te hian ram an neilo em em mai a, chuvangin Aizawl khawpui ah hi chuan a sang zawng, a chhawng sang zawng te in chhawng 7, chhawng 8 tinzawna kan sa thei a nih loh phei chuan kan hmun hma hian min zo lo khawp mai a. Engpawhnise hei hi chu ram mamawh ang zelin kal chhoh kan tum ang a, ram ruak hi a awm tawh si lo a, khang te pawh kha kan in hriatpui tlan a pawimawhin ka hria a.

Tin, Art & Culture chungchangah khan, theihtawpin hma kan han la ve a. Amaherawhchu, keini chu a hming hi a ropui a, tang ang deuh a ni a, kan thawm hi a na a, a takah hi chuan eng vak kan ni lova, sum pawh hi kan nei lova. Khuti lamah NEZCC lam atangin, ‘festival lo buatsaih rawh u, chumi khami lo buatsaih rawh u’, an tih chuan kan lo organize a, annin sum min rawn tum vek a. Tin, kan naute pawh khuti lai Delhi, Central lama Cultural Ministry lam in ‘foreign-ah Mizo lam mite rawn tir ve rawh u’, an tih pawhin heti laiah kan lo buaipui a. Tichuan, hmanni lawkah te pawh khan Lily Veng Cultural Club te pawh Nepal-ah an va zin ve mai a. Keini kha chu enabler ang lek kha kan ni mai a, department atangin sum thehchhuah tur kan nei lova.

Chutiang bawkin library chungchangah pawh, khawtinah kan YMA ten library an han siam a, public library kan ti ve mai a. Chungte pawh chu keini te chuan han thehchhuah tur nei ta lo chu, Rajaram Mohan Roy Library foundation lam atang khan sum minrawn pek chuan khang atang khan thawm kan han nei ve a. Library building leh lehkhahu tha nia kan hriat te kan han lei ve a. Chutianga han ti mai chu kan ni a. Tin, Upa Pawl an ni emaw, Cultural Club an ni emaw, Mizo thawmhnaw te an mamawh em em a, subsidy-a han tihna tur te pawh, an Darkhuang ang chi te thleng pawh khan han tihna tur kan nei mang miah lova. Tun tum kan budget-ah phei chuan khang kha kan neilo a ni i ti mai ang. Mahse kan hotute'n min hre turah ngai ila. NEDP atangin emaw, supplementary demand lam atanga take care thei turah kan ngai a. Khatiang khan RRLF lo do letna tur, tunhma chuan 15 lakh te min han pe a, tun tumah phei chuan pakhatmah kan budget-ah a lang ta lova. Chutiangin, GIA ami ang chi, puan va leia subsidy-a kan han pek chhawn lehna ang chi pawh kha a lang ta lova. Tin, publication-ah te pawh, Mizo awm chhuak ngei lehkhahu tha te kan han lei leh chhutsakna angah te pawh khan cheng khatmah kan nei ta lova. Amaherawhchu, kan budget pumin pawisa a ngah alawm, chuta tang chuan kan intawm tur pawisa chu min fun sak tel ang, kan ti ve phawt mai a ni, kan thlaphanglo ve ringawt. Chutiang vel chu kan ni a. Engpawhnise, hengah hian kan hnam zia, kan culture te humhalh zel a tul a, mahse keini hi chu thil hlui lam hi kan um a. Khitilai Vangchhe-lama meihawl pawh kha khutah America-ah an zuk test tir a, a hlui zawng kha 1500 AD vel ni awmin carbon test-ah khan anrawn hmuchhuak a. Chuvangin, 1500 AD-ah khan Lallula'n Thlanrawn Pawi a run kha 1750 AD kan ti a, chumi a run hma fe kum 250 vel sulhnu awm daih chu a lo nih hmel e, carbon test atang chuan. Chutiang chuan thil hlui te kha theih ang angin kan han humhalh a, mahse chungah te pawh chuan a pawimawh ber chu, a ram leh a hmuna awmte'n neitu chan changa, khang thil hlui humhalh angte pawh kha an lo enkawl that zel a pawimawh in ka ring a. Chutiang tur chuan kan YMA te, kan MUP te, kan Cultural Club te leh khang hote pawh ka ngen duh a. Hmun hlui humhalh hram hram te pawh hi, a neitu chan changa an lo enkawl zel kan beisei a ni.

Chutiang deuh chuan PAD department in driver nghet a neih vena tur lam kan Dy. Chief Whip Pu RL Pianmawia'n a sawi kha lo hriat tum ila. Tin, Consultative Committee kha PAD lam chuan kan han siam ve thliah thliah a, kan han siam pawh khan

Speaker phalna kan la in ka hria a. E, la lo maw, Committee dangah a ni maw khangah khan department tin kha chu kan han vuah thliah thliah kha a ni a. Kha kha department changtu hon'ble Minister ho khan bengvar chhuah emaw, Commissioner Secretary ten bengvar chhuah a ngai a ni. A dik tak chuan department hian MLA te thluak hi kan mamawh em em a ni, Consultative Committee-ah hian tih kha hria ila, tul a nih chuan khang kha kan lo in-remind dawn nia Department head-te hnenah pawh. Khatiangte khan khang kha hriat reng lo tum ila.

Awle, sawi tur chu tam tak a awm a. A tul chuan kan la inzawh belh zel ang a, kan achievement lampang te pawh han sawi chu a chakawm a, achievement kan neih ve te tete han sawina remchangah han hman pawh kan duh hle a. Mahse chung chu kan sawi lovang a.

Thil pakhat erawh chu min barakhaih deuhtu tukinah khan dawn kan han nei nawlh mai a, hetilai ka thut tawh hnu ah khan. Mamit-a kan District Revenue Office kha March ni 26 khan misualin an lo rawk a, chu chu hetiang hian kan chhiar chhuak ang e:

Ni 26 March, 2017 (Pathianni) zanah Mamit LR & S building chhungah misual tu tih hriat loh an lut a. Office Treasury chest zai chhiain a chhunga pawisa awm zawng zawngte lak bo vek a ni. Office pawisa bo zawng chu a hnuai tarlan ang hi a ni a ti a

Tax-ah	-	1,30,000
Non Tax-ah	-	14000
Diversion fee-ah	-	14300
OE-ah	-	26000
A vaiin	-	184300

Kha kha a ni a. Chhiah khawnte hi Revenue Assistant ten an thehluh veleh chalan hmangin deposit nghal zel a ni a, ni 24 (Zirtawpni)-a chhiah khawn submit hi deposit hman a ni lova. Office building rawk chungchangah hian Officer Incharge, Mamit PS-ah First Information Report (FIR) a pe nghal a ni tih kha Mamit lam atanga kan Assistant Resettlement Officer Isaac Lalrempuian min rawn thawn a, hei hi House kan hriattir a. A pawl thin khawp mai, khawvela sualna awm hi a inpuang zel a ni. Chuvang chuan heng thilte pawh hi he House zahawm tak khan min hriatpui kan duh a. Revenue-in ₹ 184300, kan chhiah khawn, harsa taka kan chhiah khawn chu misualin

min lo laksak a ni. Chutiang chuan Pu Speaker, ka duhtawk mai ang e. (SPEAKER : Pass dil rawh le.)

Pu Speaker, ka demand no 6-na Land Revenue and Settlement, 2-na Parliamentary Affairs Department, 21-na, Higher and Technical Education Department, 23-na Art and Culture Department, a vaiin 2,32,16,53,000 hi he House hian lungrual taka min pass-sak turin ka dil e.

**SPEAKER** : Awle tunah khan kan Minister zahawm tak Pu R. Romawia'n a demand nos. 12, 21, 23 hnuiaia Department pathumte 2017-2018 chhunga pawisa hman tur, a vaia belhkhawm ` 2,32,16,53,000 he House pass pui a rawn dil a. Pass remti zawngin 'Remti' ti rawh ule. (MEMBERS : Remti) Remti lo kan awm em? Kan awm lo. Tichuan Pu R. Romawia demand nos. 12, 21, 23 hnuiaia Department te pawisa hman tur a vaia belhkhawm ` 2,32,16,53,000 chu he House hian lungrual takin a pass ta a ni tih ka puang e.

**Pu R. ROMAWIA, MINISTER** : Pu Speaker, ka lawm e.

**SPEAKER** : Tunah chuan Pu Lal Thanzara, Minister zahawm takin a demand hrang hrangtea sawihona awm kha lo khaikhawm sela, a tawpah pass rawn dil nghal mai se a tha ang e. Amah i sawm ang.

**Pu LAL THANZARA, MINISTER** : Pu Speaker, ka lawm e. Pu Speaker, niminah khan kan Minister zahawm tak Pu Mathana khan dar 7:00 -ah chaw kan ei thin a ti a, a hmanhmawh vak lova. Kei pawh vawiin tlaiah hian mikhual chaw ei tur ka nei a, dar 6:00-ah doctor private clinic-ah an inentir dawn chauh lehngal a, ka hmanhmawh vak dawn bik lo a ni.

Amaherawhchu kan department a bikin Medical and Public Health tih angte hi chu kan hmalakna, programme hrang hrang leh thil dang dangte sawi tur a tam a. Chu bakah heng ICT te leh I& PR-ah te sawi tur a tam a. Heng zawng zawng hi sawi tur chuan Pu Speaker, Special Assembly Session koh a ngai hial ang, ni khat vel. Chuvangin ka sawi vak lo mai ang a. Member zahawm tak tak ten an hriat duh an rawn sawi te chauh kha rawn react kan tum ang a, hun rei lak chu ka tum dawn lo a ni.

Pu Speaker, chawhma lama zawhna kha khawngaih takin i phalnain kan chhang lawk ang a, "nakinah kan inhrihfiah dawn nia", ka tih Pu Piana biala Sub-Centre

sak chungchang leh kha vawiinah pawh kan hriat angin, vanduinah tawh ni champha a nih kha. Khami tuma an kal a an tlawh te, Sub-Centre Clinic, Chhanchhuahna Khawpui kha sak zawh tawh a ni a.

Tin, Thingsat leh Khawpuar ami Sub-Centre te sak mek a ni. Tichuan Lungsum te, Damdiai te, Zokhawthiang te leh Upper Sakawrdai leh Khawdungsei te hi kumthar lamah sum awm dan azira sak tum a ni tih kha member zahawm tak Pu Lalruatkima zawhna kha kan chhang hmasa a.

Tin, member zahawm tak Dr. Beichhua zawhna ka chhanna tlem han siam dik ngai a awm a. Aizawl Civil Hospital atangin Referral atan khum lak pheh a awm em tih kha 'awm e,' kan ti a. Ka lo chhang diklo deuh hlek a, min lo hrethiam sela. Aizawl Civil Hospital atang ni lovin Central Medical Store atang zawkin khum te hi lak pheh a ni tih kan sawi hmasa a ni, Pu Speaker.

Medical & Public Health chungchangah member tam zawk ten kan hmalakna te min fakna thawm kan hre deuh zel a, a tam zawk 98% atangin. Heng hi kan department-a thawktute thawhrah a ni a. Chuvangin Department-a thawktu zawng zawngte chungah kei pawhin lawmthu ka sawi hmasa bawh a ni.

Tichuan kan senior member zahawm tak Pu K.Sangthuama hriat duh, Aizawl Civil Hospital-ah X-ray film hman tur awmluh chang a awm a, hei hi mirethei ten an tuar a ni a tih kha, nia, engemaw chenah a dik ang.

X-ray film hi RKS fund atanga lei thin a ni a. Tun hnu ah chuan miharsa zawkten an tawrh tawh lohna turin hetiang X-ray film supply hi improvement neih kan lo tum dawn nia.

Tin, dialysis improvement a ngaih pawimawh thu a rawn sawi a. Keini pawhin kan sawi ang khan dialysis lam ah hian mamawhtu an tam avangin improvement hi nasa takin kan tichho a. Chuta tana pawimawh hmasa ber chu keimahni Mizo doctor ngei, khalam thiam kha kan neih a ngai a.

Chumi chu hre rengin GMC, Guwahati-ah Dr. P.C.Lalawmpuia thla 6 chhung training tura zu tirh a ni a, a rawn zo tawh nghe nghe a. Chutiang chuan dialysis lam ah pawh hian hma chak taka lak a ni a.

Tin, kan ngaihthlak ang khan tunhmaa khawl 3 awma 1 chhe deuh renga 2 chauh kan kalpui thin kha tunah chuan khawl thar 4 neih belhin, khawl 6 hmangin Aizawl Civil Hospital-ah hian dialysis hi kalpui mek a ni.

Hemi ah hian kan senior member zahawm tak Pu Zoram Sanglianan hetiang khawl kan neih belhna tur atan hian contribution a nei sang hle a. Amahin a sawi ang khan a kal an thlakna hospital-a an hotute hnenah ngenna siamin, annin a ngenna ngaipawimawhin heng khawl te hi Civil Hospital-ah min rawn pek belh a. Chuvangin vawiinah hian kan member Pu Zoram Sangliana chungah pawh lawmthu kan sawi a ni.

Tin, rulchuk chungchang kha kan hriat tawh angin rulchuk-avanga damlo te hi RSBY leh Health Care Scheme hnuaiah hian khatiang ang, zu in leh zu avanga thi ni a ngaih te, khatiang harsatna tawh te, natna tawh te ang te kha chu hemi tanpuina hian a cover lo a. RSBY leh Health Care hnuaiah hian bill phalloh awm zing ami HIV leh Aids, zu leh drugs avanga natna te hi a ni chungin, Sairang-a rulchuk chungchang kha hriatsual palh te a awm nge ni, kan lo enchiang leh dawn a ni tih kha member zahawm tak ka'n hriattir duh a ni. Tin, tunhnu ah chuan hetiang hi thleng tawh lo turin hma kan lo la ang tih kha kan hrih duh bawh a.

Member zahawm tak Pu Chalrosanga khan demand no.24-ah Medical Officer 26 te hi lak thuai ni se tiin thahnemngai takin a thahnemngaih thu a rawn auchhuahpui a. Ni e, hemi atan hian hmanna kan sawi tak ang khan House Leader zahawm tak, Chief Minister, DP & AR Minister ni bawkin hemi lak phalna hi min pe tawh a. Tichuan MPSC lamah hun remchang hmasa ah a rang lama hemi recruitment hi min tihsak turin sorkar atangin kan lo ngen dawn a ni.

Tin, Er. Lalrinawma member zahawm tak khan RSBY tender document chungchangah rawn sawi a neih kha agreement item nen a inthlau tih kha kan lo enfiah ang a. Tin, Health Care leh RSBY delink hi tunah rih chuan a la tih chiloh deuha hriat a ni. RSBY bikah khan ka'n sawi zau duh chu RSBY hi 2017-2017 atan extend leh tum mek a ni a, Item-a tello hmaih palh kha en that a ni ang a. Tin, MoU tharah pawh chuang tello hmaih palh te chu lo thun luh kan tum dawn a ni. Tin, extention kalpui zel a ni a, a chhan chu central level atanga tih a ni a. RSBY hi kan hriat angin National Health Protection Scheme-a thlak tum mek a ni a, chumi in a cover theih tur pawh cheng



nuaikhat vel ni tura beisei a ni a, hei hi keini pawhin nghakhlel takin kan thlir mek a. Tin, RSBY leh Health Care kaihkawp hi RSBY-ah ₹ 3000/- hi cash-less in a awm bawk si a, hei hi damlo tan a itawm tham bawk si a, chuvang chuan health care scheme nena kaihkawp zel rih hi damlo te tan tangkai zawka ngaih a nih avangin la kalpui zel tumna a awm a. Chutih rual chuan Private Hospital-ah te pawh in sang marin, RSBY hi a nihna ang taka kalpui tum ve se tih hi keimahni a department lamin kan duhdan leh ngenna chu a ni. Tin, health care rate revise chungchang hi keini pawhin a hun kan ti tawh hle chungin, a sum hnar lampang zawk hi kan hriat angin ADB loan interest atanga kan hmuh a ni a. Kha mi kha a pun si loh chuan a rate kha han tihsan ngawt kan ngam rihlo a ni. A mamawhtu damlo tam zawkin an hman theihna turin a rate hi a la hniam rih lo thei lova. Chuti chung chuan department hotute nen remchangah Finance lama kan Minister te leh kan hotute nen la sawiho a, helaiah hian corpus fund hi state fund atanga tih pun dan min ngaihtuah sak chuan, a rate pawh hi la tih pun theih rin beisei a ni. Member zahawm tak Er. Rinawma thahnem min ngaihpu naah lawmthu kan sawi a, tunah hian member te'n kan hriat atana ka duh chu, enrollment registration hi kalpui mek a ni a. Mahni bial theuh ah hemi chhung hian inziak lut turin mipuite hriattir ni se, a nih loh chuan kan mamawh hunah hian an rawn kal a, an lo inziah luh si loh hi chuan tanpui ngaihna a awm thin lova. Chuvangin, helamah hian member zahawm tak tak te mahni bialah theuh awareness campaign min lo neihpu turin kan sawm che u a ni.

Member zahawm tak Pu R.Vanlalvena khan drug testing laboratory chungchang a rawn sawi chhuak a. Kha kha tunah hian central atangin cheng vaibelchhe ruk hemi atan hian hmuh tawh a ni a. A khawl leina tur leh a building sak na tur atan hei hi min pek a ni a, a building hmun tur hi tunah hian sorkarah kan dil mek a, hmun min pek theih velel hei hi sak nghal a, hmalak tum a ni.

Tin, member zahawm tak Pu T.Sangkunga khan heng Khawbung leh Sesih te, Bungzung-ah te Medical Officer dah thuai tura min ngenna kha tunah hian kan hriat angin kan indaih lova, doctor te kan neih belh hunah chuan mamawh dan azirin rawn ngaihtuah kan tum ang a. Tin, nurse te pawh dah belh kan tum a ni, heng hi sorkar atangin a nih loh pawh in National Health Mission atang te pawhin lak dan kan lo ngaihtuah dawn nia. Tin, Health Woker kha tun atanga reilote ah kan lak theih tawh kan beisei bawk a.

Tin, clinical establishment chungchangah khan hei hi sorkarin hma a la mek bawka a ni tih ka'n hrilh duh a.

Member zahawm tak Pu Ngurdingliana khan infrastructure development lamah hian hma chak zawka lak ni se a tih kha, wawiinah hian Health Department tluka department mal khaih chuan infrastructure lama hma la nasa hi an tamlo viau mai thei a ni. District headquarter hrang hrangah hospital building leh thil dang dang tul te leh Sub-Centre building te sak chhoh mek a ni tih ka'n sawi duh bawka a.

Tin, ICU-a partition awmlo a ngaih pawimawh thu member zahawm tak Dr. Ngurdingliana sawi kha, ICU hi a duty nurse in a damlo zawng zawngte a hmuh vek theih tura partition awmlo tura ngaih a ni. Partition a awm a nih pawhin hmuh tlang theih tura siam tur a ni a. Tin, chutih rual chuan a sawi ang khan natna inkai chhawn theih damlo te nena awm pawlh kha a remchang lova. Falkawn Referral Hospital lamah chutiang chuan natna inkai chhawn theih te pual bik atan ICU tunah hian sak mek a ni a. Tun atanga reilote ah kan sak zawh theih mai kan in beisei a ni.

Tin, Pu John Siamkunga khan MSACS advertisement chungchang kha a rawn ngaipawimawh viau a, hei hi ngaihtuah dan chi hrang hrang a awm thei a. Kan hriat angin HIV/AIDS hi tunlai Mizoram-ah nasa takin a hluar chho a, a hluar nachhan pawh hi kan sawi tawh thin angin tunhma chuan drugs-a in chiu te, syringe thianghlim lo in hman tawmna avanga inkai te a ni a. Mahse, tunhnaiah hian sex avanga inkai darhna hi a sang zawka a, tunhnaite ah hian syringe atanga inkaichhawn aiin an tlahniam leh deuh a. HIV/AIDS hi sex avanga inkaichhawn a nih tlangpui avangin mipuite awareness an neih theih nan khatiang khan hma lak a ni. Tin, rawtna a rawn siamte pawh kha kan lo ennawn ang.

Hnahthial Hospital building chungchangah khan sum kal dan mumal loh avangin phase-II tur sum a lo la thlen loh avangin kan la sak chhunzawm thei lo a ni. Tin, member zahawm tak Dr. K. Beichhua khan Doctor-te service rules chungchang a rawn ngaipawimawh a, a dik a, hei hi ennawn mek a ni a; tin, seniority of doctor pawh kha ennawn chhoh mek a ni. Chutiang zelin Specialist te sem zai, Champhai leh Siaha tih pawh kha a bikin Gynae leh Medicine hi Champhai leh Saiha hian an nei ve ve a ni. Tin, rawtna tha tak tak a rawn siam a, short course training doctor te tan, endoscope, ultra sound, dialysis leh thil dang dang a rawn rawt

a, khang kha tunah hian kalpui mek a ni. CMO kum 20 chuang service tawh MO post –a la awm reng tan functional promotion ngaihtuah a ngai tih kha hei hi tunah hian sorkarin a ennawn mek bawk a ni. Tin, SMO 4 theuh SMO hnuai a dah a, programme hna chak zawka kalpui ni se tih kha, IMR programme pawh a huam thei ang a, chutiang chuan tunah hian doctor indaihlohna avangin Govt. of India chuan SMO 2 tal awm se a duh a, chu chu kan la tlin rih lo a ni. Tin, staff nurse indaih lohna Civil Hospital pawh hi an indaihna turin hma lak chhoh mek zel a ni bawk a ni.

Tin, member zahawm tak Pu Lalrobiaka khan Health Worker Saithah-ah dah a duhthu a rawn sawi kha kan lo ngaihtuah ang a Tin, W. Phaileng PHC X-Ray chungchang a rawn sawi kha X-Ray technician kan neih loh avangin kan la dah thei lo mai piah lamah PHC building sak meka X-Ray room tur BADP-a sak hi X-Ray building tura prescribe norms a phak lova, chuvangin siam that tum a ni a. X-Ray hi kan sawi tak ang khan technician indaih lohna avangin duh ang hian hma kan la la thei lova. Zawhna leh chhanna -ah pawh kan sawi ang khan heng hi technician lak belh tumin hma lak chhoh mek zel a ni. Tin, elderly ward hospital dangah dah ni se tih pawh hi, Civil Hospital Lunglei-ah a hmasa ber atan kan han hawng a, tunah hian Civil Hospital tan semi cabin 10 awm theihna tur kan sa mek a, chuti chung chuan MUP Headquarters hruiatu te min ngenna angin chumi sak zawh hma pawhin cabin 4 chu anmahni puala lo luah atan kan siam a, April thla chhung hian luah theih kan in beisei a ni.

Pu T.T. Zothansanga khan ka demand no. 24- Medical and Public Health chungchang chu min rawn sawipui duh lo chung khan, pass min rawn ngen pui avang khan a chungah lawmthu ka sawi e. Champhai District Hospital-ah hian Dr. Lalhmingmawia surgeon dah a ni a, ani hi Chennai-ah cancer zai leh thil dang zir in thla 6 chhung training neiin a kal bo a, a zo tep a, a lo haw tep a ni. Tin, Eye Surgeon an awm a, Gynaecologist an awm a, Medicine Specialist an awm a, Anaesthetist an awm a, (hnim hlum lampang) Pathologist an awm bawk a, NCD programme angin doctor pangngai an awm a, Mamit district Hospital aiin khilamah khian doctor an awm changtlung zawk a ni. Tin, member zahawm tak ten in hriat ka duh chu, khilalah khian an mamawh a, helaiah hian a chuang kan nei rei rui a, kan dah duh

lo a ni hran lo, khawi hmunah pawh an mamawhna ah hian a chuang nei chung a dah duh lo kan ni lova, theih tawpin sem zaiin, sem rual kan duh a, Aizawl khawpuiah mihring tam dan te kan hria. Chutiang zelin Referral Hospital tih changtlun nan hma lak mek a ni a, khang zawng zawng atan khan duh angin Doctor te hi kan han in dah thei lo a ni.

Member zahawm tak Pu Lalruatkima'n CT Scan Civil Hospital ami chhiat thu a sawi kha nia, hei hi battery 80 a awm a, 40 vel hi a chhia a ni. Chumi siam tha tur chuan technician chah mek a ni a, hei hi a lo thlen thuai kan beisei. Tin, NHM-a contract-a thawk te hlawh pek theih loh tih hi state sorkar mawh a ni lo, central sorkar rawih an ni a, an rawn release hun hunah an hlawh hi pek mai thin a ni. Tin, vaihlo chungchangah khan COPTA hnuaiiah Cigarette leh others tobacco products te hi control a ni a, Banned a ni lo, hetiang hmalakna hi Supreme Court-in ti tura min tihna anga Supreme Court-in an ruahman, Parliament pawhin an pass tawh, chumi dungthula Mizoram-ah pawh hian hmalak a ni. Tin, tobacco hi banned a ni lova, amaherawhchu regulated a ni, chuvang chuan helaiah hian anmahni eizawmna ngaihtuah zel kha he pawl hian mawhphurhna an nei lo a ni tih kha ka'n hrilh duh a.

Tin, member zahawm tak Pu Zoram Sangliana khan Civil Hospital-a internship a sawi chungchang kha sum indaih lohna avangin duh angin an lak tam theih lova, a tlangpuin a zir chhuak tawh te lak an ni a. Medical College Hospital-ah lo chuan stipend hi an lo pe lova, chuvangin hmun thenkhat ah chuan mahni zir chhuahna lova intern an tih chuan pawisa an chawi zawk a ni. Tin, dialysis technician post leh contract-a rawih chungchang ah khan NCD programme NHM hnuai atang khan buaipui in hma lo lak a lo en zui kan tum dawn nia.

Lt. Col Z.S.Zuala member zahawm takin Kulikawn Hospital-a Doctor sawn chhuah reng chungchang a rawn sawi a. Doctor hi Department leh Secretariat atang hian an nawm an mak a sawn chhuah an ni hranpa lova, mamawh dan azira sorkar-in a siksawi thin a ni a. Tunah hian Kulikawn-ah hian 100 bedded Mental Hospital, 50 crore project DoNER-in a pawm tawh a, chutiang chuan hma lak mek a ni a. Tin, Model Veng PHC-kha Urban Health Centre-a puan a ni tawh bawk a ni.

Tin, member zahawm tak Pu Vanlalzawma'n MIMER chungchang a rawn sawi kha a dik reng mai a, Union Minister nen an sawi dan ang khan, Medical College

nei tur hian sum leh pai ah kan tlin lova. Chutih rualin, man power-ah pawh local atangin kan indaih lo a ni. Khatih hun laia Minister zahawm tak nen an sawi dun kha a dik a, chuti chung chuan College hi neih thuai tum in hma lak mek a ni a. Christian Medical College Ludhiana te nen pawh kan in dawr a, chutiang zel in Chennai lama Private Hospital hlawhtling zet, a din tu mi hausa pakhat ai awh in minrawn hmu a, chung te nen te pawh chuan kan la sawiho chho dawn a. Tin, JAIKA atang te pawhin loan/grant laka neih chhoh hram dan ngaihtuahin, vawiinah hian Falkawn a Medical College te hi puitlin ngei tumin hma kan la a. Amaherawhchu, kan hriat angin chak taka hma lak erawh chu a harsa deuh a ni.

Tin, Referral Hospital compound chung ah hian ram buai awm lo anga ngaih a ni. Tunah chuan tih fel tawh a ni a, thu buai hranpa a awm tawh lo a ni.

Tin, member panga in I&PR chungchang te anrawn sawi a. I&PR hi Department te reuh te a ni a, amaherawhchu, sorkar thu leh hla puanzarna kawnga kan kut ke leh kan hman tangkai ber te an ni a. Tichuan Governor te, Cabinet Minister te, Minister of State te, Parliamentary Secretary te leh MLA, VIP mipui thlan zahawm tak tak ten nitin deuhthaw programme hmun hrang hrang ah an nei a, chung zawng zawng cover tur chuan I&PR officer te hi an indaihlo thin a. A bikin member zahawm tak Pu Lalrobiaka'n arawn sawi ang khan an District-ah pawh khuan a rual in hmun hrang hrang ah Minister pahnih te leh MLA te pawhin programme an neih chang te a awm thin a, khang ang hunah khan man power hi kan indaih lova, anmahni whatsapp leh camera-a lo in lak mai tura han in ngen chang te kha a awm lo thei lova. Tin, chutih rualin conveyance lam ah te pawh khan duh ang thal in kan indaih lova, khang te pawh kha member te hriatthiamna ka'n ngen a ni.

Tin, ICT Department chungchang demand no. 48-na kha mi panga laiin minrawn sawipui a. ICT hi department te tak te a ni a, thawktu pawh tlem te an ni. Mahse, chuti chung chuan national leh international level ah te hriat phak khawpin an invawrh chho va. Nichina member zahawm tak tak te sawi ang khan, mipui ten an chhawr tangkai theihna turin bill chi hrang hrang online-a pek dan tur te an ruahman chho mek a ni.

Tin, Adhaar Card chungchang Er. Lalrinawma'n a sawi ah khan, hei hi D.C kaltlanga tih a ni a. Enrollment nan sum a ngai lova, form man erawh chu hmun thenkhat

ah ` 10/- lak a ni a hriat a ni. Tin, central sorkar atanga mipui tanpuina tur lo kal zawng zawng te hi a dawngtu finfiah nan Adhaar No. hmanga an account-ah emaw, bungrua an dawn dawn in hmang vek tura central sorkar-in an hma lakna a ni. Vawiinah member thenkhat te (Er. Lalrinawma : Pu Speaker, khawngaih takin Adhaar chungchang kha a khaw kal azirin a man chungchang kha a awm tlat mai a, khalai chungchang kha a nia ka'n sawichhuah a ni. Tin, vawiin chanchinbu Vanglaini-ah khan a lo chhuak a, sorkar scheme dawng turin Adhaar Card phut kher a tul lo tih kha Supreme Court ruling kha a awm thar a, kei pawhin internet-ah ka'n enkual nghal e ka ti a. Engpawhnise, khalaiah khan thil buai neuh neuh te a awm theih avangin a nia ka'n sawichhuah nachhan. Kan sawi ang khan man tlawm deuh tura ngaih a nih lai khan khaw kel deuhah a man bithliah kha a ni tlat mai a. Khalai kha chu engemaw tia tih theih chu ni sela a tha khawp mai a.)

**Pu LAL THANZARA, MINISTER :** Adhaar chungchang hi GAD buaipui a ni a. Engpawhnise, ICT hi an nodal department anga ngaih kan ni a. Hei hi kan department-a hotuten min pek dan a ni a. Engpawhnise, kan member ngaih pawimawh kha kan officer te an awm a, annin an lo chhinchhiah ang a, kan lo chhu zui dawn nia.

Pu Speaker, khang te kha member ten an ngaih pawimawh nia ka lo chhinchhiah, ka'n react theih te chu a ni a. Khang bakah khan an hriat duh han react loh te pawh ka nei ngei ang a. Chung ang te a awm a nih chuan member zahawm tak ten remchangah office lamah te pawh la inzawh a, la inhriattir theih a ni ang a. Tin, chumi piah lam ah chuan, heng kan demand No. 24,26 leh 48 te, department hrang hrang hmalakna achievement hi brief tak meuh meuhin ka siam a, chungte pawh chu i veilama member zahawm takte pawh hi session zawhah hian pek theih a ni dawn a ni. Khati chin kha ka demand chungchanga ka'n sawi theih te chu ni sela.

Tichuan vawiinah ka demand -

Demand	Purpose	Amount	Demand For Grants
--------	---------	--------	-------------------

No.			Page No.
1	2	3	4
24	Medical & Public Health	4,62,22,01,000	269-311
26	Information & Public Relations	14,36,25,000	325-332
48	Information & Communication Tech.	18,32,16,000	579-583
	<b>TOTAL</b>	<b>4,94,90,42,000</b>	

te hi member zahawm tak ten min pass pui turin ka ngen a ni e, Pu Speaker.

**SPEAKER** : Awle, tunah khan Minister zahawm tak Pu Lal Thanzara'n a demand nos. 24,26,48 hnuiaia department 3 ten kum 2017-2018 chhunga an pawisa hman tur a vaia belh khawm `4,94,90,42,000/- hi pass remti zawngin remti ti ru le. (MEMBERS : Remti) Remtilo kan awm em 'Awmlo'

Tichuan demand nos. 24,26,48 hnuiaia department 3 te ina kum 2017-2018 chhunga an pawisa hman tur a vaia belh khawm `4,94,90,42,000/- chu he House hian lungual takin a pass ta a ni tih ka puang e.

**Pu LAL THANZARA, MINISTER** : Pu Speaker, ka lawm e.

**SPEAKER** : Awle, Pathian zarah vawiina kan tih tur chu tuang takin ka zo leh thei ta a, a lawmawm hle mai a, tichuan kan bang rih ang a. Naktuk ni 29.3.2017 Nilaini zing dar 10:30-ah kan kalkhawm leh dawn nia.

The sitting is adjourned.